

**ЎЗБЕКИСТОН РЕСПУБЛИКАСИ БОШ ПРОКУРАТУРАСИ
АКАДЕМИЯСИ**

**Кўлёзма ҳукуқида
УДК34337(041)(575.1)**

**КОРРУПЦИЯГА ҚАРШИ КУРАШИШ
ИЛМИЙ-ТАЪЛИМ МАРКАЗИ**

ҚЎЧҚАРОВ ЗАФАРЖОН ҚАЮМЖОН ЎГЛИ

**ОЛИЙ ТАЪЛИМ СОҲАСИДА КОРРУПЦИЯГА ОИД ХАВФ-
ХАТАРЛАРНИ АНИҚЛАШ ВА УЛАРНИ БАРТАРАФ ЭТИШ
МАСАЛАЛАРИ**

5A240123 – Коррупцияга қарши курашиш

**Магистр академик даражасини олиш учун ёзилган
ДИССЕРТАЦИЯ**

**Илмий раҳбар: “Коррупцияга
қарши курашиш илмий-таълим”
маркази бошлиғи, ю.ф.д. **Исмоилов
Баҳодир Исламович****

Тошкент – 2020

МУНДАРИЖА

КИРИШ.....	3
I БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАР ВА УЛАРНИНГ НАЗАРИЙ ТАВСИФИ.	
1.1. Олий таълим соҳасида коррупция ва коррупциявий хавф-хатар тушунчалари.....	13
1.2. Олий таълим соҳасидаги коррупциявий ҳуқуқбузарлик шакллари, таснифи ва ўзига хос хусусиятлари.....	16
II БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАРНИ КЕЛИБ ЧИҚИШ ОМИЛЛАРИ ВА УЛАРНИ ТАҲЛИЛ ЭТИШ ЖАРАЁНИ.	
2.1. Олий таълим соҳасида коррупциявий хавф-хатарларни таҳлил этиш жараёни.....	24
2.2. Республикамиз олий таълим соҳасида коррупциявий хавф-хатарларнинг келиб чиқиш омиллари.....	31
III БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАРНИ БАРТАРАФ ЭТИШ МАСАЛАЛАРИ.	
3.1. Олий таълим соҳасида коррупцияга қарши курашишда Украина ва Грузия давлатлари тажрибаси.....	42
3.2. Олий таълим соҳасида коррупциявий хавф-хатарларни бартараф этиш юзасидан таклифлар.....	60
ХУЛОСА.....	83
ФОЙДАЛАНИЛГАН АДАБИЁТЛАР РЎЙХАТИ.....	87
ИЛОВАЛАР.....	92

КИРИШ

Магистрик диссертацияси мавзусининг асосланиши ва унинг долзарблиги. Сўнгги йилларда мамлакатимизда коррупцияга қарши курашиш соҳасида муҳим ташкилий-хукуқий ислоҳотлар амалга оширилмоқда. Аҳолининг хукуқий онги ва маданиятини оширишга, жамиятда коррупцияга қарши муросасиз муносабатни шакллантиришга йўналтирилган тизимли чоралар кўрилмоқда.

Коррупциядан ҳоли жамият ва давлатни яратиш мамлакат тараққиётининг мустаҳкам кафолатидир. Ўзбекистон Республикаси Президенти Шавкат Мирзиёев 2018 йил 7 декабрь куни Конституциямизнинг 26 йиллигига бағишланган маросимда сўзлаган нутқларида “*Коррупция билан ҳеч қачон мақсадимизга эриша олмаймиз*”¹ деб, таъкидлаган эдилар.

Мамлакатимизда коррупцияга қарши йўналтирган барча ислоҳотлар фуқароларнинг хукуқ ва манфаатларини кўзлаб амалга оширилмоқда.

Айниқса, таълим соҳасида коррупцияга нисбатан муросасиз муносабатни шакллантириш орқали мустақил фикрлайдиган, юксак маънавий-ахлоқий фазилатларга эга, рақобатбардош кадрларни тайёрлашга алоҳида эътибор қаратилмоқда.

Хусусан, Президентимиз 2020 йил 24 январь куни Олий Мажлисга йўллаган мурожаатномаларида, “*олий маълумот оламан, ўз устимда ишилаб, илмли бўламан, деган, юрагида ўти бор, жўшиқин ёшлиаримизнинг таҳсил олиши учун ҳамма қулайликларни яратишимиш шарт. Шунинг учун мактаб битириувчиларини олий таълим билан қамраб олиши даражасини 2020 йилда камида 25 фоизга ва келгусида 50-60 фоизга етказамиш*”, деб таъкидлаб ўтди².

¹ Ш.М.Мирзиёев, Ўзбекистон Республикаси Конституциясининг 26 йиллигига бағишланган тантанали маросимдаги маъруза, 2018 йил 7 декабрь, <http://газета.uz>.

² Ш.М.Мирзиёев, Ўзбекистон Республикаси Олий Мажлисига йўллаган мурожаатномаси, 2020 йил 24 январь, Интернет манзили: <http://uza.uz>.

Жаҳон Банки томонидан келтирилган таҳлилий маълумотда, мамалакатимизда меҳнат бозорининг ривожланиши иқтисодиётнинг ўзгариши билан бирга содир бўлаётгани, бу ҳолат турли касб эгаларига бўлган талабни ўсишига олиб келаётгани, меҳнат бозори талабларини қондиришда сифатли олий таълим мухим аҳамият касб этиши таъкидланиб, олий таълим тизимидағи ислоҳотларни меҳнат ва иқтисодиёт соҳасидаги ўзгаришларга мувоғик амалга ошириш тавсия этилган¹.

Олий таълим соҳасида коррупцияга қарши курашиш долзарб масала эканлигини турли омиллар билан белгилашимиз мумкин, бироқ қуйида келтириладиган омиллар энг устуворлари ҳисобланади:

1) замонавий давлат хизмати ва хусусий секторда касб турлари шиддат билан кўпаяётган бир вазиятда малакали кадрларга бўлган талабнинг ортиши ва ижобий натижаларга эришишда етук кадрлар хизматидан фойдаланиш ҳал қилувчи аҳамият касб этаётгани;

2) бугунги бозор иқтисодиёти шароитида фаровон ҳаёт кечириш, касбий ва инсоний хурмат эътиборга эришиш учун олий маълумотли кадр бўлиш;

3) юқорида келтирилган икки омил асосида тарафлар ўртасида вужудга келадиган муносабатларга коррупциянинг аралашуви натижасида келиб чиқадиган жиддий салбий оқибатлар.

Давлат ва хусусий секторда малакали кадрларга бўлган талаб ва шахсни олий маълумотга эга бўлиш орқали моддий ҳамда маънавий манфаатни қўлга киритишга интилиши субъектлар ўртасида муносабатлар ортишига, қонуний муносабатларни коррупциявий муносабатларга ўзгаришига кучли таъсир қиласи. Зеро, олий маълумот олиш ва малакали кадр бўлиш оғир меҳнат талаб этиши, ҳамма ҳам ўз кучи ва қобилияти билан унга эриша олмаслиги уларни коррупция усулидан фойдаланишга ундейди.

¹ Final Report of World Bank Group, “Uzbekistan Education Sector Analysis” 2018, p –11

Биринчи асос бўйича, давлатнинг олий таълимга бўлган юқори эътибор ва эҳтиёжи қўйида келтириладиган рақамларда исботини топган.

Бугунги қунда, Республикада 117 та олий таълим муассаси (мантда ОТМ шаклида) мавжуд бўлиб, уларнинг 96 таси миллий, 21 таси хорижий муассасалар ҳисобланади. Уларда бакалавриат таълим йўналиши бўйича 410 минг, магистратура йўналиши бўйича 13 минг нафар талабалар таълим олмоқда.

Сўнгги уч йил давомида олий таълим соҳасида 200 дан ортиқ қонун ҳужжатлари қабул қилинди. Бу даврда мамлакатимизда 6 та ОТМ, 17 та филиаллар, 14 та хорижий олий ўқув юртлари ташкил этилди, юздан ортиқ бакалавриат ҳамда 94 та магистратура йўналишлари бўйича кадрлар тайёрлаш йўлга қўйилди, 2019-2020 ўқув йилидан 59 та олий ўқув юритида сиртқи, 10 тасида кечки таълим жорий қилинди.

Мазкур чора-тадбирлар натижасида ёшларни олий таълим билан қамраб олиш даражаси 9 фоиздан 20 фоизга ошиди.

Соҳага бюджетдан ажратилаётган маблағлар миқдори йилдан-йилга ортиб, 2018 йилда 879 млрд. сўм, 2019 йилда 1 трлн. 288 млрд. сўм маблағлар ажратилган бўлса, жорий йилда бу кўрсаткич 1 трлн. 888 млрд. сўмни ташкил этмоқда.

Профессор-ўқитувчиларнинг маоши 2018 йилда ўртача 25 фоизга оширилган бўлса, 2019 йил 1 январдан 20 фоизга, 1 июлдан эса 25 фоизга оширилди¹.

Иккинчи асос бўйича, коррупцияга қарши курашишда олий таълим муҳим аҳамиятга эга соҳа сифатида ажralиб туради, чунки олий таълим меҳнат фаолиятига йўлланма берувчи якуний узлуксиз таълим босқичи ҳисобланади. Бутун дунёда ва мамлакатимизда олий таълим олишга бўлган интилиш жуда юқори ва бу борадаги кучли рақобат коррупциявий ҳолатлар келиб чиқиш эҳтимолини оширади.

¹ Ўзбекистон Республикаси қонун ҳужжатлар маълумотлари миллий базаси, 2019 й., 06/19/5847/3887-сон.

Рақамларга мурожаат қилсак, соҳада ўтган 2019 йилда аввалги битиувчилар билан бирга 1.066.922 нафар номзодлар ОТМга кириш имтиҳонларини топширган бўлиб, уларнинг 121 минг нафари талабаликка тавсия этилган¹. Кўриш мумкинки, номзодларни олий таълимга қамраб олиш даражаси 11.3 фоизни ташкил қилмоқда.

Учинчи асос бўйича, олий таълим “коррупциянинг дастлабки мактаби” ҳисобланади, чунки бу фаолиятда талаба вояга етган мустақил шахс сифатида ўқитувчи билан тўғридан-тўғри ҳуқуққа зид фаолиятга киришади ва унда коррупцияга мойил шахсият шаклланиб боради². Келажакда коррупцияга мойил кадрни масъулятли лавозимни эгаллаши салбий оқибатларга сабаб бўлади. Демак, олий таълимда коррупцияни мавжуд бўлиши бошқа соҳаларга ҳам коррупцияни кенг тарқалишига йўл очиб беради. Соҳадаги коррупция билимсиз талабаларни шакллантириш билан бирга, юқумли касаллик мисоли илмли талабаларни ҳам коррупция йўлини танлашга ундейди³.

Салбий кўрсаткичларга мурожаат қилсак, сўнгги икки йилда олий таълим тизимидағи 326 нафар ходимлар жиноий жавобгарликка тортилган бўлиб, 317 нафари ёки 97 фоизи коррупциявий жиноят содир этган⁴.

Шунингдек, “Ижтимоий фикр” жамоатчилик Маркази томонидан 2018 йилда ўtkазилган сўровда 29 фоиз, 2019 йилда ўtkазилган сўровномада 35 фоиз иштирокчилар олий таълим тизимида коррупция кенг тарқалганлигини эътироф этган⁵.

¹ Коррупцияга қарши кураш бўйича Республика Идораларо комиссиянинг йиғилиш баёни, “Олий таълим соҳасида коррупцияга қарши курашиш ва қонунийликни таъминлашга доир масалалар” – 2019 йил 18 январь.

² Кнауст И.С. “Коррупция учреждениях вкшшего профессионального образования: Магистерская диссертация”. Томск.: 2016. – 4 с.

³ Nataliya L. Taxonomy of Corruption in Higher Education Peabody Journal of Education”, Newly Emerging Global Issues, 2005, p – 81-92.

⁴ Коррупцияга қарши кураш бўйича Республика Идораларо комиссиянинг йиғилиш баёни, “Олий таълим соҳасида коррупцияга қарши курашиш ва қонунийликни таъминлашга доир масалалар” – 2019 йил 18 январь.

⁵ Коррупцияга қарши кураш бўйича Республика Идораларо комиссиянинг йиғилиш баёни, “Олий таълим соҳасида коррупцияга қарши курашиш ва қонунийликни таъминлашга доир масалалар” – 2019 йил 18 январь.

Якунийси, етарли билим ва кўникмага эга бўлмаган, маънавий қашшоқ ёш авлодни қийинчиликсиз давлат сиёсатидан оғдириш, турли салбий йўлларга етаклаш мумкин бўлади ва бу эса ўз навбатида давлатдаги сиёсий ва маънавий ҳолатга салбий таъсир кўрсатади.

Юқорида келтирилган муҳим омилларни инобатга олган ҳолда давлат томонидан олий таълимга долзарб соҳалардан бири сифатида эътибор қаратилиб, чинакам “коррупциясиз соҳага” айлантириш мақсадида жадал ислоҳолатлар амалга оширилмоқда.

Ўзбекистон Республикасининг 1997 йил 29 августдаги “Таълим тўғрисида”ги Конуннинг 14-моддасида, олий таълим юқори малакали мутахассислар тайёрлашни таъминлаб бериши кераклиги кўрсатилган¹.

Шунга кўра, Ўзбекистон Республикаси Президентининг 2019 йил 8 октябрдаги “Ўзбекистон Республикаси Олий таълим тизимини 2030 йилгача ривожлантириш концепциясини тасдиқлаш тўғрисида”ги ПФ-5847-сонли Фармони қабул қилиниб², коррупцияга қарши курашиш ва шаффофликни таъминлашнинг таъсирчан механизмларини жорий этиш белгиланди.

Шунингдек, Ўзбекистон Республикаси Президентининг 2017 йил 7 февралдаги “Ўзбекистон Республикасини янада ривожлантириш бўйича ҳаракатлар стратегияси тўғрисида”ги ПФ-4947-сонли Фармонида, таълим ва ўқитиш сифатини баҳолашнинг халқаро стандартларини жорий этиш асосида ОТМ фаолиятининг сифати ҳамда самарадорлигини ошириш, ОТМга қабул квоталарини босқичма-босқич кўпайтириш белгиланган бўлса,³ 2018 йил 5 июндаги “Олий таълим муассасаларида таълим сифатини ошириш ва уларнинг мамлакатда амалга оширилаётган кенг қамровли ислоҳотларда фаол иштироқини таъминлаш бўйича қўшимча чора-тадбирлар тўғрисида”ги ПҚ-3775-сонли Қарори асосида олий таълим

¹ Ўзбекистон Республикаси Олий Мажлиси Ахборотномаси, 2013 й., 41-сон, 543-модда.

² Ўзбекистон Республикаси қонун хужжатлар маълумотлари миллий базаси, 2019 й., 06/19/5847/3887-сон.

³ Ўзбекистон Республикаси қонун хужжатлар маълумотлари миллий базаси, 2019 й., 06/19/5892/4134-сон

тизимида амалга ошириладиган ислоҳотлар бўйича “йўл харитаси” тузилди,¹ 2019 йил 11 июндаги “Олий ва ўрта махсус таълим соҳасида бошқарувни ислоҳ қилиш чора-тадбирлари тўғрисида”ги ПФ-5763-сонли Фармонида, олий таълим соҳасида самарали бошқарув тизимини яратиш кўзда тутилди².

Бундан ташқари, Ўзбекистон Республикаси Президентининг 2019 йил 27 майдаги “Ўзбекистон Республикасида коррупцияга қарши курашиш тизимини янада такомиллаштириш чора-тадбирлари тўғрисида” ПФ-5729-сонли Фармони асосида 2019 йил 1 августдан бошлаб эксперимент тариқасида олий таълимда “коррупциясиз соҳа” лойиҳасини амалга ошириш белгиланди³.

Давлатимиз раҳбари томонидан олий таълим тизимига қаратилаётган алоҳида эътибор ва ғамхўрликларга қарамасдан, соҳада коррупция ҳолатлари, жиддий муаммо ва нуқсонлар сақланиб қолмоқда. Шунинг учун биринчи навбатда олий таълим соҳасида мавжуд коррупциявий хавф-хатарларни аниқлаш ва уларни бартараф этиш лозим бўлади.

Тадқиқот обьекти ва предмети. Объект – олий таълим соҳасида коррупцияга оид хавф-хатарларни аниқлаш ва уларни бартараф этиш билан боғлиқ ижтимоий муносабатлар ҳисобланади.

Предмет – олий таълим соҳасида коррупцияга оид хавф-хатарларни аниқлаш ва уларни бартараф этиш билан боғлиқ муносабатларни тартибга солувчи норматив-хуқуқий хужжатлар, хуқуқни қўллаш амалиёти, айrim хорижий мамлакатлар қонунчилиги ва амалиёти, коррупциявий хавф-хатарлар масаласидаги концептуал ёндашувлар, илмий-назарий қарашлар ва хуқуқий категориялар таъдқиқот предмети сифатида ўрганилади.

Магистрлик диссертацияси доирасида қўриб чиқиладиган муаммолар:

¹ Ўзбекистон Республикаси қонун хужжатлар маълумотлари миллий базаси, 2018 й., 07/18/3775/1313-сон.

² Ўзбекистон Республикаси қонун хужжатлар маълумотлари миллий базаси, 2019 й., 06/19/5763/3410-сон.

³ Ўзбекистон Республикаси қонун хужжатлар маълумотлари миллий базаси, 2019 й., 06/19/5769/3450-сон.

биринчидан, олий таълим муассасасига абитуриентларни хужжат топшириши, кириш имтиҳонлари жараёнида “инсон омили”нинг юқори даражада сақланиб қолаётганлиги;

иккинчидан, таълим бериш ва талабалар билимини баҳолашда “ўқитувчи фактори”нинг мавжудлиги, жараёнини такомиллаштириш;

учинчидан, талабалар ўқишини кўчириш ва ўқишга тиклашдаги норматив бўшликлар мавжудлиги;

тўртинчидан, олий таълим соҳасида бошқарувни марказлашганлиги, самарали бошқарув тизимини шакллантириш;

бешинчидан, олий таълим тизимида бюджет маблағларининг мақсадли сарфланишини таъминлаш;

олтинчидан, норматив-ҳуқуқий ҳужжатларни кодификациялаш, ахлоқ кодекси тузиш ва бошқа муаммолар.

Тадқиқот мақсади ва вазифалари. Ўзбекистон Республикаси олий таълим соҳасида коррупцияга оид хавф-хатарларни аниқлаш ва уларни бартараф этиш, олий таълимни коррупциядан ҳоли намунавий соҳага айлантиришга қаратилган таклиф ва тавсияларни ишлаб чиқиш таъдқиқот мақсади ҳисобланади.

Белгиланган мақсадларга эришиш учун таъдқиқот давомида қуйидаги вазифаларни амалга ошириш лозим бўлади:

– олий таълим соҳасида коррупция ва коррупциявий хавф-хатарлар тушунчасини аниқлаш ҳамда уларнинг мукаммал тарифини шакллантириш;

– олий таълим соҳасида коррупцияга оид ҳуқуқбузарлик шакллари, таснифланиши, ўзига хос хусусиятларини ёритиш;

– олий таълим соҳасида коррупциявий хавф-хатарлар таҳлил этиш жараёни;

– олий таълим соҳасида коррупциявий хавф-хатарлар келиб чиқиш сабаб ва омилларини амалий мисоллар ва статистик маълумотлар асосида таҳлил қилиш;

– олий таълим соҳасида коррупцияга қарши курашишда айрим хорижий давлатларнинг ижобий тажрибасини ўрганиш ва миллий тизимга жорий этиш масалаларини муҳокама қилиш;

– олий таълим соҳасини коррупциявий хавф-хатарларни бартараф этиш ва тизимни такомиллаштириш юзасидан таклифлар ишлаб чиқиш.

Илмий янгилиги. Мазкур магистрлик диссертацияси олий таълим соҳасида коррупцияга оид хавф-хатарларни аниқлаш ва уларни бартараф этиш масалалари мавзусидаги назарий ва амалий манбаларга асосланган дастлабки батафсил иш ҳисобланади. Бундан ташқари магистрлик диссертациясида олий таълим соҳасидаги коррупция ва коррупциявий хавф-хатарлар тушунчаси, уларнинг бошқа соҳалардаги коррупциявий хавф-хатарлардан фарқли хусусиятлари ёритилган.

Мазкур тадқиқот ишида олий таълим соҳасидаги коррупцияга оид хавф-хатарларни келиб чиқиш сабаб ва омиллари таҳлил қилиниб, соҳага оид хорижий давлатлар тажрибалари ўрганилган. Энг муҳими, коррупцияга оид хавф-хатарларни бартараф этиш бўйича амалдаги қонунчиликни такомиллаштиришга доир таклифлар берилган.

Тадқиқот мавзуси бўйича адабиётлар шарҳ (таҳлил)и. Олий таълим соҳасида коррупциявий хавф-хатарларни аниқлаш ва уларни бартараф этиш масалалари мамлакатимизда мустақил тадқиқот обьекти сифатида ўрганилмаган. Коррупцияга қарши курашиш илмий ёндашувлар асосида янги ўрганилаётган соҳа бўлгани сабабли бу борада фақат умумий назарий манбалар мавжуд, жумладан: Б.Исмаилов, Р.Зуфаров, У.Хусаиновлар илмий ишлари шулар жумласидандир.

Олий таълим соҳасида коррупция масалалари МДҲ мамлакатлари доирасида Ковалева В.В., Шмакова А.А., Сенчукова Л.О., Номоконова В.А., Гегечкори О.Н., Шульга В.И., Кравченко А.Г., Прокопенко А.И., Головина А.Ю., Дубоносова Е.С., Ковалева С.Н,¹ хорижий мамлакатлар

¹ Кнауст И.С. “Коррупция учреждениях въсшего профессионального образования: Магистерская диссертация”. Томск.: 2016. – 5 с.

доирасида Martin Anderson (1992), Melissa Anderson (1999, 2001), Max Eckstein (2003), Jacques Hallak and Muriel Poisson (2002, 2007), Stephen Heyneman (2004), Harold Noah and Max Eckstein (2001), Lydia Segal (2004), ва Jennifer Washburn (2005)¹ каби таъдқиқотчилар томонидан ўрганилган.

Бироқ, юқорида номалари келтирилган олимларнинг илмий ишларида мавзунинг умумий ва маҳсус жиҳатлари ёритилган бўлсада, олий таълим соҳасида коррупцияга оид хавф-хатарларни аниқлаш ва уларни бартараф этиш яхлит шаклда ўрганилмаган.

Мазкур магистрлик диссертацияси олий таълим соҳасида коррупциявий хавф-хатарларни аниқлаш ва уларни бартараф этиш масалаларига бағишлиланган дастлабки илмий тадқиқот иши ҳисобланади.

Тадқиқотда қўлланилган методиканинг тавсифи. Тадқиқот олиб борища қиёсий-хуқуқий, тарихий, тизимли-тузилмавий, мантиқий, аниқ социологик, илмий манбаларни комплекс тадқиқ этиш, индукция ва дедукция, статистик маълумотлар таҳлили каби усувлар қўлланилган.

Тадқиқот натижаларининг назарий ва амалий аҳамияти. Ушбу таъдқиқот олий таълим соҳасида мавжуд коррупциявий хавф-хатарларни аниқлаш, уларни олдини олиш ва салбий оқибатларини бартараф этишга хизмат қиласди. Тадқиқот иши коррупциявий хавф-хатарларни назарий асослари, ўзига хос хусусиятлари, келиб чиқиши омилларини ўрганишда фойдали кўрсатма бўлади. Шунингдек, диссертацияни соҳадаги дастлабки илмий-назарий манба сифатида баҳолаб, унинг натижаларидан янги тадқиқотлар олиб борища фойдаланиш мумкин.

Тадқиқот ишининг амалий аҳамияти олий таълим соҳасидаги қонун ижодкорлиги фаолиятида, хусусан, норматив-хуқуқий ҳужжатларни тайёрлаш ҳамда уларга ўзгартириш ва қўшимчалар киритиш жараёнига, қонунларни қўллаш амалиётини такомиллаштиришга, коррупциявий

¹ Osipian, A. "Higher Education Corruption in the World Media: Prevalence, Patterns, and Forms". 32nd Annual Conference of the Association for the Study of Higher Education, Louisville, KY, November 2007.

бўшлиқларни тўлдиришга, коррупцияга қарши курашиш соҳасини таълим муассасаларида ўқитишга хизмат қилади. Асосийси, олий таълимни “коррупциядан ҳоли” соҳага айлантиришда дастури амал бўлади.

Иш тузилмасининг тавсифи. Магистрлик диссертация кириш, учта боб, хулоса ва фойдаланилган адабиётлар рўйхати ҳамда иловалардан иборат. Диссертациянинг ҳажми 70 бетдан иборат.

І БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАР ВА УЛАРНИНГ НАЗАРИЙ ТАВСИФИ

§ 1.1. Олий таълим соҳасида коррупция ва коррупциявий хавф-хатар

тушунчалари

Олий таълим соҳасида коррупциявий хавф-хатар тушунчасини ёритишдан аввал “коррупция” тушунчасига тўхталиб ўтиш мақсадга мувофиқ бўлади. Коррупция атамаси лотинча “corruption” сўзидан келиб чиқсан бўлиб, “пора эвазига оғдириш” деган маънони англатади¹. Кейинги қарашларга кўра коррупция атамаси лотинча “corrumptere” сўзидан келиб чиқсан бўлиб, “бузилиш, айниш, таназзул” деган маъноларни англатади².

Коррупция тушунчасига келтирилган барча тарифларда коррупция ва мансабдор шахс ваколатлари ўртасида боғлиқликка алоҳида эътибор қаратилган, чунки коррупция ва мансаб ваколати бир-бирини тақозо этувчи омиллар ҳисобланади. Ўзбекистон Республикасининг 2017 йил 3 январдаги “Коррупцияга қарши курашиш тўғрисида”ги Қонуннинг 3-моддасига кўра, **коррупция** - шахснинг ўз мансаб ёки хизмат мавқеидан шахсий манфаатларини ёхуд ўзга шахсларнинг манфаатларини кўзлаб моддий ёки номоддий наф олиш мақсадида қонунга хилоф равища фойдаланиши, худди шунингдек бундай нафни қонунга хилоф равища тақдим этиш ҳисобланади³. Бироқ, мазкур тарифда мансаб ваколатини существо мол қилиш ҳолати кўрсатилмаган, чунки миллий қонунчиликда мансаб ваколатини существо мол қилиш коррупциявий жиноят сифатида баҳоланмайди. Бироқ, БМТнинг 2003 йил 31 октябрдаги “Коррупцияга қарши курашиш тўғрисидаги конвенция”нинг 19-моддасида, мансаб ваколатини существо мол қилиш коррупциявий жиноят сифатида келтирилган⁴.

¹ Криминология. Учебник. Отв. редактор: Рустабаев М.Х. - Ташкент: ТГЮИ, 2008.- С. 219.

² Интернет манзили: <http://ru.wikipedia.org/wiki/Коррупция>.

³ Ўзбекистон Республикаси қонун хужжатлар маълумотлари миллий базаси, 2019 й., 3/19/542/3177-сон.

⁴ БМТнинг 2003 йил 31 октябрдаги “Коррупцияга қарши курашиш тўғрисидаги конвенция”, Нью-Йорк, 2004 йил.

Олий таълим соҳасида коррупция тушунчаси умумий хусусиятларни ўз ичига олиш билан бирга маҳсус соҳага оид хусусиятларини ҳам қамраб олади.

Вандербилт Университети профессори A.Osipian олий таълим соҳасида коррупцияни давлат ёки корпоратив ишончни сустеъмол қилиш орқали таъқиқланган моддий ёки номоддий бойликлар олишдаги муносабатларни тартибга солиш учун яратилган норасмий алоқалар тизими деб ҳисоблайди¹.

Украинанинг Таълимни режалаштириш халқаро институти илмий ходимлари А.Базхал, Т.Галковская, О.Скрипкин “олий таълимдаги коррупцияни давлат хизматчиси томонидан мансаб ваколатини сусистемол қилиши натижасида таълим олиш ҳуқуқига, сифатига, тенглигига салбий таъсир қилувчи ҳаракатлар”, деб баҳолайди².

Фикримизча, **олий таълим соҳасида коррупция** – олий таълим соҳасида фаолият қўрсатувчи шахснинг ўз мансаб ёки хизмат мавқеидан шахсий манфаатларини ёхуд ўзга шахсларнинг манфаатларини кўзлаб моддий ёки номоддий наф олиш мақсадида қонунга хилоф равища фойдаланиши, мансаб лавозимини сустеъмол қилиши, худди шунингдек, бундай нафни қонунга хилоф равища тақдим этиш ҳисобланади.

“Коррупциявий хавф-хатар” тушунчаси коррупция тушунчасидан тубдан фарқ қиласи. Мазкур тушунча “Коррупцияга қарши курашиш тўғрисида”ги Қонуннинг 24-моддасида, “норматив-ҳуқуқий ҳужжатларни қўллаш жараёнида коррупция хусусиятига эга хавфларнинг юзага келиши эҳтимолини прогноз қилиш шаклида” келган³.

Коррупциявий хавф-хатарлар коррупциявий ҳуқуқбузарликларни келиб чиқишига ёки уларни кенг ёйилишига хисса қўшадиган ҳодиса ёки ҳодисалар йигиндиси ҳисобланади. Шунга ўхшаш тарифни О.Казаченкова

¹ Osipian A. “Glossary of Higher Education Corruption with Explanations”, 2009, p – 26. <http://people.vanderbilt.edu/~ararat.osipian>.

² <http://www.osvita.org>.

³ Ўзбекистон Республикаси қонун ҳужжатлар маълумотлари миллий базаси, 2019 й., 3/19/542/3177-сон.

келтириб ўтган бўлиб, унинг фирмича, коррупциявий хавф-хатарлар давлат органлари ва давлат хизматчилари фаолиятини амалга оширишда коррупциявий хуқуқбузарликларни келиб чиқишига сабабчи бўладиган ҳолатлар, ҳодисалар ва омиллар ҳисобланади¹.

Баъзи олимлар коррупциявий хавф-хатар тушунчасини коррупциявий муаммонинг синоними ёки давлат ва жамият фаолиятида қийинчиликлар келтириб чиқарувчи омил сифатида баҳолашган².

В.Астанин мазкур тушунчани давлат хизматчиси фаолияти билан боғлаб, унга давлат хизматчиси томонидан вазифаларини амалга оширишда белгиланган мажбуриятлар, таъқиқлар ва чекловларга риоя қиласлик шаклидаги коррупциявий хулқ-атворларни деб таъриф берган³. В.Георгиев эса, коррупциявий хуқуқбузарликларни содир бўлишининг эҳтимоллик даражаси деб баҳолаган⁴.

Олий таълим соҳасидаги коррупциявий хавф-хатар тушунчасини профессор A.Osipian тизимда коррупцияга дуч келиш эҳтимоли сифатида баҳолаб, уни товламачилик ва пора олиш зарурати билан боғлик деб ҳисоблаган⁵.

Фикримизча коррупциявий хавф-хатарлар тушунчасига икки ҳил ёндашув асосида тариф бериш мумкин.

Биринчидан, коррупциявий хавф-хатарларни коррупциявий хуқуқбузарликлар содир этилишига олиб келиши мумкин бўлган ҳолатлар ва шароитлар сифатида баҳолаш мумкин. Университет биносини капитал таъмилаш ректорнинг укасига тегишли бўлган курилиш корхонаси томонидан амалга оширилиш ҳолатини бунга яққол мисол сифатида

¹ Балыков П.Н и другие “Организация психологической работы анти коррупционной направленности в таможенных органах Российской Федерации” методические рекомендации. - СПБ, 2010.

² Участие институтов гражданского общества в борьбе с коррупцией: научный и практический пособие / отв. ред. Ю.А.Тихомиров. М., 2013. С. 82.

³ <http://pravoteka.ru>

⁴ Georgiev V. “Methods and techniques for assessment of corruption risk in Defenceand Security”, 2013, Journal of Defense Management, p – 1-2.

⁵ Osipian A. “Glossary of Higher Education Corruption with Explanations”, 2009 p – 24, <http://people.vanderbilt.edu/~ararat.osipian>.

келтиришимиз мумкин. Бу ҳолат коррупциявий ҳуқуқбузарлик содир этилиш эҳтимолини, яъни хавфни келтириб чиқариши мумкин.

Иккинчидан, коррупциявий хавф-хатарларни бевосита коррупциявий ҳуқуқбузарликлар содир этилиши натижасида юзага келадиган салбий оқибатлар сифатида тушунишимиз мумкин. Масалан, коррупциянинг юқори даражаси натижасида давлатда юз берадиган иқтисодий инқироз, фуқароларнинг ижтимоий ҳимояси таъминланмаслиги, сиёсий инқилоб ва бошқалар.

Тадқиқотда коррупциявий ҳавф-хатарларни биринчи ёндашув бўйича ўрганамиз, чунки коррупциянинг оқибатлари билан курашишдан кўра уни олдини олиш самаралироқ.

Олий таълим соҳасидаги коррупциявий ҳуқуқбузарликлар ва хавф-хатарлар ўзининг хусусиятлари, субъектлари, ижтимоий муносабатлар доираси бўйича бошқа соҳадаги хавф-хатарлардан фарқ қиласди.

Барча тарифларни умумлаштирган ҳолда **олий таълим соҳасидаги коррупциявий ҳавф-хатарларни** – соҳадаги давлат ҳокимияти органлари ва таълим муассасалари ходимлари фаолият жараёнида юзага келадиган, коррупцияга оид ҳуқуқбузарликни содир этиш имкониятини яратадиган ҳолатлар, омиллар ва ҳаракатлар сифатида баҳолаш мумкин.

§2.1. Олий таълим соҳасидаги коррупциявий ҳуқуқбузарлик шакллари, таснифи ва ўзига хос хусусиятлари

Олий таълим соҳасидаги коррупциявий ҳуқуқбузарликлар турли хил шаклларда содир этилади.

Дастлаб, шакл тушунчасини ёритиб ўтамиз, С.Ожегова шакл мазмуннинг ажралмас қисми, унинг мавжудлигини таъминловчи, ифодаланишига хизмат қилувчи тушунча, деб тарифлайди¹. Д.Ушаков эса,

¹ Ожегов С.И., Толковый словарь, 2008-2009, <http://slovarozhegova.ru>.

шакл бу ташки кўриниш, объектнинг ташки ифодаланиши, деб хисоблайди¹.

Олий таълим соҳасида коррупциявий ҳуқуқбузарлик шакллари – олий таълим соҳасида содир этиладиган коррупциявий ҳуқуқбузарликларнинг турли кўринишлари ҳисобланади.

К.Кузина олий таълим соҳасидаги коррупциявий ҳуқуқбузарликларнинг қўйидаги шакллари кўрсатиб ўтган: давлатга қарашли ОТМда бюджет маблағларини талон-торож қилиниши; ОТМни аккредитация қилиш учун пора бериш; олий таълимга оид диплом ва бошқа ҳужжатларни ноқонуний усулда олиш; танлов натижасини ҳисобга олмаган ҳолда ОТМни рўйхатдан ўтказиш; талабаларни баҳолаш жараёнида ўқитувчилар томонидан коррупциявий товламачилик содир этиш; ўқиши истамаган талабаларни ўқитувчиларга коррупциявий босим қилиши; ҳамкаслар ва раҳбариятни масъул ўқитувчиларга талабаларни қўллаб-қувватлаш масаласида коррупциявий босимлар ўтказиши².

Фиркимизча, соҳадаги коррупциявий ҳуқуқбузарликларнинг қўйидаги шакллари мамлакатимиз доирасида долзарб ҳисобланади:

- ОТМга кириш жараёнида коррупциявий ҳуқуқбузарлик содир этиш;
- талабаларни баҳолаш жараёнида коррупциявий ҳуқуқбузарлик содир этиш;
- битирув малакавий иши ёки магистрлик диссертациясини тайёрлаш ва ҳимоя қилиш жараёнида коррупциявий ҳуқуқбузарлик содир этиш;
- талабаларнинг давоматини яшириш мақсадида коррупциявий ҳуқуқбузарлик содир этиш;
- ўқиши жойини кўчириш, ўқиши йўналишини ўзгартириш ҳамда ўқишига қайта тиклаш жараёнида коррупциявий ҳуқуқбузарлик содир этиш;
- илмий-тадқиқот жараёнларида коррупциявий ҳуқуқбузарлик содир этиш;

¹ Ушаков Д.Н., Толковый словарь 2008-2009, <http://ushakovdictionary.ru>.

² Кнауст И.С. “Коррупция учреждениях въсшего профессионального образования: Магистерская диссертация”. Томск.: 2016. – 15 с.

- бюджет маблағларини талон-торож қилиш;
- раҳбар ходимлар ва ҳамкасбларни масъул ўқитувчиларга коррупциявий босим ўтказиши;
- ОТМ ходимларидан коррупциявий мақсадларда ноқонуний пул маблағларини йиғиш;
- талабларга китоблар ва бошқа ўқув материаларини мажбурий сотиш ҳамда бунинг учун уларни турли жабҳаларда қўллаш;
- ОТМни битирганлиги тўғрисида соҳта диплом ёки бошқа ҳужжатлар бериш;
- кадрларни лавозимга тайинлаш, уларни ишдан бўшатиши, молиявий рафбатлантириш жараёнида коррупциявий ҳукуқбузарлик содир этиш;
- ОТМга давлат харидларини амалга оширишда коррупциявий ҳукуқбузарлик содир этиш;
- талабаларни ётоқ жойи билан таъминлаш жараёнида коррупциявий ҳукуқбузарлик содир этиш ва бошқалар.

Республика олий таълим соҳасида 2018-2019 йиллар давомида содир этилган коррупциявий жиноятларни таҳлил қилсак, уларнинг 42 таси бюджет маблағларини талон-торож қилиш, 28 таси ўқишига пора эвазига киритиб қўйиш, 9 таси таълимни тўлиқ ўзлаштирган талабаларга ижобий баҳо қўйиш, 7 таси сурункали дарс машғулотларига қатнашмаган талабларга диплом олиб бериш, 6 таси ОТМга пора эвазига ишга қабул қилиш, 3 таси бошқа ҳолатларда пора олиш билан боғлиқ¹. Рақамлардан мамлакатимизда бюджет маблағларни талон-торож қилиш, пора эвазига ўқишига киритиб қўйиш, пора эвазига баҳо олиб бериш, пора эвазига ишга олиш каби коррпциявий ҳукуқбузарлик шакллари кенг тарқалганлигини кўриш мумкин.

Олий таълим соҳасида содир этилаётган коррупциявий ҳукуқбузарларни турли асосларга кўра таснифлаш мумкин.

¹ Коррупцияга қарши кураш бўйича Республика Идоралараро комиссиянинг йиғилиш баёни, “Олий таълим соҳасида коррупцияга қарши курашиш ва қонунийликни таъминлашга доир масалалар” – 2019 йил 18 январь.

Жумладан, A.Osipian ҳуқубузарлик шакларини турли асослар бўйича таснифлайди. Хусусан, у ҳуқубузарликларни содир этилиш усулига кўра: порахўрлик, непотизм, фаворотизм, фрибгарлик, моддий бойикларни талон-торож қилиш, плагиат, касбий одоб-ахлоқ қоидаларини бузиш, шартномани бузиш шаклларга; содир этилиш соҳасига кўра: ОТМга қабул қилиш, таълим бериш, битириш, аккредитация ва лицензиялаш, профессор-ўқитувчиларни танлаб олиш ва рағбатлантириш жраёнида, тадқиқот олиб бориш, грантлар олиш жараёнида содир этиладиган; субъектлар ўртасидаги муносабатларга кўра: давлат-университет, тадбиркор-университет, факультет-талаба, факультет-бошқарув, давлат-талаба ўртасида содир этиладиган ҳуқубузарлик шакларига таснифлайди¹.

Соҳадаги коррупциявий ҳуқуқий муносабатлар давлат ёки минтаقا бўйича долзарб ва ўзига хос бўлади.

Жумладан, Италияда мафия ва ОТМ ўртасидаги коррупциявий муносабатлар мавжудлиги сабабли тадқиқотчиilar томонидан бу ҳолат соҳадаги янги коррупциявий ҳуқубузарлик шакли сифатида баҳоланди. АҚШда фрибгарлик, плагиат ва талabalар уddабронлиги кенг тарқалган бўлса, Россия Федерациясида ОТМга кириш ва ўқиши тамомлаш жараёнидаги порахўрлик долзар шакллар ҳисобланади. Буюк Британияда ОТМни аккредитациядан ўтказиш билан боғлиқ коррупция муҳим аҳамият касб этса, Хитойда ўқиши битирганлиги тўғрисида сохта сертификат бериш кенг тарқалган. Биргина АҚШда хусусий олий таълим ривожланиши натижасида университетларнинг давлатдан қарзлари 1.7 млн. доллардан 17 млн. долларга ортди ва турли фирибгарликларни содир этишга олиб келмоқда².

¹ Osipian A. "Higher Education Corruption in the World Media: Prevalence, Patterns, and Forms". 32nd Annual Conference of the Association for the Study of Higher Education, Louisville, KY, November 2007.

² Osipian A. "Higher Education Corruption in the World Media: Prevalence, Patterns, and Forms". 32nd Annual Conference of the Association for the Study of Higher Education, Louisville, KY, November 2007.

Коррупциявий ҳуқуқбузарлик шакллари амалга оширилаётган ислоҳотлар билан бирга вужудга келишини халқаро тажрибадан кўриш мумкин. Масалан, хусусий олий таълим ривожланган АҚШ ва Европа мамлакатларида ОТМни давлат рўйхатидан ўтказиш жараёнида коррупциявий ҳолатлар кўп учраса, мамлакатимизда хусусий ОТМ энди ривожланаётганлигини инобатга олган ҳолда мазкур ҳуқуқбузарлик яқин келажакда долзарб шаклга айланиши мумкин.

Олий таълим соҳасида содир этиладиган коррупциявий ҳуқуқбузарликлар талабалар, гуруҳ етакчилари, ўқитувчилар, раҳбарлар ва бошқа шахслар ташаббуси билан содир этилиши мумкин. Сиёсий таъдқиқотчи Албина Юнни ўрганиш натижаларига кўра, мамлакатимиз ОТМда юзага келаётган коррупциявий келишувларнинг 25 фоизи талабалар, 24 фоизи ўқитувчилар, 10 фоизи гуруҳ етакчилари, 3% ходимлар, 38% бошқа шахслар ташаббуси билан содир этилаётганлиги кўрсатилган¹.

Фикримизча, коррупциявий ҳуқуқбузарлик коррупциявий манфаатни ким кўришига қараб **индивидуул ва институционал** кўринишдаги коррупциявий ҳаракатлар бўлиши мумкин. Индивидул кўринишдаги коррупциявий ҳаракатлар натижасида алоҳида якка шахс ёки шахслар манфаатдор бўлади. Мисол учун, пора эвазига ОТМга киритиб қўйиш, талабага пул эвазига ижобий баҳо қўйиш. Институционал кўринишдаги коррупциявий ҳаракатлар натижасида алоҳида шахс ёки шахслар эмас балки маълум соҳа вакиллари ёхуд маълум тузилма манфаатдор бўлади. Масалан, ОТМни пора эвазига ноқонуний равища давлат рўйхатидан ўтказиш.

Шунингдек, коррупциявий ҳаракатларнинг қонунийлигига кўра, **қонуний фаолият асосида ва ноқонуний фаолият асосида** амалга ошириладиган коррупциявий ҳуқуқбузарликларга ажратиш мумкин.

¹ Yun A., “Corruption in Uzbek higher education: detrimental impurity for the future, Norwegian institute International affairs”, 2016, p – 12.

Қонуний фаолият асосида амалга ошириладиган коррупциявий ҳуқуқбузарликларга ходимларни хизмат вазифасига субъектив ёндашуви, яни ўқитувчи томонидан дўсти ёки юқори амалдорнинг билимсиз фарзандига ижобий баҳо қўйишини мисол қилиш мумкин. Ноқонуний фаолият асосида амалга ошириладиган коррупциявий ҳуқуқбузарликларга ходимларни жавобгарликка тортишга сабаб бўладиган ҳаракат, яни талабани пора эвазига бир таълим йўналишидан бошқа таълим йўналишига кўчиришини келтириш мумкин.

Бундан ташқари, олий таълим соҳасидаги коррупциявий ҳаракатларни содир этилиш соҳаларига қараб, **таълим бериш, хизмат қўрсатиш ва бошқарув** соҳасидаги коррупциявий ҳуқуқбузарликларга бўлиш мумкин. Талабаларнинг якуний ишини моддий манфаатдорлик эвазига ижобий баҳолашни таълим бериш, талабага моддий манфаатдорлик эвазига ётоқхона беришни хизмат қўрсатиш, пора эвазига ректор лавозимига тайинлашни бошқарув соҳасидаги коррупцияга мисол сифатида келтиришимиз мумкин¹.

Н.Румянцева олий таълимдаги коррупциявий ҳуқуқбузарликларни куйидагича таснифлайди:

- 1) таълимдаги маҳсус коррупция:
 - академик коррупция: талаба-факультет ва талаба-бошқарув ходими ўртасидаги коррупция;
 - хизмат қўрсатишдаги коррупция: талаба-хизмат қўрсатувчи ходим ва талаба-бошқарув ходими ўртасидаги коррупция;
- 2) бошқарувдаги коррупция².

Худди шу каби, коррупциявий ҳуқуқбузарлик шаклларини ОТМ ташкилий-ҳуқуқий шаклига қараб, **давлат, хусусий ва хорижий** ОТМдаги ҳуқуқбузарликларга ажратиш мумкин.

¹ Osipian A. “Corruption in higher education: for the degree of Doctor of philosophy”. 2013, pages – 25-26.

² Rumyantseva N, “Taxonomy of Corruption in Higher Education”, Peabody Journal of Education, Newly Emerging Global Issues, 2005, p – 81-92

Олий таълим соҳасида коррупциявий хавф-хатарларни бартараф этишда коррупциявий ҳуқуқбузарлик хусусиятларини кўриб чиқиш муҳим ўрин тутади. Зеро, ҳар қандай касалликка қарши курашишда, аввало, ушбу касалликнинг хусусиятлари, яъни инсон организмига салбий таъсири аниқланади, сўнгра касалликка қарши куравшиш чоралари кўрилади.

Олий таълим соҳасидаги коррупциявий ҳуқуқбузарликлар қўйидаги хусусиятларга эга:

Биринчидан, муносабат субъектлари сони қўплиги ва соҳада коррупциявий ҳуқуқбузарликлар содир этилиши юқорилиги.

Жумладан, 2019 йил ҳолатига Республикада 410 нафар бакалавриат 13 минг нафар магистр талабалар таълим олиши, 25.418 нафар профессор-ўқитувчилар меҳнат қилиши бунинг ёрқин мисоли бўлади¹. Мазкур субъектларнинг деярли ҳар куни ўзаро муносабатга киришиши ва бу жараёнда инсон омилининг юқорилиги коррупциявий ҳуқуқбузарликлар содир этилишига олиб келиши мумкин;

Иккинчидан, талабаларни баҳолаш жараёнидаги коррупциявий ҳуқуқбузарликларни кўзга кўринмаслиги, муносабат субъектлари ва жамоатчилик томонидан бу турдаги ҳаракатларни аҳамиятсиз ҳуқуқбузарлик сифатида баҳолаши.

Хусусан, талабани пул бериб ёки таниш мансабдорлар орқали ижобий баҳо олиши ўқитувчи ва талабалар томонидан жиноий ҳуқуқбузарлик сифатида қабул қилинмайди. Мазкур майда коррупциявий ҳаракатларни ўқиш ва иш фаолиятида мунтазам содир этилиши уларни ўқитувчи ва талабалар учун оддий ҳолга айлантиради.

Учинчидан, олий таълим соҳасидаги коррупциявий ҳуқуқбузарликлар даврий асосда содир этилиш хусусиятга эга.

Жумладан, ҳар йили ОТМга кириш имтиҳонларини ўтказилиши, йилда икки марта оралиқ, якуний имтиҳонларини ўтказилиши ва битириш

¹ Ўзбекистон Республикаси қонун ҳужжатлар маълумотлари миллий базаси, 2019 й., 06/19/5847/3887-сон.

курсларида давлат имтиҳонлари, битирув малакавий ишларни топширилиши ҳолатларини келтиришимиз мумкин. Даврий асосда коррупциявий ўчоқларни юзага келиши ҳуқуқбузарлар учун узоқ ва пухта тайёргарликлар кўриш имкониятини яратади ҳамда бу соҳадаги коррупциявий хавф-хатарларни юқори бўлишига олиб келади;

Тўртингидан, абитуриент ва талабалар учун олий маълумотга эга бўлиш катта ҳаёт йўлидаги ҳал қилувчи нуқта, кўп эҳтимол билан унинг келажаги учун кўприк бўлиши алоҳида бир хусусият. Ушбу муҳим ҳаёт босқичида ижобий натижага қонуний йўл билан эриша олмаган шахслар коррупциявий ҳуқуқбузарликлар содир этишга уринади;

Бешингидан, олий таълим соҳасидаги коррупция бўлажак кадрларда коррупциявий иллатларни шакллантиришга хизмат қиласди.

Масалан, талабанинг ўқитувчи билан тўғридан-тўғри коррупциявий муносабатларга киришиши уни саводсиз кадр бўлишига олиб келиши билан бир қаторда, келгуси иш фаолиятида ҳам коррупциявий ҳуқуқбузарликлар содир этишга ўргатиб боради. Зеро, соҳада коррупцияни авж олиши коррупцияга мойил бўлажак кадрлар учун тажриба майдони бўлиб ҳизмат қиласди;

Олтингидан, олий таълим соҳасидаги коррупция бошқа соҳаларга ҳам коррупциянинг кенг тарқалишига хизмат қиласди.

Хусусан, ОТМга пора бериш йўли билан кирган ва уни коррупциявий йўллар билан тугатган талаба давлат хизматининг турли соҳаларига, жумладан соғлиқни сақлаш, қурилиш, ҳуқуқни муҳофаза қилиш ва бошқа соҳаларга меҳнат фаолиятини давом эттиради ва бу ўз навбатида ушбу давлат хизмати соҳаларида коррупциянинг кенг тарқалишига олиб келади.

Олий таълим соҳасидаги коррупциявий ҳуқуқбузарлик шакли, таснифи ва ўзига хос хусусиятларини ўрганиш, соҳадаги коррупциявий хавф-хатарлар келиб чиқиш сабаб ва омилларини аниқлашга имкон беради.

II БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАРНИ КЕЛИБ ЧИҚИШ ОМИЛЛАРИ ВА УЛАРНИ ТАҲЛИЛ ЭТИШ ЖАРАЁНИ

§ 2.1. Олий таълим соҳасида коррупциявий хавф-хатарларни таҳлил этиш жараёни

Бугунги кунда жаҳон амалиётида коррупциявий хуқуқбузарликларга қарши курашишда профилактик услублардан фойдаланиш кенг тарқалган. Коррупциявий жиноятларнинг кўпчилиги аниқланмай қолишини инобатга олсак, бу йўналишга кўпроқ эътибор бериш мақсадга мувофиқ бўлади.

Фикримизча, коррупциявий хавф-хатарларнинг таҳлил этиш жараёни миллий даражада кенг ўрганилмаган (шу жумладан олий таълим тизимида) соҳа бўлиб, лекин халқаро миқёсда ушбу йўналиш кенг тарқалган.

Жумладан, Claremont Университети томонидан “International Cooperation against Corruption, Finance & Development”¹ қўлланмасида, “U4” Коррупцияга қарши курашиш маркази катта маслаҳатчиси Stenberg Johnson томонидан “The basics of corruption risk management A framework for decision making and integration into the project cycles”² қўлланмасида, “U4” Коррупцияга қарши курашиш маркази маслаҳатчиси Marijana Trivunovic ва бошқалар томонидан “Developing an NGO corruption risk management system: Considerations for donors”³ қўлланмаси ва OECD ёки Иқтисодий ҳамкорлик ва тараққиёт ташкилоти томонидан “Integrity of Education Systems A Methodology for Sector Assessment”⁴ қўлланмасида батафсил ёритиб ўтилган.

Коррупциявий хавф-хатарларни аниқлашда уларни юза келтирувчи омиллар билан тўқнаш келамиз. Профессор Robert Klitgaard коррупциявий хавф-хатарларни $K=M+E-X-O$ (K-коррупция, M-монополия,

¹ Klitgard R, “International Cooperation against Corruption, Finance & Development”, March 1998.

² Johnson J, “The basics of corruption risk management a framework for decision making and integration into the project cycles”, U4 Issue 2015.

³ Trivunovic M and others, “Developing an NGO corruption risk management system: Considerations for donors”, U4 Issue, 2019.

⁴ OECD Reviews of Integrity in Education: Ukraine 2017.

Э-эҳтиёткорлик, Ҳ-хисобдорлик, О-ошкоралик) формуласи орқали ёритади. Формулада давлат ва жамият ҳаётида монополия эгаларининг эҳтиёткорлик билан муносабатга киришишлари учун уларни ҳисобдорлиги ва ошкоралиги таъминланиши керак¹.

Фикримизча, коррупциявий хавф-хатарларни таҳлил этиш – давлат органининг амалга ошираётган функциялари (ваколатлари)ни таҳлил этиш ва коррупцияга оид ҳукуқбузарликларнинг содир этилишига шароит яратиши мумкин бўлган коррупция хавф-хатарларини аниқлаш ҳамда уларни минималлаштиришга қаратилган самарали ва натижали чоратадбирларни ишлаб чиқиш бўйича фаолият ҳисобланади.

Олий таълим соҳасида коррупциявий хавф-хатарларни таҳлил этиш жараёнида маълумотларни жамлаш дастлабки ва муҳим босқич ҳисобланади. Бунда бир нечта фарқли усуслардан фойдаланиш мумкин:

Биринчидан, соҳасидаги давлат хизматчиликларининг тегишли фаолиятини тартибга соладиган ҳамда функция (ваколат)ларини белгилаб берадиган норматив-хукуқий ва локал ҳужжатлар (давлат органи тўғрисидаги низом, маъмурий регламентлар, юқори турувчи давлат органларининг баённома, қарорлари ва топшириқлари, лавозим йўриқномалари, буйруқлар ва бошқалар)ни олиш.

Иккинчидан, таълим муассасаларидаги ички текширувлар, жумладан, хизмат текшируви материаллари, давлат хизматчиси (ходими)нинг коррупцияга оид ҳукуқбузарликларни содир этишга мойиллигига оид фактлар тўғрисидаги хабарларни тўплаш, бу борада қўмаклашувчи шахслар хизматидан фойдаланиш.

Учинчидан, таълим хизматидан фойдаланувчилар талабалар, ўқитувчилар, фуқаролик жамияти институтлари ва бошқа манфаатдор шахслар иштирокида ижтимоий сўровлар ўтказиши.

¹ Klitgard R, “International Cooperation against Corruption, Finance & Development”, March 1998, p – 18.

Тўртинчидан, соҳадаги хуқуқбузарликлар тўғрисидаги статистик маълумотлар олиш.

Бешинчидан, жисмоний ва юридик шахсларнинг мурожаатлари, халқаро ва хорижий эксперtlар маълумотлари, фуқаролик жамияти институтлари ва оммавий ахборот воситаларининг олий таълим соҳасида коррупцияга оид хуқуқбузарликлар ҳақидаги ёки давлат хизматчиси томонидан одоб-аҳлоқ қоидаларига риоя қилмаганлиги ҳолатлари тўғрисидаги маълумотлардан иборат бўлган хабарларни олиш.

Олтинчидан, хуқуқни муҳофаза қилувчи органлар томонидан тақдим этилган материаллар, жумладан, прокурор назорати хужжатларини тўплаш.

Юқорида келтирилган усуллар ёрдамида тўпланган маълумотлар умумлаштирилади, таҳлил қилинади ва шу асосда коррупциявий хавф-хатар аниқланади. Аниқланган коррупциявий хавф-хатарларинг келиб чиқиши эҳтимоли ва унинг салбий таъсир этиш ҳажмига қараб **паст, ўрта, юқори даражада** баҳоланади.

Сўнгги босқичда сараланган коррупциявий хавф-хатарларни бартараф этиш бўйича таклиф ва мулоҳазалар ишлаб чиқилади ҳамда зарур чоратадбирлар белгиланади.

Хорижий мутахассис ва эксперtlар коррупциявий хавф-хатарларни таҳлил қилишда турли хил ёндашувларни келтириб ўтган. Хусусан, “U4” Коррупцияга қарши қурашиб маркази катта маслаҳатчиси Stenberg Johnson фикрига кўра¹, “Коррупциявий хавф-хатарларни таҳлил этиш тўртта босқичдан иборат бўлиб, бу ёндашувда тизимли хавфларни ўрганиш, хавф даражасини аниқлаш ва самарадорлик қўрсаткичларига асосланган ҳолда хавф-хатарларни камайтириш чораларни танлашни тавсия қиласди.

¹ Johnson J, “The basics of corruption risk management a framework for decision making and integration into the project cycles”, U4 Issue 2015: 18, p – 7.

Таниқли эксперт Stenberg Johnson коррупциявий хавфларни таҳлил этиш жараёнини қуидаги түртта босқичга бўлади:

- 1) коррупциявий хавф-хатарларни аниқлаш, уларга бардошлилик даражасини белгилаш;
- 2) хавф-хатарлар даражасининг баҳолаш (эҳтимоллик ва таъсирлар);
- 3) фаол хавф-хатарлар даражасини бардошлилик билан таққослаш, агар талаб этилса, хавфларни бартараф этиш бўйича қарор қабул қилиш;
- 4) агар хавф-хатарларни бартараф этиш талаб этилса, энг кам ҳаражат ва самарали усулни танлаш”¹.

Stenberg Johnson услугига асосан, олий таълим соҳасида мавжуд бўлган хавф-хатарлардан бирини амалий мисол тарзида кўриб чиқсан, унинг ёндашувининг моҳиятини англаш мумкин бўлади.

Биринчи босқичда мавжуд хавф-хатарлар аниқланади, яъни бунда содир этилган коррупциявий хукуқбузарликнинг келиб чиқиш сабаблари, унга йўл очиб берган омиллар ўрганилади. Масалан, маълум йўналишида ўқиётган талабани турдош бўлмаган бошқа йўналишга ўтказиш тартиби норматив-хукуқий ҳужжатларда² аниқ кўрсатилмаганлик ҳолатини соҳадаги коррупциявий хавф-хатарлардан бири сифатида аниқлаб олдик.

Иккинчи босқичда аниқланган хавф-хатарлар баҳоланади, яъни уни хавф даражаси, коррупциявий хукуқбузарликларни содир этилиш имконияти, мавжуд тизимга салбий таъсирлари, салбий оқибатлари каби фактор бўйича ўрганилади. Юқоридаги мисолни давом эттирасак, талабани бир йўналишдан турдош бўлмаган бошқа йўналишга ўтказиш тартибини норматив-хукуқий ҳужжатларда аниқ белгиланмаганлик ҳолатини юқори коррупциявий хавф-хатар сифатида баҳолашимиз мумкин. Зеро, талабга жавоб бермайдиган, билимсиз кадрларни шаклланиши давлатнинг ҳар қандай фаолиятига салбий таъсир қиласи. Асосийси, ўқишга кириш имконияти катта бўлган йўналишдан рақобат кучли бўлган йўналишга

¹ Johnson J, “The basics of corruption risk management a framework for decision making and integration into the project cycles”, U4 Issue 2015, p – 7.

² Конун ҳужжатлари маълумотлари миллий базаси, 09/19/1046/4242-сон.

пора эвазига ўтиш коррупциявий механизмга айлангани, бу борада талабгорларнинг кўплиги ва ушбу жараённи инсон омилига боғлиқ ҳолда ҳал этилиши хавфнинг юқори даражасини кўрсатиб беради.

Учинчи босқичда аниқланган ва баҳоланган хавф-хатарлар даражасини инсон омилига бардошлилиги таққосланади. Бунда мавжуд хавф-хатарлар даражасига мансабдорлар ёки бошқа ваколатли шахслар бардош бера олишик имкониятлари таҳлил қилинади. Агар мансабдор шахснинг коррупциявий хавф-хатар даражасига бардош бера олмаслиги аниқ бўлса, уни бартараф этиш бўйича қарор қабул қилинади. Амалий мисолни давом эттирадиган бўлсак, ўзи қизиқмаган мутахассислик бўйича ўқиётган талаба, албатта, ўзи ҳоҳлаган мутахассислиги бўйича ўқишини ҳоҳлайди ва бунинг учун турли йўлларни қидиради. Талабанинг ўзи ҳоҳлаган йўналишга ўқишини кўчириш имконияти унинг учун ягона йўл сифатида майдонга чиқади, Ўқишини кўчиришга талабгорлар кўп бўлиши, бу фаолиятда тегишли масъулларнинг ваколатлари аниқ белгиланмагани, мансабдор шахсларнинг коррупциявий босимга бардош бера олмаслик эҳтимоли юқори эканлигини кўрсатади.

Тўртинчи босқичда аниқланган, баҳоланган ва инсон омилига бардошлилиги таққосланган коррупциявий хавф-хатарларни бартараф этиш учун самарали ва камхаражат чора танланади. Талабаларнинг турдош бўлмаган йўналишларга кўчириш коррупциявий ҳолатларни келтириб чиқариши, бу бўйича ҳар йили ОТМда комиссиялар тузилиши, бунинг учун бюджетдан маблағлар ажратилиши ёки масъулларга қўшимча вазифалар юклаши каби ҳолатларни инобатга олсак, турдош бўлмаган мутахассислик бўйича талабаларни кўчириш тартибини бутунлай бекор қилиш мақсадга мувофик.

“U4” Коррупцияга қарши курашиш маркази маслаҳатчиси Marijana Trivunović томонидан коррупциявий хавф-хатарларни таҳлил этишни тўрт

босқичга бўлинган бўлсада,¹ Stenberg Johnson усулидан фарқли равища у хавф-хатарларни инсон омилига бардошлилигига алоҳида эътибор бермаган, лекин хавф-хатарларни бартараф этиш учун танланган чорани амалга оширишни алоҳида босқич сифатида кўрсатган.

“Хусусан:

- а) дастур ёки лойиҳа асосида белгиланган мақсадларни амалга ошириш учун коррупциявий хавф-хатарлар ва таҳдидларни аниқлаш;
- б) коррупциявий хавф-хатарларни эҳтимоллик даражаси ва таъсир этиш имкониятларига асосан жиддийлик даражасини белгилаш;
- в) коррупциявий хавф-хатрларни камайтириш учун аниқ ва устувор чора-тадбирларни белгилаш;
- д) коррупциявий хавф-хатарларни юзага келиш имкониятлари ва зарарли таъсирларни камайтириш мақсадида белгиланган чора-тадбирларни амалга ошириш”.

Таълим тизимида коррупциявий хавф-хатарларни таҳлил этишнинг яна бир ёндашуви Integrity of Education System (INTES) ёки Таълим тизимининг яхлитлиги деб номланади. Бу тизим Open Society Foundation (Очиқ жамият фонди) томонидан АҚШдаги ўрта маҳсус ва ОТМда қўлланган. Шунингдек, Иқтисодий ҳамкорлик ва тараққиёт ташкилоти томонидан Украина таълим тизимни таҳлил этишда ҳам фойдаланилган.

INTES юқоридаги ёндашувлардан фарқли равища таҳлилни уч босқичда амалга оширади:

- 1) “Соҳада мавжуд хавфни аниқлаш, яъни коррупциявий хуқуқбузарлик “нима” деган саволга жавоб топиш, бунда яхлит хуқуқбузарлик нима эканлиги аниқланади;
- 2) Сабабий таҳлилни амалга ошириш, яъни коррупциявий хуқуқбузарлик “қандай” содир этилган деган саволга жавоб топиш, бунда хуқуқбузарликка йўл очган имкониятлар аниқланади ҳамда сабабий

¹ Trivunovic M and others, “Developing an NGO corruption risk management system: Considerations for donors”, U4 Issue, 2019, p – 6.

таҳлилни иккинчи қисмини амалга ошириш, яъни бунда коррупциявий ҳукуқбузарлик “**нима учун**” содир этилган деган саволга жавоб топиш, бунда ҳукуқбузарлик учун қандай манфаат яратишини аниқлаш;

3) Соҳада мавжуд хавфни бартараф этиш бўйича қарор қабул қилиш, бунда содир этиладиган ҳаракатлар шакллантирилади”¹.

INTES услуби соҳада мавжуд хавф-хатарларни аниқлаш, уларни асл сабаб ва омилларини топишда жуда қулай, бироқ мазкур ёндашувда аниқланган хавф-хатарларни баҳолашга, бартараф этилиши лозим бўлган хавф-хатарларни белгилаб олишга эътибор қаратилмаган. Фикримизча, INTES услугини учинчи босқичини хавф-хатарларни инсон омилига таққослаш орқали баҳолаш жараёни билан тўлдирсак, мукаммал тизимга эга бўламиз.

M. Trivunovic эса коррупциявий хавф-хатарларни таҳлил этишни асосан, иккита йўналишга, яъни хавф-хатарларнинг олдини олиш ва жазолаш йўналишига бўлади.² Фикримизча, мазкур икки йўналишни бир-биридан алоҳида ажратиш ёки уларни алоҳида кўллаш мақсадга мувофиқ эмас. Зеро, коррупциявий хавф-хатарларни олдини олиш унинг оқибатлари билан курашишдан кўра яхши, лекин таҳлил ва тизимли ўзгаришларни амалга ошириш учун бу мукаммал тизим яратилди ёки коррупциявий ҳукуқбузарликлар содир этилмайди дегани эмас. Шунинг учун содир этилган коррупциявий ҳукуқбузарликларга қонуний чора кўриш жазолаш йўналиши орқали таъминланади. Ҳар бир давлатда бу икки йўналишни мавжуд бўлиши коррупциянинг максимал олдини олиш имкониятини беради.

Юқорида келтирилган коррупциявий хавф-хатарларни таҳлил этиш услубларини нафақат олий таълим соҳасида, балки бошқа соҳаларда

¹ Monica K, “Education sector corruption: How to assess it and ways to address it” U4 Issue, 2019, p – 28.

² Trivunovic M and others, “Developing an NGO corruption risk management system: Considerations for donors”, U4 Issue, 2019, p – 6.

(соғлиқни сақлаш, капитал қурилиш, банк-молия ва бошқа) ҳам қўллаш мумкин.

Олий таълим соҳасида коррупциявий хавф-хатарларни таҳлил этишни куйидаги асосларга кўра ҳам таснифлаш мумкин.

Биринчидан, ҳудудийлик тамойили асосида, давлатнинг бутун ҳудудидаги ёки айрим ҳудуддаги ОТМда тадқиқот ўтказиш (Республика ёки Тошкент шаҳрида жойлашган ОТМда).

Иккинчидан, соҳалар асосида, мутахассислик йўналишлари бўйича ОТМни тадқиқ қилиш (Республикадаги тиббиёт ОТМ).

Учинчидан, хавф-хатарларни содир этилаётган ҳуқуқбузарлик турлари асосида тадқиқ қилиш (мансабдор шахслар пораҳўрлик жиноятлари).

Тўртинчидан, ОТМнинг ташкилий-ҳуқуқий шаклига кўра хавф-хатарларни таҳлил қилиш (давлат, хусусий ёки хорижий ОТМда).

Бешинчидан, соҳанинг айрим босқичларида хавф-хатарларни таҳлил қилиш (Ўқишига кириш, талабаларни баҳолаш, бошқарув босқичларида).

Олтинчидан, соҳада мавжуд лавозимлар бўйича коррупциявий хавф-хатарларни таҳлил қилиш (ректор, проректор, ҳисобчи, ёки кафедра мудири).

§ 2.2. Республикамиз олий таълим соҳасида коррупциявий хавф-хатарларнинг келиб чиқиши омиллари

Олий таълим соҳасида коррупциявий хавф-хатарларни келиб чиқиши омилларини аниқлаш, уларни таҳлил қилиш жараёнидаги энг муҳим босқич ҳисобланади. Мазкур босқичда бутун тизимдаги маълумотлар умумлаштирилиб, турли усувларда таҳлил қилинади.

Ушбу параграфда мамлакатимиз олий таълим тизимидағи коррупциявий хавф-хатарларнинг келиб чиқиши омилларини амалий ва статистик маълумотлар асосида кўриб чиқамиз.

Олий таълим тизимидағи коррупция талабани ўқишига киришидан бошлаб, то диплом олишига қадар бўлган ҳар бир босқичда кўзга

ташланади, мазкур масалалар жуда кенг бўлгани сабабли энг долзарбларига тўхталиб ўтамиз.

І. Бюджет маблағларини талон-торож қилиш билан боғлиқ коррупциявий ҳукуқбузарлик омиллари.

Олий таълимга давлат томонидан ажратилган маблағлар микдори ошган сари бюджет маблағларини талон-торож қилиш билан боғлиқ ҳукуқбузарликлар ҳам ўсиб бормоқда.

Жумладан, соҳада 2019 йилда 16,7 млрд. сўмлик молиявий қонунбузарликлар аниқланган бўлиб, бу кўрсаткич 2018 йилга нисбатан 10,1 млрд. сўмга кўпайган ва тизимдаги 103 нафар мансабдор ҳамда масъул ходимлар жиноий жавобгарликка тортилган. Бюджет маблағлари талон-торож қилингани ҳолати бўйича Жиноят кодексининг 167-моддаси билан 52 нафар ходимга нисбатан 42 та жиноят иши қўзғатилган бўлиб, улардан 15 нафари раҳбар, 31 нафари ҳисобчи, 3 нафари моддий жавобгар шахс (ҳазиначи, омбор мудири ва бошқа) ҳамда 3 нафари бошқа лавозимда ишловчи ходимлар ҳисобланади¹.

Дастлабки тергов харакатлари ўтказилган 42 та жиноят ишлари ўрганилганда, айбдор шахслар томонидан бюджет маблағлари қуидаги пухта ишлаб чикилган жиноий усуслар ёрдамида толон-торож қилинаётгани аниқланди. Хусусан,

- 21 та жиноят ишида маблағлар иш ҳаки ва мукофот пулларини ҳисоблашда сунъий орттирилган кўрсаткичлар киритилган соҳта ҳужжатлар асосида талон-торож қилинган;
- 16 та жиноят ишида ойлик иш ҳақларини автоматлаштирилган тизимда ҳисболовчи (“Uzasbo”) компьютер дастурига асоссиз маълумотлар (аксарият: иш ҳақининг базавий ставкаларини орттириб кўрсатиш) киритиш;

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

– 3 та жиноят ишида ҳисобда турган мулкларни бегоналаштириш ҳамда муассасада жорий ва капитал таъмирлаш ишлари бажарилгани ҳақидаги ҳисбот хужжатларига аслида бажарилмаган иш ҳажмларини қўшиб ёзиш;

– 2 та жиноят ишида аслида муассасада ишламайдиган ходимларга сохта хужжатлар асосида иш ҳақи ҳисоблаш орқали.

Бюджет маблағларини талон-торож қилинишига қуйидаги омиллар сабаб бўлмоқда:

Биринчидан, қуи тизимда ишлаётган раҳбарларни бухгалтерия соҳасида етарли билим ва малакага эга эмаслиги ва молиявий масалаларга етарлича эътибор қаратилмаслиги ҳисобланади.

Ушбу тоифадаги жиноятлар муассаса ҳисбчилари томонидан ишлаб чиқилган иқтисодий жиноий схемалар асосида содир этилмоқда ва мазкур ҳолатда раҳбарнинг молиявий билимсизлиги ҳисбчиларга учун имконият яратмоқда.

Иккинчидан, Ўзбекистон Республикаси Президентининг 2017 йил 21 августдаги “Таълим ва тиббиёт муассасаларини молиялаштириш механизмини ҳамда давлат молиявий назорати тизимини янада такомиллаштириш тўғрисида”ги Карори жроси вазирлик ва унинг тизимида ташкил этилган ички аудит ва молиявий назорат хизматлари томонидан бажарилмаяпти.

Хусусан, мазкур қарорга асосан таълим ва тиббиёт муассасаларида ички аудит ва молиявий назорат хизматларини ташкил этишдан асосий мақсад давлат бюджетидан ажратилаётган маблағларни мақсадли сарфланишини таъминлаш, бюджет қонунчилигига риоя этилишини профилактика қилиш ҳисобланади.

Бироқ, муассасаларда замонавий ахборот технологиялари воситалари ёрдамида (“Uzasbo”) бюджет маблағларини сарфланиши устидан даврий назорат ташкил этилган бир вақтда, бюджет қонунчилигини бузиш ҳолатларини олдини олишга қаратилган давлат молиявий назоратининг энг устувор вазифалари тўлиқ амалга оширилмаяпти.

Учинчидан, иш ҳақи ва бошқа тўловларни ҳисоблаш инсон омилига боғлиқ бўлиб, дастурга ҳисобчи томонидан маълумотлар киритиш имконияти чекланмагани, доимий назоратга олинмагани сабабли молиявий маълумотлар тўғрилиги фақат даврий текширувда аниқлаш мумкин.

Иш ҳақи ва бошқа маблағларни тўлаш бевосита ходимга оид буйруқларга боғлиқ бўлишига қарамасдан иш ҳақи дастурига ходимлар бўлими электрон тарзда боғланмаган, дастурга буйруқ ва бошқа иш ҳақини тўлаш учун асос бўладиган ҳужжтларни электрон шаклини юклаш ташкил этилмаган, молиявий назорат органларида доимий электрон назорат воситаси мавжуд эмас.

Тўртинчидан, бюджет маблағлари ва моддий ресурсларни тасарруф этишда, давлат харидларини амалга оширишда мутлоқ ваколат раҳбар ва ҳисобчилар қўлида бўлиб, мазкур фаолият устидан жамотчилик назорати, очиклик ва шаффоффликни таъминловчи манфаатдор шахслардан шакллантирилган иституционал тузилмалар мавжуд эмас.

Жумладан, муассасага турли ускуналар, жихозлар ва ўкув ресурсларини сотиб олиш, қурилиш ҳамда капитал таъмирлаш ишларини олиб боришда давлат маблағлари молия ташкилоти мансабдорлари, муассаса раҳбари, ҳисобчиси, қурилиш бўйича мутахасис, хўжалик бўлими мудири ходимлари ўртасида турли тизимли жиноий механизмлар асосида талон-торож қилинмоқда.

Бешинчидан, ОТМни ўзини-ўзи молиявий таъминлаш жорий этилмаганлиги давлат бюджети маблағларини ўзлаштиришнинг асосий сабабларидан бири ҳисобланади.

Вазирлар Маҳкамасининг 2019 йил 3 декабрдаги “Олий таълим муассасаларини босқичма-босқич ўзини ўзи молиялаштириш тизимига ўtkазиш тўғрисида”ги 967-сонли қарори билан 2020 йил 1 январдан бошлаб, тажриба-синов тариқасида 10 та ОТМга ўзини ўзи молиялаштириш тизимига ўтишга рухсат берилди¹.

¹ Конун ҳужжатлари маълумотлари миллий базаси, 04.12.2019 й., 09/19/967/4107-сон.

II. Кириш имтиҳонлари билан боғлиқ коррупциявий хуқуқбузарлик омиллари.

Ўтган 2018-2019 йиллар давомида ўқишига киритиб қўйиш важи билан 58 нафар олий таълим ходимлари тамагирлик қилган.

Тезкор маълумотларга кўра, ўқишига киритиши учун талаб қилинаётган пора миқдори 1 мингдан 10 минг АҚШ доллариғача бўлиб, порапхўрлик асосан сиртқи, кечки, маҳсус сиртқи ва иккинчи мутахассислик йўналишларига қабул қилишда кенг тарқалган.

Хусусан, Самарқанд иқтисодиёт ва сервис институти ўқитувчиси “А” фуқаро “Б”ни институтнинг бухгалтерия факультети сиртқи йўналишига ўқишига киритиши учун 10 минг АҚШ доллари олган вақтда ушланган.

Ижодий имтиҳонлар топшириш жараёнида ҳам кўплаб суистеъмоллик ҳолатларига йўл қўйилмоқда.

Жумладан, Фарғона давлат университети ўқитувчиси “А”, университет қабул комиссияси фаолиятида иштирок этганлигидан фойдаланиб, фуқаро “Б”ни жисмоний маданият йўналишига ўқишига кириши учун ижодий имтиҳондан юқори балл қўйдирив бериш эвазига 6 минг АҚШ доллари олган вақтда ушланган.

Олий ўқув юртлари талабалари ҳам турли жиноятларга қўл ураётган бўлиб, сўнгги икки йилда 21 нафар талаба ёшлар бундай жиноятларга аралашгани сабабли жавобгарликка тортилган.

Масалан, Андижон давлат тиббиёт институти 5-босқич талабаси “А” фуқаро “Б”ни институт раҳбарлари орқали ўқишига киритиб қўйиш учун 12 минг АҚШ доллари олган вақтида қўлга олинган¹.

Давлатимиз раҳбарининг қарорлари билан 2018 йил 1 сентябрдан бошлаб, хорижий ўқув юртлари билан ҳамкорликда талабаларни ўқитиш ва икки томонлама тан олинадиган диплом бериш амалиёти жорий этилди. Ҳозирда 55 та олий ўқув юртларида хорижий ҳамкорлар билан 83 та

¹ Коррупцияга қарши курашиш бўйича Республика Идоралараро комиссиясининг йиғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

бакалавриат ва 64 та магистратура йўналишларида кадрлар тайёрланмоқда. Афсуски, бу жараёнда ҳам турли сустеъмолликларга йўл қўйилмоқда.

Мисол учун, Тошкент тўқимачилик ва енгил саноат институтининг “Пахта саноати технологияси” факультети декани ўринбосари “А” фуқаро “Б”ни “Косигин” номидаги Россия давлат университети билан ҳамкорликда ташкил этилган қўшма факультетга киритиб қўйиш эвазига 3,5 минг АҚШ доллари олгани вақтда ушланган.

Тошкент шаҳридаги 4 та Россия билан қўшма факультетларда талабаларнинг рус тилини билиш даражаси ўрта мактаб дастурлари асосида ўрганилганда, натижалар ўта қониқарсиз бўлган.

Хусусан, Тошкент тўқимачилик ва енгил саноат институти қўшма факультетининг синовда иштирок этган талабаларидан 75 фоизи диктантдан “қониқарсиз” баҳо олган бўлиб, рус тилида таълим олаётган 2-курс талабаси, ўз фамилияси, институт ва факультет номини тўғри ёзиб бера олмаган ва диктантдаги жами 113 та сўздан бор-йўғи 4 тасини тўғри ёзган. Ваҳоланки, бу факультетларга кириш имтиҳонлари рус тилида ўтказилган, дарслар рус тилида олиб борилади, бу талабалар ўқишининг кейинги 2 йилини Россияда давом эттириши керак¹.

Юқоридаги коррупциявий ҳуқуқбузарликларни келиб чиқишига куйидаги омиллар сабаб бўлмоқда.

Биринчидан, кириш имтиҳонлари, яъни тест синовлари эскирган бўлиб, асосан ёдлаш ва хотирада сақлаш қобилиятига асосланган. Бу айниқса, ижтимоий ва табиий фанлар йўналишларида кенг тарқалган. Тест синовлари номзоднинг дунёқариши, мантиқий фикрлаш қобилиятлари, умуман олганда соф билим даражасини белгилаб бера олмайди.

Иккинчидан, тест синовларига талабалардан кўп маълумотларни ёдлаш талаб этилгани уларни ўз билимларига ишонмасликка, имтиҳон адолатли

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

бўлмаслиги ҳақида тасаввурлар шаклланишига олиб келмоқда ва бу уларни, ота-оналарни ўқишига киришда ноқонуний йўлларидан фойдаланишига унダメоқда.

Учинчидан, мамлакатимизда кириш имтиҳонлари компьютер технологиялари асосида ўтказилмайди, талаба ўз имтиҳон натижасини маълум муддат ўтгандан сўнг билади. Имтиҳонлар натижаларини текшириш инсон омилига боғлиқлиги, албатта, коррупциявий ҳолатларга сабаб бўлади.

Тўртинчидан, кириш тест синовлари видео тасвирга олинаётган бўлсада, айрим ижодий имтиҳонларни тасвирга олиш, уни сақлаш талаблари умуман мавжуд эмас. Спорт, амалий санъат бўйича имтиҳонлар сифатли видео тасвирга олинмагани сабабли аризаларни тўлиқ ўрганиш имконияти бўлмаяпти.

Бешинчидан, мамалакатимизда олий таълимнинг қамров даражаси паст бўлиб, 2019 йилда бу кўрсаткич 20 фоизни ташкил этмоқда ва рақобат кучлилиги номзодларни барча имкониятлардан фойдаланишига унダメоқда.

Олтинчидан, имтиҳонларни қисқа муддатда жуда кўп номзодлар иштирокида ўтказилиши назорат сифатига салбий таъсир қилиб, коррупциявий ҳуқуқбузарликлар содир этишга имкон яратмоқда.

Еттинчидан, ДТМни назорат қилиш тартиб ва қоидалари аниқ белгиланмагани сабабли ДТМ фаолиятида ҳисобдорлик, очиқлик ва ошкоралик мавжуд эмас.

III. Таълим бериш жараёни билан боғлиқ коррупциявий ҳуқуқбузарлик омиллари.

Ўтган 2019 йилда 11 нафар мансабдор шахс таълимни тўлиқ ўзлаштиргаган талabalарга ижобий баҳо қўйиб бериш билан боғлиқ жиноятлар содир этилган¹.

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш ахволи ва қонунийликни таъминлашга доир масалалар” – 2019 йил 18 январь.

Масалан, Наманган муҳандислик-қурилиш институтининг ўқув ишлари бўйича проректори “А” ўқитувчи “Б” билан жиноий тил бириктириб, З та фандан имтиҳондан ўта олмаган талаба “С”га баҳоларини қўйдирив бериш эвазига 300 АҚШ доллари ва 945 минг сўм олган вақтида ушланган.

Талабаларга таълим бериш жараёнида коррупциявий ҳукуқбузарликлар содир этилишининг асосий омиллари қўйидагилардан иборат.

Биринчидан, мазкур турдаги ҳукуқбузарликларнинг сонига қараб, бу турдаги жиноятлар кам деб хулоса қилиш нотўғри бўлади. Зеро, мазкур жиноятларни аниқланиш даражаси жуда паст.

“Ижтимоий фикр” жамоатчилик Маркази томонидан 2018 йилда ўtkazilgan сўровда 29 фоиз, 2019 йилда ўtkazilgan сўровномада 35 фоиз иштирокчилар олий таълим тизимида коррупция кенг тарқалганлигини эътироф этган¹.

Иккинчидан, таълим бериш жараёнида талабаларни баҳолаш тизими тўлиқ инсон омилига боғлиқ бўлиб, бу ўқитувчиларда манфаатдорлик ҳолатларини келтириб чиқаради.

Учинчидан, ОТМни зарур моддий ресурслар билан тўлиқ таъминланмаслиги таълим сифатига салбий таъсир қилмоқда ва бу коррупциявий ҳолатларни келиб чиқишига сабаб бўлмоқда.

Олий ўқув юртлари замонавий ҳамда таълим тилидаги дарслик ва ўқув адабиётлари билан етарли даражада таъминланмаган.

Таҳлиллар, ОТМда ўқув режаларидаги фанларнинг 24 фоизи бўйича дарслик, ўқув қўлланма ва услугий қўрсатмалар мавжуд эмаслигини кўрсатмоқда.

ОТМда ўқитилаётган айрим дарслик ва ўқув қўлланмалари маънан эскириб, ҳозирги замон талабларига жавоб бермайди.

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш ахволи ва қонунийликни таъминлашга доир масалалар” – 2019 йил 18 январь.

Масалан, Тошкент автомобиль йўллари институтидаги мавжуд 351.417 та ўқув адабиётларининг 59 фоизи 1991 йилга қадар нашрдан чиққан.

Ваҳоланки, Вазирлар Маҳкамасининг 2018 йил 10 октябрдаги 816-сонли қарорига биноан ўқув адабиётларини янгилаб бориш учун соҳасига қараб 5 йилдан 10 йилгача муддат белгиланган.

Тўртинчидан, ахборот-коммуникация технологияларини таълим ва имтиҳон жараёнларига жорий этишдаги талаб даражасида эмас.

Мисол учун, ОТМнинг 14 тасида электрон кутубхонадан онлайн фойдаланиш имконияти яратилмаган, 18 тасида барча фанлар бўйича электрон ресурсларни марказга жойлаштириш тўлиқ амалга оширилмаган.

Халқаро тажрибада масофадан ўқитиш тизимидан кенг миқёсда фойдаланилаётган бир пайтда, ОТМда электрон платформа орқали таълим беришга етарли эътибор берилмаяпти.

Айрим олий ўқув юртларида ҳанузгача компьютер етишмовчилигига барҳам берилмаган бўлиб, жумладан Бухоро давлат университети 60 фоиз талabalari компьютер билан таъминланмаган.

Бешинчидан, таълим сифатининг пастлиги асосий коррупциявий омиллардан бири бўлиб қолмоқда.

Таълим сифатини назорат қилиш инспекцияси томонидан 2019 йилда 22 та ОТМларда таълим сифати бўйича ўтказган текширишидан 13 таси шартли равища ўтказилган бўлса, 1 таси ўта олмаган¹.

Таълим сифатига айрим профессор-ўқитувчиларнинг билим даражаси ҳам салбий таъсир кўрсатмоқда. Мутахассислар етишмагани сабабли профессор-ўқитувчилар томонидан таянч маълумоти тўғри келмаган фанлардан дарс ўтиш ОТМдаги энг оғриқли масалалардан бўлиб қолмоқда.

Олтинчидан, ОТМ ўқув дастурида номутахассислик фанларини жуда кўплиги коррупциявий омиллардан бири бўлмоқда.

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

Талабалар ўзлари қизиқмаган, ўз келажак фаолиятлари учун зарур бўлмаган фанларни ўқимаслиги, бунинг натижасида имтиҳон жараёнида мазкур фанлардан коррупциявий усулларни қўллаб баҳо олишга уринадилар.

Давлат раҳбари томонидан 2020 йил 24 январь куни Олий Мажлисга йўллаган мурожаатномада, олий таълим стандартлари хорижий тажриба асосида такомиллаштирилиши, таълим йўналишлари ва ўқитиладиган фанлар қайта кўриб чиқилиши, мутахассисликка алоқаси бўлмаган фанлар сони 2 баробар қисқартирилишини таъкидлаб ўтилди¹.

IV. Талабалар ўқиш жойини кўчириш, ўқиш йўналишини ўзгартириш ҳамда ўқишга қайта тиклаш билан боғлиқ коррупциявий ҳуқуқбузарлик омиллари.

Талабалар ўқиш жойини кўчириш, ўқиш йўналишини ўзгартириш ҳамда ўқишга қайта тиклаш жараёни коррупциявий ҳуқуқбузарлик содир этилиши кўлами бўйича ўқишга киритиш ва таълим жараёнидаги коррупциядан кейинги ўринда туради.

Мазкур ҳуқуқбузарликларни мавсумий асосда содир этилиб, талабалар учун манфаатдорлик хусусияти юқорилиги сабабли пора миқдори катта бўлади.

Жумладан, Фарғона политехника институтининг ўқув-услубий бошқармаси бошлиғи “А” юқори лавозимда ишловчи танишлари орқали 1-босқич талабаси “Б”нинг ўқишини “қурилиш” йўналишидан “иқтисодиёт”га йўналишига кўчириб бериш эвазига 3 минг АҚШ доллари олган вақтда қўлга олинган.

Шунингдек, 2019 йилда Ўзбекистон давлат жаҳон тиллари университетига ўқишини қўчирган 3 нафар талаба мутахассислиги мос бўлмасада, қонунга зид равишда ўқишга қабул қилинган².

¹ Интернет манзили: <http://aza.uz>.

² Коррупцияга қарши курашиш бўйича Республика Идоралараро комиссиясининг йиғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

Мазкур жараёнда коррупциявий ҳуқуқбузарликлар содир этилишига сабабчи бўлган омилларни кўриб чиқамиз.

Биринчидан, талабалар ўқиш жойини қўчириш, ўқиш йўналишини ўзгартириш ҳамда ўқишга қайта тиклаш жараёнларининг очиқ ва ошкора ўтказилмаётгани.

Иккинчидан, Вазирлар Маҳкамасининг 2019 йил 20 июнда қабул қилинган “Олий таълим муассасаларига ўқишга қабул қилиш, талабаларни қўчириш, қайта тиклаш ва ўқишдан четлаштириш тартиби тўғрисидаги низомларни тасдиқлаш ҳақида”ги 393-сонли қарорида жараён тартиби аниқ кўрсатилмаган.

Жумладан, мазкур Низомнинг 4-бандида, олий таълимнинг турдош таълим йўналишлари рўйхати Олий ва ўрта маҳсус таълим вазирлиги томонидан ишлаб чиқилиши ва таълим муассасаларига ўқишга қабул қилиш бўйича Давлат комиссияси томонидан тасдиқланиши белгиланган. Турдош таълим йўналишини қарорда аниқ кўрсатилмасдан ҳаволанки нормага йўналтирилиши коррупциявий омиллардан бири бўлмоқда.

Олий таълим соҳасида коррупциявий ҳуқуқбузарликларни содир этилишига сабабчи бўлган омилларни турли асосларга қўра таснифлаш мумкин.

Хусусан, мазкур омилларни хусусиятлари умумийлигига кўра: **иқтисодий, ижтимоий, сиёсий ва маънаний** омилларга бўлиш мумкин. Ҳар бир омилларни амалий мисоллар ёрдамида кўриб чиқиш уларнинг туб моҳиятини англашга ёрдам беради.

Иқтисодий омиллар ҳар доим муҳим аҳамиятга эга бўлиб, таълим соҳаси ҳам бундан мустасно эмас. Хусусан, ойлик маошни кўтариш, ОТМни зарур моддий-техник ашёлар билан таъминлаш, янги бинолар қуриш ёки мавжудларини реконструкция қилиш фаолияти иқтисодий омиллар билан боғлиқ.

Сиёсий омиллар соҳадаги коррупцияга қарши қурашиш амалдаги ҳукуматнинг асосий мақсад ва вазифалари билан боғлиқ бўлади. Агар

хукумат томонидан олий таълим соҳасини “коррупциядан ҳоли” соҳага айлантириш мақсади билан кенг кўламли ислоҳотлар амалга ошириш чоралари кўрилмаганда эди, бу борада ижобий натижаларга эришиш деярли имконсиз бўларди. Шунингдек, давлатда ўрнатилган сиёсий тартиб хусусияти хам коррупциявий ҳолатларни келиб чиқишига сабаб бўлиши мумкин. Масалан, халқаро тарихий тажриба демократик бошқарув тартиби коррупцияни камайишига, авторитар ва анархия бошқарув тартиби эса унинг кенг тарқалишига хизмат қилган.

Ижтимоий қўллаб-қувватлаш барча соҳаларда бўлгани каби олий таълим соҳасида ҳам мавжуд. ОТМга киришда ижтимоий қўллаб-қувватлаш мақсадида 10 та тоифа бўйича имтиёзлар берилган бўлиб¹, булар бир тарафдан ижобий қўллаб-қувватлаш бўлса, иккинчи тарафдан ушбу имтиёзларга эга бўлиш жараёнига коррупция аралашиши мумкин.

Маънавий омиллар коррупцияга қарши курашишда муҳим аҳамиятга эга, чунки аҳолида коррупцияга қарши муросасиз муносабат шакллантириш самарали чоралардан бири ҳисобланади. Президентимизнинг 2020 йил 24 январь куни Олий Мажлисга йўллаган мурожаатномасида, коррупцияга қарши курашишда аҳолининг барча қатламлари, энг яхши мутахассислар жалб қилинмас экан, жамиятимизнинг барча аъзолари, таъбир жоиз бўлса, “ҳалоллик вакцинаси” билан эмланмас экан, ўз олдимизга қўйган юксак марраларга эриша олмаймиз. Биз коррупциянинг оқибатлари билан курашишдан унинг барвақт олдини олишга ўтишимиз керак, деб таъкидлаб ўтдилар².

ІІІ БОБ. ОЛИЙ ТАЪЛИМ СОҲАСИДА КОРРУПЦИЯВИЙ ХАВФ-ХАТАРЛАРНИ БАРТАРАФ ЭТИШ МАСАЛАЛАРИ

§ 3.1. Олий таълим соҳасида коррупцияга қарши курашишда Украина ва Грузия тажрибаси

¹ Конун ҳужжатлари маълумотлар миллий базаси 09/19/1046/4242-сон.

² Интернет манзили: <http://uza.uz>.

Маълум соҳада ислоҳотларни амалга оширишда хорижий давлатлар тажрибасини ўрганиш фойдадан ҳоли бўлмайди. Шунинг учун, Украина ва Грузиянинг олий таълим соҳасидаги коррупцияга қарши курашиш билан боғлиқ ижобий тажрибаларини кўриб чиқамиз.

Украина. Украина Республикаси Конституциясининг 53-моддасида, ҳукумат мактабгача, умумий ўрта, касбий ва олий таълим олиш учун давлат ва хусусий муассасаларга эркин киришни кафолатлаши белгиланган. Украина собиқ Президенти Виктор Ющенко давлат университетларида коррупцияни тўхтатишга, ректор ва профессорларни кириш имтиҳонларида порахўрлик ва кранизм ҳолатларига йўл қўймасликка чақириб, мавжуд вазиятни шармандалик сифатида баҳолаган¹.

Украинада 1995-2012 йиллар эски Совет олий таълим тизимидан чиқиши ва янги тизимни яратиш даври ҳисобланади. Фуқаролар урушидан сўнг давлатда катта ва шиддатли ислоҳотлар амалга оширилган бўлиб, уларнинг кўпчилиги олий таълим тизими билан боғлиқ.

ОТМга мустақиллик бериш соҳадаги асосий ислоҳотлардан бири бўлди. Бироқ, университетларга мустақиллик бериш Совет иттифоқи таркибида бўлган Украина учун янги ҳодиса бўлгани сабабли ривожланган давлатлар амалиётини жорий этиш жуда секин амалга оширилди. Украина 1999 йил 19 июнда қабул қилинган Болония Декларациясига 2005 йилда Берген Декларациясини имзолаш орқали қўшилди. Академик доира вакиллари ва талабаларни инглиз тилини билмаслиги ОТМда коррупцияни мавжуд бўлишининг асосий сабабларидан бири бўлди. Зоро, улар инглиз тилидаги ривожланган давлатларнинг коррупцияга қарши кураши бўйича ижобий тажрибалари билан танишиш имкониятидан маҳрум эди².

¹ Williams B, “Ukraine chief assails corrupt admissions” The Chronicle of Higher Education, 8 July, 2005, p – 33.

² Osipian A, “University autonomy in Ukraine: Higher education corruption and the state”, Communist and Post-Communist Studies journal homepage: 28 June 2017, p – 236.

Таълим вазири Сергей Квитнинг фикрича, Украина олий таълими ва меҳнат бозори ўртасидаги боғлиқлик мавжуд эмас, чунки талабалар давлат учун зарур бўлмаган касбларга ўқимоқда. Мамлакатда табиий, технология ва мухандислик йўналишидаги мутахассисларга эҳтиёж бўлган вақтда кўпчилик талабалар иқтисод ва юристлик соҳаларини танлашмоқда¹.

Украинада 2014 йил 1 июлда “Олий таълим тўғрисида”ги Қонунни қабул қилиниб, олий таълим соҳасида давлат сиёсатининг асосий принципларини белгилади.

Таълим ва фан вазирлиги мамлакатда олий таълим бўйича етакчи ижро органи бўлиб, асосий вазифаси олий таълим соҳасида миллий стратегия ва дастурларни белгилаш ҳамда ижро этиш ҳисобланади.

Олий таълим сифатини таъминлаш Миллий агентлиги соҳада таълим сифатини таъминловчи доимий вакиллик органи бўлиб, ҳар йили таълим сифати бўйича ҳисобот тайёрлайди ва қонунчиликка таклифлар беради. Мазкур агентлик 23 нафар ходимдан иборат бўлиб, Вазирлар Маҳкамаси томонидан ўtkaziladigan tanlov asosida shakllanтирилади. Агентликни ташкил этилиши Болония Декларацияси тавсияларига мувофиқ эмас, лекин коррупциявий ҳолатларни инобатга олган ҳолда Украина ўзига хос ислоҳот йўлини танлади, яъни таълим стандартларини Болония тавсияларига мослаштириш билан бирга ўзгаришлар даврида назорат функциясидан ҳам фойдаланди.

Олий таълим сифатини баҳолаш мустақил нодавлат ташкилотлар томонидан ҳам амалга ошириши мумкин бўлиб, бу ташкилотлар Агентлик томонидан аккредитациядан ўtkaziladi. Нодавлат ташкилотлар хизматидан фойдаланиш ОТМ учун ихтиёрий бўлиб, ташкилот ОТМ текширгани ҳакида сертификат беради².

“Олий таълим тўғрисида”ги Қонун билан ОТМни аккредитациядан ўтказишнинг янги тартиби белгиланди. Ўтган 2010-2015 йилларда 154 та

¹ British Council Higher Education in Ukraine: Briefing Paper, 2015, p – 6.

² Sofiya Nikolaeva, “Ehe Bologna process in Ukraine: the decade anniversary” General and Professional Education 2015 p – 66-74.

ОТМ ёпилган бўлса, шулардан 46 таси 2010-2013 йилларда, 108 таси 2014-2015 йилларда ёпилган ва ушбу рақамлар ҳам янги аккредитация тартиби қатъий эканлигини кўрсатмоқда.

Шунингдек, 2016 йилда Украина Қабул Маркази ташкил этилиб, унинг асосий вазифаси хорижий талабалар ва хорижда ўқимоқчи бўлган талабаларга кўмаклашиш хисобланади. Марказ хусусий ташкилот бўлиб, мамлакат миқёсида 16 филиаллари мавжуд. Марказ 2016 йил 14 майда ташкил этилган бўлсада, бир ой ичидаги унга 1500 та аризалар келиб тушган. Украина тажрибасига таянган ҳолда Россия, Грузия, Польша ва Қозогистон давлатлари ҳам мазкур турдаги марказларни ташкил қилди¹.

Олий таълим соҳасида Ягона электрон маълумотлар базаси яратилиб, мазкур базада ОТМ рўйхати, олий таълим бўйича ҳужжатлар, баҳолаш сертификатлари рўйхати ва талабалар рўйхати ва бошқа маълумотлар мавжуд. Электрон база Таълим ва фан вазирлиги томонидан юритилиб, маълумотларни олиш барча учун очик ва текин. Таъкидлаш керакки, Марказ фойдаланувчиларга фақат маълумотларни олиш ва хуқукий ёрдам кўрсатиш борасида хизмат кўрсатади, лекин ариза ва шикоятларни кўриб чиқмайди.

“Олий таълим тўғрисида”ги Қонунда олий таълим даражалари белгилаб қўйилган бўлиб, улар қўйидагилар:

- бошланғич даража (кичик бакалавр);
- биринчи ёки бакалавр даражаси (бакалавр);
- иккинчи ёки магистратура даражаси (магистр);
- учинчи ёки ўқув-илмий ёхуд ўқув-ижодий (фалсафа доктори);
- тўртинчи ёки илмий даража (фан доктори).

ОТМ ташкилий хуқукий шаклига қўра: бюджет муассасалари, нотижорат муассасалар, фойда олишга йўналтирилган муассасалари; тузилиши қўра: университет, академия (институт) ва коллеж каби турларга бўлинади.

¹ <https://en.wikipedia.org>.

Давлат ОТМлари қонун асосида, хусусий ОТМлари низоми асосида ўз ташкилий тузилишини эркин белгилайди. ОТМнинг ташкилий тузилиши Илмий Кенгаш қарори билан тузилиб, факультет, кафедра ва кутубхона каби бўлимлардан иборат бўлади¹.

ОТМга мустақиллик, академик ва кунлик фаолиятларини бошқариш хуқуқи берилди. Раҳбар таълим, тадқиқот, инновация, молиявий фаолият бўйича ОТМга ҳисобдор бўлиб, у беш йил муддатга академик ва бошқа ходимлар, талабалар вакиллари томонидан сайланади.

ОТМда Илмий Кенгаш, Кузатув Кенгashi, ишчи ва маслаҳатчи тузилмалар, Бosh Assambeleya каби демократик ва жамоавий бошқарув тузилмалари ташкил этилган ва талабалар ОТМ бошқарувида иштирок этади.

Украинада 2015-2016 йиллар давомида 288 та ОТМ мавжуд бўлиб, уларни 196 давлат, 12 таси маҳаллий ва 80 таси хусусий таълим муассасалари ҳисобланади. Мазкур муассасаларда 1.375.160 нафар талабалар ўқишига қабул қилинган бўлиб, уларнинг 68 фоизи кундузги таълимда ўқиса, 49 фоизи бюджет асосида таълим олади.

ОТМга тўртда турдаги босқичлар учун қабул жараёнлари бўлиб, булар бошланғич бакалавириат (2-3 йил), бакалавириат (3-4 йил), магистратура (1.5-2 йил), докторантурда (4 йил) босқичлари ҳисобланади.

“Олий таълим тўғрисида”ти Қонунга асосан 2016 йилдан бошланғич бакавриат ва бакалавриат босқичларига кириш учун 5 турдаги мезонлар асосида номзодлар қабул қилинган:

- 1) ўрта мактабни тугатиш Сертификат баҳолари бўйича;
- 2) Ташқи Мустақил Тест натижалари бўйича;
- 3) спорт ва санъат ва бошқа соҳалардаги қобилият бўйича;
- 4) илмий танловлар ғолиблари (олимпиада);

¹ “Law of Ukraine on higher education” July 1, 2014, <http://search.ligazakon.ua>

5) имтиёзли кириш ҳуқуқига эга тоифа¹.

Юқоридаги 1 ва 2-талабалар ўқишига имтиёзли киришга рухсат берилган номзодлардан ташқари барча учун мажбурий ҳисобланади. Спорт, санъат, архитектура ва бошқа соҳаларда алоҳида қобилиятга эга номзодлар қўшимча тестлар орқали танлаб олинса, илмий олимпиадағолиблари ОТМга 4-талаб бўйича қабул қилинади. Ҳарбий ходимлар, имконияти чекланганлар, Миллий олимпия терма жамоаси аъзолари ва бошқа имтиёзли қабул қилинадиган номзодлар тоифаси университет томонидан белгиланиб, уларнинг сони қўпи билан қабул қилиниши лозим бўлган талабаларнинг 5 фоизидан ошмаслиги керак.

Украинада олий таълим олишни ҳохловчилар сони бошқа давлатларга нисбатан кўп бўлгани ҳолда бу кўрсаткич 79 фоизни такшил этса, Польшада 72, Франция ва Германияда 60 фоизни, Буюк Британияда 57 фоизни ташкил этади. Шунингдек, ижтимоий сўровда атига 8 фоиз мактаб битувчиларининг ота-оналари уларни олий таълим олмаслигини билдирган. Давлат гранти учун жиддий рақобат мавжуд, чунки давлат талаба учун ўртacha 6000-12000 гривна ўқиш пули ва 800 гривна ойлик стипендия тўлайди. Давлат гранти бакалавр босқичида 9,2 фоизни, магистратура босқичида 14,7 фоизни ташкил қилиб, машҳур университетларга кириш учун жиддий кураш бўлади.

Ўтган 2008 йилда ҳар учтадан битта талаба ОТМга пора асосида кирган ва ўртacha 2000 нафар номзодлар тест саволларини олдиндан сотиб олиш йўлидан фойдалангани сабабли ҳукумат ўқишига киришда коррупцияни олдини олиш учун кириш имтиҳонларини марказлаштириди. Олий таълим сифатини таъминлаш Миллий агентлиги томонидан 2016 йилда 267.172 мактаб битиравчиларидан 12 та фан бўйича 1100 та худудий ва маҳаллий марказларда тест олинган. Тест топширган 2086 нафар номзодлар иштирокида ўtkазилган сўровда атига 6 фоиз номзодларгина имтиҳонга ишонмаслигини билдирган.

¹ OECD Reviews of Integrity in Education: Ukraine 2017. <https://read.oecd-ilibrary.org>.

Ўқишига кирмоқчи бўлган номзод ўз хоҳишига асосан кирмоқчи бўлган ОТМни тартиб билан кўрсатиши керак. Агар у биринчи ОТМга кира олмаса кейинги ўриндаги ОТМга кириши мумкин бўлади¹.

Бироқ, ОТМга имтиёзли асосда ўқишига кириш билан боғлиқ коррупциявий ҳолатлар кузатилган. Хусусан, миллий олимпиада терма жамоаси аъзолари ва олимпиада чемпионлари спорт ва жисмоний тартибия йўналишлари бўйича имтиҳонсиз, Чернобль жабрланучилари, уруш қатнашчилари фақат оғзаки сухбат асосида, чин етимлар имтиёзли баллар асосида ўқишига кириши мумкин бўлиб, улар ушбу имтиёзлардан соҳта ҳужжатлар тайёрлаш ёки имтиёз берувчи ҳолатларни сунъий юзага келтириш орқали фойдаланишга уринишган.

ОТМга ўқишига кириш имтиҳонларига алоҳида тўхталиб ўтиш лозим бўлади, чунки мазкур масала МДҲ давлатлари олий таълимининг энг оғрикли босқичи хисобланади. Украина кириш имтиҳонлари билан боғлиқ ислоҳотларни коррупциявий хуқуқбузарликларни келиб чиқишига хамоҳанг тарзда ўзгартириб борди².

Биринчидан, “Олий таълим тўғрисда”ги Қонунга 2015 йлда ўзгартириш киритилиб, эндиликда ОТМ тест натижаларидан ташқари балл бериладиган бошқа имтиёзли асосларни ва қабул қоидаларини ўз сайтида эълон қилиши белгиланди. Бу адолат ва холисликни кафолатламаган бўлсада, лекин номзодларга имкониятларини олдиндан баҳолаш имконини берди.

Иккинчидан, “Олий таълим тўғрисида”ги Қонунга ўзгариш киритилиб, ОТМга киришнинг аниқ тартиблари белгиланди. Таълим ва фан вазирлиги 2015 йил 22 декабрда “Махсус тартиб”ни қабул қилиб, имтиёзли ҳолатлар учун ОТМ томонидан бериладиган балларни мақсимал қатъий миқдорларини белгилади. Хусусан, 3 ёки 4 та маҳсус фан бўйича имтиҳон натижалари умумий баллининг камида 85 фоизини, ҳар бир фан бўйича

¹ OECD Reviews of Integrity in Education: Ukraine 2017. <https://read.oecd-ilibrary.org>.

² OECD Reviews of Integrity in Education: Ukraine 2017. <https://read.oecd-ilibrary.org>.

бериладиган баллар умумий баллни энг камида 20 фоизини ташкил этиши, миллий даражадаги спорт ва санъат йўналишлари бўйича ғолиб бўлган номзодларга бериладиган баллар умумий баллнинг 25-50 фоизи оралиғида бўлиш кераклиги, улардан иккита фан бўйича олинадиган имтиҳон баллари умумий баллининг 20 фоизидан кам бўлмаслиги, ўрта мактабни тугатиш Сертификат баҳолари бўйича бериладиган баллар умумий баллнинг 10 фоизидан кўп бўлмаслиги, фан бўйича мусобақа ғолибларига бериладиган баллар умумий баллнинг 5 фоизидан ортиқ бўлмаслиги белгиланди.

Учинчидан, 2016 йилдан номзодларга давлат грантларини қидириб танлаш имконияти яратилиб, эндиликда номзод тартиб асосида имтиҳон фанлари мос келувчи 15 та ОТМга ҳужжат топшириши мумкин. Бу тартиб талабаларга давлат грантида ўқиш учун қўшимча имконият яратиш билан бирга давлатга меҳнат бозори талабларини таъминлайди.

Кириш имтиҳони босқичидаги коррупцияни марказлашган тест тизимини яратиш орқали камайтиришга эришилди. Ташқи мустақил тест тизими 2015 йилда ташкил этилиб, имтиҳон 12 та мактаб ўқув дастури фанларидан ёзма шаклда олинадиган имтиҳон ҳисобланади. Тестлар олий таълим сифатини таъминлаш Миллий агентли томонидан яратилиб, саволлар миллий ўқув дастуридаги фанлар доирасида, олий таълим учун муҳим бўлган жихатларни инобатга олган ҳолда тузилади ва халқаро ижобий тажрибалар асосида такомиллаштирилади.

Ўтказилган сўровномада талабалар ва ота-оналарнинг 65 фоизи тест тизимни ташкил этишни мақуллаган бўлса, 58 фоизи тизим коррупцияни камайтиришини таъкидлаган.

Агентлик тестларни ўтказишга масъул бўлиб, тест саволлари қучли назорат остида чиқарилади ва муҳрланади. Номзодлар интернет орқали рўйхатдан ўтгандан сўнг агентлик уларга имтиҳон жойи ва вақти ҳақида ёзма хабар, маҳсус код ёзилган имтиҳонга кириш рухсатномасини жўнатади. Имтиҳон алоҳида ҳонада 15 нафар номзодлар иштироқида,

2 нафар фан бўйича номутахассис ходимлар томонидан назорат қилинади. Тест саволлари имтиҳондан 2 соат аввал кузатувчилар томонидан муҳрлаган ҳолда берилади ва тест талабалар қарори билан улардан бири томонидан барчанинг иштирокида очилади. Талабалар ноқонуний усуллар фойдаланган тақдирда имтиҳондан четлатилади. Имтиҳондан сўнг тестлар йиғилади ва текшириш учун жўнатилади. Имтиҳон натижалари агентлик сайтида эълон қилинади¹.

Магистратурага кириш учун ташқи имтиҳон топширилмайди ва қабул қоидалари ОТМ томонидан белгиланади. Номзодлар инглиз тили ва танлаган йўналишлари бўйича маҳсус фандан тест топширади. Магистратура имтиҳонлари марказлашмагани сабабли коррупциявий ҳолатларга кенг йўл очади. Айрим ОТМда магистратура босқичи учун кириш имтиҳонлари мавжуд эмас, номзодлар бакалавр босқичининг ўртacha бхолари асосида қабул қилинади. Коррупциявий ҳолатларни инобатга олиб, соғлиқни сақлаш, фарматцефтика ва ветеренария соҳалари бўйича олий таълим сифатини таъминлаш Миллий агентли томонидан ўтказиладиган ташқи тест натижаларига асосан магистратура босқичига қабул қилиш белгиланди².

Бироқ, номзодлар магистратурага кириш имтиҳони талаблари очик эълон қилинмаслиги, шунинг учун, ОТМ мансабдорлари магистратурани дўстларига совға, сиёсий ҳомийларга пора сифатида берилишини таъкидлаган.

“Олий таълим тўғрисида”ги Қонунда ОТМ талабаларни ётоқхона билан таъминлаши кафолатланган бўлсада, лекин улар 40 фоиз талабани ётоқхона билан таъминлаш имкониятига эга. Талабаларни ётоқхона билан таъминлаш умумий тартибга солинмагани ва якка шахслар томонидан бошқарилиши коррупциявий ҳолатларга сабаб бўлган. Ижтимоий сўровномада 6.4 фоиз талабалар пора эвазига ётоқхона олишларини

¹ OECD Reviews of Integrity in Education: Ukraine 2017. <https://read.oecd-ilibrary.org>.

² OECD Reviews of Integrity in Education: Ukraine 2017. <https://read.oecd-ilibrary.org>.

билдирган. Ётоқхона билан боғлиқ коррупциянинг асосий сабаби жой етишмовчилиги ҳисобланади.

Грузия. Сўнги йилларда Грузия Республикаси олий таълим соҳасида коррупцияга қарши қурашиш борасида ижобий ислоҳотларни амалга оширишга эришди. Марказлашган бошқарувдан қочиш ва бозор муносабатларига ўтиш олий таълим ривожланишининг асоси бўлди.

Коррупция таълимнинг учта энг мухим мақсадига тўсқинлик қиласди: таълим олиш имконияти, тенглиги ва сифатига¹. Грузия олий таълим соҳасида ислоҳотларни амалга оширишда айнан шу учта салбий оқибатларни олдини олишга таянди: 1) олий таълимга адолатли йўл билан эришишни таъминлаш учун Ягона Миллий кириш имтиҳон тизимини ташкил этди ва аҳолининг ижтимоий ҳимояга муҳтож қатламига алоҳида давлат грантлари ажратди; 2) таълим сифатини юқори даражада сақлаш учун ОТМни аккредитациядан ўтказишни қатъий тартибини белгилади; 3) таълим олишда тенгликка ва самарадорликка эриш учун академик ва маъмурӣ ходимларни қайта шакллантириш масаласини кўриб чиқди².

Эркин ахборотлар ривожланиш институти томонидан (Institute Development of Freedom Information) Грузия ижро органлари очиқлиги ўрганилганда, унда Таълим ва фан вазирлиги энг ёпиқ вазирликлар рўйхатида учинчи ўринни эгаллаган. Бунинг сабаби, институт 10 ОТМга имтиёзлар, иш ҳақи қўшимчалари, талабалик мақомидан маҳрум бўлганлар сони ҳақида оддий маълумотларни сўраб йўллаган 190 та мурожаат хатларига рад жавоб олган. Ҳукумат ошкоралик масаласидаги танқидий фикрларни тўғри баҳолаб, фаолиятни очиқ ва ошкоралигини таъминлашга алоҳида эътибор қаратди.

Грузияда 2004 йилдан ОТМни талабалар сонига мувофиқ равишда молиялаштиришни бошлади, 2006 йилдан 100 фоизли грантлардан

¹ Orkodashvili M. “Corruption, Collusion, and Nepotism in Higher Education and the Labor Market in Georgia”, European Education, 2011, p – 32-53.

² Orkodashvili M. “Corruption in Higher Education: causes, consequences, reforms. The case of Georgia”, 2009, p – 31, Electronic copy available at: <http://ssrn.com/abstract>.

ташқари 30, 50, 70 фоизли грантлар жорий этилди, 2009 йилдан магистратура босқичи учун ҳам грантлар ажратди, 2009 йилда давлат ва хусусий ОТМларида алоҳида ректорлари кенгаши ташкил этди. Мамлакат 2014 йилда олий таълим сифатини таъминлаш бўйича Европа ассоцациясига аъзо бўлди.

Давлат меҳнат бозори талабига асосан зарур мутахассислар талаб этиладиган соҳаларни молиялаштириди. Масалан, 2013 йилда кишлок хўжалиги, табиий фанлар, муҳандислик ва қурилиш соҳалари бўйича тўлиқ грантлар жорий этди.

Ҳукумат талабаларга уларни ижтимоий ҳолатидан (етимлар, уруш жабраланувчилари) келиб чиқсан ҳолда стипендиялар ажратади. “Олий таълим тўғрисида”ги қонунга кўра, 6-10 фоиз стипендиялар ижтимоий ҳимояга муҳтоҷ талабалар учун ажратилиши керак.

Олий таълим тизимида коррупцияга қарши кескин кураш олиб борилиб, 2004-2013 йиллар давомида 8 нафар олий таълим вазири, 5 нафар Таълим Сифатини Ошириш Маркази директори вазифасидан озод қилинди¹.

ОТМга кириш имтиҳонлари коррупциявий хуқуқбузарликлар келиб чиқиши мумкин бўлган муҳим босқич ҳисобланади. Шунинг учун, Грузия ушбу босқичга алоҳида эътибор бериб, 2005 йилда ягона миллий кириш имтиҳони тизимини ташкил қилди². Transparency International ташкилоти томонидан Грузияда имтиҳонда қатнашаётган 973 нафар талаба, 764 нафар уларнинг ота-оналари, 340 нафар бошқарувчилар иштирокида ижтимоий сўров ўтказганда, 80 фоиз талабалар, 79 фоиз ота-оналар, 96 фоиз бошқарувчилар янги имтиҳон тизимига ишонч билдирган³.

¹ Muriel Poisson and Jacques Hallak, “Corruption risk assessment of the Georgian higher education sector”, International institute for Educational Planning 7–9 rue Eugene Delacroix, 75116 Paris, France, UNESKO 2018.

² Orkodashvili M. “Corruption in Higher Education: Causes, consequences, reforms. The case of Georgia” 2009, Electronic copy available at: <http://ssrn.com/abstract>.

³ Orkodashvili M. “From equity of access to international quality standards for curbing corruption in secondary and higher education and closing achievement gaps in post-soviet

Мазкур тизим орқали ОТМдан коррупциявий ҳуқуқбузарлик содир этилиши мумкин бўлган муҳим кириш имтиҳони босқичи ишончли давлат маркази ваколатига ўтказилди.

Мамлакатда 2004 йил 21 декабрда “Олий таълим тўғрисида”ги, 2010 йил 21 июнда “Таълимни ривожлантириш тўғрисида”ги Қонунлар қабул қилинган бўлиб, мазкур қонунларда соҳа билан боғлиқ барча муносабатлар тўлиқ тартибга солинган.

“Олий таълим тўғрисида”ги Қонунда соҳага оид барча муносабат тўлиқ қамраб олинган ва ҳар бир давлат органининг ваколати ҳамда вазифалари аниқ кўрсатиб ўтилган.

Хусусан, Грузия парламенти олий таълим тизимида асосий давлат сиёсати ва бошқарувини белгилайди, соҳага доир норматив-ҳуқуқий хужжатларни қабул қиласди, Таълим ва фан вазирлиги ҳисоботларини эшитади. Вазирлар Маҳкамаси, Таълим ва фан вазирлиги олий таълим соҳасида ижро функциясини амалга оширади. Таълим сифатини таъминловчи Таълим Сифатини Ошириш Маркази, кириш имтиҳонларига масъул Баҳолаш ва Имтиҳон Миллий Маркази, илмий тадқиқот фаолиятига йўналтирилган Руставели Миллий Олимлар Жамияти каби маҳсус давлат органлари мавжуд.

Мамлакатда олий таълим соҳасида коррупцияга қарши курашишда ОТМга катта мустақиллик ва эркинлик бериш, уларда мукаммал бошқарув тизимини шакллантириш энг самарали ёндашув бўлди.

ОТМлари бошқарув тузилмаларига: Илмий Кенгаш, Сенат, Ректор, Молия бўлими бошлиғи, Таълим сифатини таъминлаш хизмати; факультет тузилмаларига: факультет Илмий кенгаши, декан, факультет Таълим сифатини таъминлаш хизмати киради.

Сенат – ОТМ олий вакиллик органи ҳисобланиб, талаба ва илмий ходимлардан яширин, teng, тўғридан-тўғри овоз бериш билан йўли ўқув даврига мувофиқ муддатга сайланади.

Сенат аъзолари ОТМнинг барча манфаатдор иштирокчиларини тўлиқ қамраб олади. Қизиги шундаки, сенаторларнинг учдан бири талабалар (бакалавр, магистр, доктарант) орасидан сайланади. Манфаатлар тўқнашувини олдини олиш учун бошқарув вазифасини бажарувчи ходимларни Сенатор сифатида сайланиши чекланган. Сенат мажлислари ва сессияларини ўtkазиш ОТМ низомида белгиланиб, Сенат муддатига сайланган Спикер бошчилигига ўtkазади.

Сенатнинг ОТМдаги муҳимлик даражаси унга берилган ваколатлар билан белгиланади. “Олий таълим тўғрисида”ги Қонунда Сенатнинг бир қатор ваколатлари келтирилган бўлиб, ОТМ бюджет лойиҳасини, Илмий Кенгаш таркиби ва Молия бўлими номзодларини, ходимларни рағбатлантириш тартиби, муддатлари ва иш ҳақи миқдорини, Таълим сифатини таъминлаш хизмати бошлигини тасдиқлаш каби ваколатларни мисол сифатида келтириш мумкин.

Илмий кенгаш – ОТМда илмий фаолиятни амалга оширувчи вакиллик органи ҳисобланиб, у илмий ходимлар, факультет аъзолари ва талабаларнинг ўзини-ўзи бошқариш органи вакиллари томонидан ўқиш муддати даврига сайланади. Илмий Кенгашда ҳар бир факультетдан teng вакил бўлиб, аъзолар сони ОТМ низомида белгиланади. Таъкидлаш лозимки, фақатгина профессор даражасига эга ходимлар Илмий Кенгашга аъзо сифатида сайлана олади. Аъзолар ўртасида муносабатлар чуқурлашиб кетишини олдини олиш мақсадида Илмий Кенгашнинг учдан бир қисм аъзолари унинг ваколат муддати ярмида янгиланади¹.

Илмий Кенгаш раис, яъни ректорни сайлаш, ўқув йили бошида имтихон асосида қабул қилинадиган талабалар сонини белгилаш ва бошқа бир қатор ваколатларга эга.

¹ Georgia “Law of Georgia on higher education” December 21, 2004, <http://www.mes.gov.ge>

Ректор ОТМ раҳбари бўлиш билан бир вақтда Илмий Кенгаш раиси ҳисобланиб, таълим ва тадқиқот бўйича маҳаллий ҳамда халқаро шартномалар тузиши мумкин. Таълим муассасаси ректори Илмий Кенгаш томонидан низомда белгиланган, лекин Илмий Кенгаш муддатидан қўп бўлмаган муддатга сайланади. Ректор сифатида фақат профессор мақомига эга ходимлар сайланиши мумкин.

Ректор лавозимиға номзодларни очик танлов асосида танланиши, Илмий Кенгаш томонидан сайланиши ва вазифасидан озод қилиниши муносиб номзодларни коррупциявий қўллаб-қувватлашларсиз лавозимга тайинланиши таъминлайди. Шахс бир ОТМда икки мартадан ортиқ ректор бўла олмайди. Илмий Кенгаш ҳар бир номзоднинг ҳаракатлар режасини сайловдан олдин баҳолайди.

ОТМнинг молиявий масалалари коррупциявий хавф-хатарларнинг асосий ўчоқларидан бири ҳисобланади. Грузия бу масалада оқилона йўл тутиб, ректор, декан ва бошқа мансабдорларни молиявий масалалардаги ваколатларини чеклаган ҳамда ушбу масалага масъул алоҳида жавобгар тузилмани ташкил қилган¹.

Молия бўлими бошлиғи ОТМда молиявий масалалар бўйича биринчи даражали бошқарувчи ҳисобланиб, у Илмий Кенгаш таклифи билан Сенат томонидан тайинланади. Шахсни узоқ вақт бир мансаб лавозимда ишлаши коррупциявий ҳуқуқбузарликларга сабаб бўлиши мумкин. Шунинг учун, Молия бўлими бошлиғининг ваколат муддати 4 йилдан қўп бўлмайди ва шахс мазкур лавозимга бир ОТМда кўпи билан икки марта тайинланиши мумкин. Молия бўлими бошлиғи Илмий Кенгаш ва Сенатга ҳисобдор бўлиб, Сенат йиллик ҳисботот ва бюджетни рад этганда ёки унинг асосли қарори билан у вазифасидан муддатидан олдин озод қилинади.

ОТМ фаолиятида бюджет маблағларини сарфланиши алоҳида муҳим соҳа ҳисобланиб, бюджет Молия бўлими томонидан факультетлар ва бошқа алоқадор тузилмалар билан биргаликда тузилади ва Илмий кенгаш

¹ Georgia “Law of Georgia on higher education” December 21, 2004, <http://www.mes.gov.ge>

розилиги билан тасдиқлаш учун Сенатга тақдим этилади. Сенат бюджет лойиҳасини тасдиқлаши ёки важлар билан рад этиши мумкин. Бу вазиятда Молия бўлими Илмий Кенгаш билан биргаликда келтирилган важларни асослаган ҳолда лойиҳани Сенатга тақроран тақдим этади. Сенат бюджет лойиҳасини иккинчи бор рад этгган тақдирда Молия бўлими бошлиғи вазифасидан озод қилинади ва бюджет янги Молия бўлими бошлиғи томонидан ишлаб чиқилади.

ОТМнинг Таълим сифатини таъминлаш хизмати бошлиғи Илмий Кенгаш тақлифи билан Сенат томонидан тасдиқланади. Ушбу хизмат вакиллари ОТМнинг ҳар бир факультетида ҳам мавжуд.

ОТМда факультетлар бошланғич боғин бўлиб, унинг асосий вазифаси талабаларни ўқитиш ва тадқиқот фаолиятини олиб бориш ҳисобланади.

Факультет кенгаши вакиллик тузилмаси бўлиб, у факультетнинг барча ходимлари ва талабаларнинг ўзини-ўзи бошқариш органи аъзоларидан сайлов йўли билан шакллантирилади. Факультет кенгашига сайланадиган талабалар сони низомда кўрсатилган бўлади, лекин умумий аъзоларнинг тўртдан бир кисмидан кам бўлмаслиги керак.

Факультет декани Факультет кенгаши томонидан муассаса низомида кўрсатилган, лекин 4 йилдан кўп бўлмаган муддатга сайланади. Бир шахс икки мартадан ортиқ декан лавозимига сайлана олмайди. Декан лавозимига сайланадиган номзод докторлик илмий даражасига эга бўлиши лозим. Деканнинг иккита ўринbosари мавжуд, улардан бири таълим жараёнига, иккинчиси тадқиқот маласига масъул ҳисобланади¹.

Факультетларнинг ҳар бирида алоҳида Сифатни таъминлаш хизмати мавжуд бўлиб, асосий вазифаси таълим сифатини ривожлантириш ва ходимлар малака даражасини ошириш ҳисобланади. Факультет таълим сифатини таъминлаш хизмати бошлиғи Факультет кенгаши томонидан тайинланади. Ҳар қандай академик даражага эга ходим факультет таълим сифатини таъминлаш хизмати бошлиғи бўлиши мумкин.

¹ Georgia “Law of Georgia on higher education” December 21, 2004, <http://www.mes.gov.ge>

Меҳнат муносабатларини коррупциявий хавф-хатарлардан ҳоли тарзда ишлаб чиқилиши барча соҳаларда бўлгани каби олий таълим соҳасида муҳим аҳамиятга эга. Ишга олиш очиқлик, тенглик ва адолат принциплари асосида танлов йўи билан амалга оширилади.

ОТМда фаолият кўрсатувчи ходимлар уч турга: академик, бошқарув ва кўмаклашувчи ходимларга бўлинади. Профессор, доцент, профессор ёрдамчиси, ўқитувчилар академик ходимлар тоифасига киради. Бошқарув субъектларига ректор, молия бўлими бошлиғи, факультет декани ва уларни ўринбосарлари, ёрдамчи ходимлар киради. Бошқарув субъектлари бир вақтда бошқа мансабни эгаллай олмасалар, Илмий Кенгаш (ректордан бошқа) ва Сенат аъзолари бошқарув субъекти бўла олмайдилар.

Профессор лавозимига тайинланиш учун докторлик даражаси, таълим ва тадқиқот бўйича камида олти йил амалиёт талаоб этилса, дотцент лавозимига докторлик даражаси керак бўлади. Профессор ёрдамчиси лавозимига доктарант даражасига эга ёки доктарант талабалар олиниши мумкин.

ОТМ ходими учун энг юқори ёш 65 ёш ҳисобланиб, 65 ёшга тўлган профессор фахрий профессор унвонига эга бўлади. Бу турдаги профессорларга жорий нафақа ва аввал олган ойлиги ўртасидаги фарқ ОТМ томонидан тўлаб берилади. Фахрий профессорлар ОТМ фаолиятида иштирок этиши, талабаларга ихтиёрий келишув асосида маълум пулли хизматларни кўрсатиши мумкин¹.

Талабалар таълим муассасасининг барча жабҳаларида муҳим ўринга эга субъектлар бўлиб, улар кенг хуқуқларга, айниқса бошқарув тузилмаларига сайлаш ва сайланиш хуқуқларига эга.

Талаблар ўзини-ўзи бошқариш органи ҳар бир факультетда талабаларнинг умумий, teng, тўғридан-тўғри, яширин сайлов йўли билан шакллантирилади. Мазкур тузилма фаолиятини маҳсус низом асосида олиб боради ва тузилма ОТМ бошқарув жараёнида талабалар иштирокини

¹ Georgia “Law of Georgia on higher education” December 21, 2004, <http://www.mes.gov.ge>

таъминлаш, талабалар ҳуқуқларини ҳимоя қилиш, факультет кенгаши аъзоларини сайлашда иштирок этиш, таълим ва тадқиқот бўйича ўз таклифларини Илмий Кенгаш ва Сенатга тақдим этиш каби муҳим ваколатларга эга.

Грузиядаги олий таълим соҳасидаги ислоҳотнинг ўзига хослиги шундаки, ислоҳотларни амалга ошириш чоралари “Олий таълим тўғрисида”ги Қонунда белгиланган.

Жумладан, Президент қарори билан мамлакатдаги барча ОТМнинг ректор ва деканлар ишдан бўшатиши, янги ректор тайинлаши, улар янги деканларни тайинлаши, ОТМ қонунда белгилаган тартибда икки йилдан кечикмаган ҳолда янги ректор ва деканларни сайлаши, олти ой муддатда низомини тасдиқлагани ҳолда вазирликка тақдим этиши белгиланган.

Хулоса қилсак, Грузия томонидан олий таълим соҳасида амалга оширилган ислоҳотларнинг қайси бирини ижобий баҳолаб, миллий қонунчиликка жорий этиш мумкин бўлади. Ижобий амалиётларни қуида келтириб, уларнинг хусусиятларини муҳокама қиласиз.

Биринчидан, маълум соҳада ислоҳотларни амалга оширишдан аввал миллий тизим хусусиятларини чуқур ўрганиш, зарур бўлган барча кўрсаткичларни тизимли таҳлил қилиш орқали соҳадаги муаммо ва камчиликларни, уларнинг салбий оқибатларини аниқлаш лозим бўлади. Грузия ҳам олий таълим соҳасини ислоҳ қилишда ҳудди шундай йўл тутди ва коррупциянинг олий таълимга салбий таъсир қилувчи учта муҳим салбий оқибатларни (таълим олиш имконияти, тенглиги ва сифати бузилиши) аниқлаб олди.

Иккинчидан, соҳадаги муаммоларни келиб чиқиш омилларни аниқлаб, уларни бартараф этишга йўналтирилган чора-тадбирлар белгилаш ва юқори самарадорликка эришиш учун уларнинг энг муҳимларини танлаб олиш. Грузия олий таълим соҳасини ислоҳ қилишда “Олий таълим тўғрисида”ги Қонунни қабул қилиш орқали амалга оширилиши лозим бўлган чора-табирларни белгилаб олди ва дастлабки ислоҳотни ОТМга

мустақиллик бериш, соҳадаги марказлашган бошқарувни бекор қилишдан бошлади.

Учинчидан, амалга оширилиши лозим бўлган ислоҳотларнинг салбий оқибатларини олдиндан қўра олиш, бундай оқибатларга йўл қўймаслик учун ўзгаришларга комплекс ёндашиш лозим. Грузия ОТМга мустақиллик бериш натижасида келиб чиқиши мумкин бўлган салбий оқибатларни тўғри баҳолаб, ОТМ бошқарув тизимида бир бирини тийиб туриш механизмини яратди, таълим сифатини баҳолаш ва назоратида қатъий ёндашувга таянди.

Тўртинчидан, хукуқни қўллашда ноаниқликлар бўлмаслиги учун соҳадаги муҳим муносабатларни қонунда имкон қадар тўлиқ қамраб олиш, давлат органлар ваколатлари ва ОТМнинг ташкилий тузилиши аниқ белгилаш керак бўлади. Грузиянинг “Олий таълим тўғрисида”ги Конуни 16 боб, 90 та моддадан иборат бўлиб, олий таълим соҳасидаги органлар ваколатлари, ОТМнинг бошқарув тузилиши, таълим сифатини таъминлаш, меҳнат муносабатлари ва бошқа бир қатор муҳим муносабатлар қамраб олинган.

Бешинчидан, юкори турувчи органларнинг коррупциявий босимидан халос бўлиш ва муҳим ваколатларни ишончли қўлларга топшириш учун алоҳида мустақил институтларни жорий этиш ижобий натижа беради. Грузияда вазирлик тизимидан мустақил Таълим Сифатини Ошириш Маркази, кириш имтиҳонларига масъул Баҳолаш ва Имтиҳон Миллий Маркази каби органлар ташкил этилди.

Олтинчидан, давлат грантларини молиялаштиришда давлат меҳнат бозори талабларига таяниши, давлат ривожланиши учун муҳим бўлган соҳаларда кадрлар тайёрлашга кўпроқ имтиёз ва преференциялар жорий этиш лозим бўлади. Грузияда 2013 йилда қишлоқ хўжалиги, табиииий фанлар, муҳандислик ва қурилиш соҳалари бўйича тўлиқ грантлар жорий этилди.

Еттинчидан, хусусий олий таълим ривожлантиришни қўллаб қувватлаш, давлат ва хусусий ОТМлари учун тенг рақобат шароитини яратиб бериш.

§ 3.2. Олий таълим соҳасида коррупциявий хавф-хатарларни бартараф этиш юзасидан таклифлар

Тадқиқот давомида коррупциявий хавф-хатарларнинг келиб чиқиш омиллари аниқлаб олинди, сўнгги босқичда мазкур хавф-хатарларни бартараф этишнинг самарали йўлларини ўргангандан ҳолда зарур таклифларни танлаб оламиз. Келтириладиган таклиф лойиҳалари ўз ичига ҳукуқий, ташкилий, институонал ўзгаришларни ва чораларни қамраб олади.

1. ОТМга кириш имтиҳонлари қоидаларини тубдан ўзгартириш ва янги коррупциядан ҳоли имтиҳон тизимини шакллантириш.

Мамлакатимизда ОТМ кириш имтиҳонлари йилда бир марта июль-август ойларида ўтказилади. Кириш имтиҳонларини қисқа муддатда кўплаб номзодлар иштирокида ўтказилиши ортиқча меҳнат талаб қилиш билан бирга коррупциявий хавф-хатарларга сабаб бўлмоқда.

Сўнгги йилларда ОТМга кириш тест синовларини топширувчи абитуриентлар сонининг ошиб бориши йилига ўртacha 10 фоизни ташкил этиб, 2016 йилда 663 минг, 2017 йилда 729 минг, 2018 йилда 810 минг нафарни ташкил этган бўлса,¹ 2019 йилда тест синовларида 1 066 926 нафар (эски битувчилар билан бирга) абитуриентлар қатнашган.

Кириш имтиҳонларининг салбий хусусиятларини нималарда кўриш мумкин:

Биринчидан, имтиҳон учун биноларни тайёрлаш, зарур жиҳозлар ва ускуналар билан таъминлаш катта миқдордаги маблағлар талаб этади.

Хусусан, 2019 йилда Наманган шаҳрида муҳандисик-қурилиш институтининг спорт залига бошқа жойдан келтирилган 20 дона

¹ Конун ҳужжатлари маълумотлари миллий базаси, 21.01.2020 й., 09/20/36/0076-сон.

кондиционерларни вақтінчалик ўрнатишиң ва яна аввалғи жойига олиб бориб, қайта ўрнатишиң учун 89,8 млн.сүм сарфланған¹.

Иккінчидан, имтиҳон назоратчиларини ёллаш бир тарафдан құшимча маблағ талаб қылса, иккінчи тарафдан нохолис шахсларни жараёнга жалб қилишга олиб келмоқда.

Жумладан, 2019 йилда имтиҳон жараёнига 5 244 нафар назоратчилар ёлланиб, уларга 9 млрд. сүмдан зиёд иш ҳақи түланған.

Назоратчилар сони күплиги ва имтиҳон қисқа муддатда ташкиллаштирилиши сабабли назоратчилар холислигини ўрганишга вақт етмайди.

Масалан, Самарқанд вилоятида кузатувчи “А” тест жараёніда абитуриент синглиси “Б”нинг саволларини расмга тушириб, танишларига юборганлиги учун тест жараёнидан четлатилған.

Учинчидан, кириш имтиҳонларинида номзодлар сони күплиги ва текшириш жараёніда замонавий технологик воситалардан фойдаланилмаслиги турли салбий оқибатларга олиб келмоқда.

Жумладан, 2019 йилда махсус ускуналарнинг маънан эскирганлиги ҳамда юзаки фойдаланилгани сабабли, имтиҳон аудиториясига 198 нафар абитуриентлар уяли телефон олиб кирған.

Түртінчидан, замонавий имтиҳонлар компьютер воситасида, махсус тест дастурлари асосида ўтказиллаётган бир вақтда босма тестлардан фойдаланиш ортиқча молиявий ҳаражатларга олиб келмоқда.

Хусусан, 2019 йилда босма тест материаларини тайёрлаш ва фелдъегерлик хизмати учун 2,7 млрд. сүмдан ортиқ маблағ сарфланған².

Бешинчидан, мактаб ва ўрта-махсус ўкув юртини тугаши ва ОТМга ҳужжат топшириш оралиқ вақти жуда қисқалиги ва битирув ҳужжатларни

¹ Коррупцияга қарши курашиш бўйича Республика Идоралараро комиссиясининг йиғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

² Коррупцияга қарши курашиш бўйича Республика Идоралараро комиссиясининг йиғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

ўз вақтида берилиши билан боғлиқ муаммолар ОТМга хужжат топшириш изчилигини бузмоқда.

Масалан, 2019 йилнинг 15 июндан 7 июлгача 271 минг абитуриент рўйхатга олинган бўлса, сўнгги 8 кунда бу кўрсаткич 795 минг нафарни ташкил этган.

Олтинчидан, тест саволларининг мазмун-моҳияти абитуриентни креатив ёндашувга, мантиқий фикрлашга, билимларини муаммоли вазиятларда қўллашга қаратилмаган ва саволлар асосан саналар, аҳамиятсиз деталларни ёдда сақлашни текширишга йўналтирилган.

Хусусан, тест саволларида (вариант 100062-228) F.Ғуломнинг “Шум бола” қиссасида Сарибойнинг ўғли айнан қайси дарахтдан йиқилиб, жон бергани сўралган ва жавоб вариантлари тариқасида “тут; терак; олма; қайрағоч” кўрсатилган.

Еттинчидан, мактаб ва ўрта-максус таълим ўқув юртларида таълим сифати пастлиги, айрим ўқитувчиларни малакаси етишмаслиги, олий таълим билан узвий боғланмаганлиги сабабли битирувчилар хусусий дарсларни афзал кўриб, машғулотларига қатнашмаяпти.

Мисол учун, 2019 йил 28 ноябрда танлов асосида Яккасарой туманидаги 160-сонли мактаб текширилганида, жами 123 нафар 11-синф ўқувчисидан 67 нафари қўшимча машғулотга қатнаши сабабли дарсда йўқлиги аниқланган¹.

Саккизинчидан, тест натижаларини дарҳол эълон қилинмаслиги, нотўғри жавобларни изоҳланмаслиги номзодларда тест тизимиға нисбатан ишончсизлик муносабатини шакллантириб, уларни коррупциявий хукуқбузарлик содир этишга унダメқда.

Хусусан, 2016-2019 йилларда Бош прокуратура ҳузуридаги Департамент томонидан ўқишга киритиш билан боғлиқ 202 та жиноятлар

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

фош қилинган ва талабни бузган 465 нафар шахслар синовдан четлаштирилган.

Шунингдек, “cabinet.dtm.uz”, “mandat.dtm.uz” сайтларида тест натижалари чиққанидан кейин, қисқа вақтда 4,2 млн. (бошқа пайтда ойига 60-150 минг) мурожаат қайд этилиб, ушбу тизим ишламай қолган.

Юқоридагиларни инобатга олган ҳолда Вазирлар Махкамаси 261-сонли қарори билан тасдиқланган “Ўзбекистон Республикаси олий таълим муассасаларининг бакалавриатига ўқишига қабул қилиш учун кириш тест синовларини ўтказиш тартиби тўғрисида”ги Низомни янги таҳрирда қабул қилиш, қуидагиларни белгилаш мақсадга мувофиқ бўлади:

1) Кириш имтиҳонларини тўлик бир йил давомида ўтказиш лозим. Бунда ДТМ ўқув йили бошида келаси йил учун ҳар бир йўналиш бўйича бир йиллик имтиҳон графигини ишлаб чиқиб, уни ўз сайтида эълон қиласи. Мисол учун, сентябрь ойида иқтисодиёт, юридик ва тиббиёт соҳасидаги ОТМга кириш имтиҳонларининг ўтказилиши графикда белгиланади. Имтиҳонлар ҳар бир йўналиш бўйича тўлик ўтказилиб, натижалар эълон қилингач, кейинги йўналишлар бўйича имтиҳонлар ўтказилади. Таъкидлаш керакки, ОТМда кадрлар тайёрлашда узилиш бўлмаслиги учун ушбу тизимга ўтишни дастлаб ўқув йилини ўртасида бошлиш ва эски йилда ўқишига кирмаган битирувчиларни қамраб олиш лозим.

2) Кириш имтиҳонларини бир йил давомида ўтказиш учун биринчи навбатда ДТМнинг ташкилий хуқуқий шаклига ўзгартириш киритиб, унинг худудларда алоҳида юридик шахс мақомига эга бўлимларини ташкил этиш, уларни моддий-техник таъминлаш лозим бўлади. Вазирлар Махкамасининг 2018 йил 20 февралдаги “Ўзбекистон Республикаси Вазирлар Маҳкамаси ҳузуридаги Давлат тест маркази фаолиятини янада такомиллаштириш тўғрисида”ги 130-сонли қарорида, тест синовлари билан боғлиқ бўлган ишларни сифатли, ўз вақтида ва самарали амалга ошириш ДТМнинг вазифалари ва функцияларини, ташкилий тузилмасини

қайта кўриб чиқиши, шунингдек, унинг худудлардаги бўлимларини ташкил этиши тақозо этиши кўрсатилган¹.

Рақамларни таҳлил қиласиган бўлсак, 2019 йилда ОТМга ўртacha (эски йилдаги номзодлар билан бирга) 1.066.926 млн. нафар номзодлар имтиҳон топширган бўлиб, ўртacha бир маъмурий-худудий бирликка 76.209 нафардан номзодлар тўғри келмоқда. Бир йилда 365 кундан 120 куни шанба, якшанба куни ва дам олиш кунларига тўғри келса, 45 кун ДТМ худудий бўлимларининг ташкилий иш фаолиятларига ажратилса, қолган 200 кунда 76.209 нафар номзодларни қамраб олиш керак бўлади. Ҳар бир ҳудуд ўртacha бир кунда 200 нафардан 2 семенада 400 нафар номзоддан имтиҳон олганда 200 кунда 80 минг нафар номзоддан имтиҳон олиши мумкин бўлади.

3) Имтиҳон жараёнларини очиқ ва ошкора ташкил этиш, имтиҳон хоналарини компьютерлар ва кузатув камералари, назоратчиларни “body” камералар билан таъминлаш зарур бўлади. Имтиҳонга кириш босқичида замонавий текшириш ускуналарда кенг фойдаланиш, имтиҳонни юқори махфийлик ва қатъий интизом асосида ўтказиш, тартиб бузувчиларни огоҳлантиришсиз имтиҳондан четлаштириш керак бўлади.

Ҳар бир номзод имтиҳонни компьютерда топшириши, натижалар зудлик билан эълон қилиниши ва хато жавоблар ўша жойни ўзида компьютер воситасида изоҳлаб берилиши керак.

Номзодлар интернет орқали рўйхатга олиниб, зарур ҳужжатларни ДТМнинг худудий бўлимларига топширгач уларга имтиҳон жойи ва вақти кўрсатилган махсус рухсатнома ва “ID” код берилади. Номзод имтиҳон куни компьютерга махсус кодни киритганда электрон тизим номзод учун ноаниқ вариантни танлайди.

Саволларни электрон базада махфий сақланиш, худудий бўлимларни саволлар базасига кириш имкониятини чеклаш, саволлар базасини юритиш бўйича республика доирасида алоҳида жавобгар шахсни тайинлаш

¹ Конун ҳужжатлари маълумотлари миллий базаси, 21.01.2020 й., 09/20/36/0076-сон.

коррупциявий ҳолатларни чеклайди. Тизим имтиҳон натижаларини электрон рўйхатини юритади ва имтиҳон сўнггида якуний натижалар кўрсатади.

Давлат бюджети даромадларини инобатга олган ҳолда ҳар бир номзод имтиҳон топширгани учун маълум миқдорда тўловни амалга оширади.

Таклифда келтирилган кириш имтиҳони тизими Украина ва Грузия давлатлари олий таълим соҳасида мавжуд бўлиб, ўзининг ижобий натижасини кўрсатган¹.

Шунингдек, Президентимизнинг 2020 йил 24 январь куни Олий Мажлисга йўллаган мурожаатномасида, ОТМга кириш имтиҳонларини ҳам оптималлаштириш зарурлиги, бунда асосий эътиборни ўқишга кириш жараёнларини соддалаштиришга, олий ўқув юртларида чинакам билим ва тарбия олишга қаратишимиз лозимлиги таъкидланиб, она тили бўйича билимни баҳолашнинг миллий тизимини яратиш мақсад қилиб олинди².

Она тили бўйича билимни баҳолаш учун масъул тузилма талаб этилиши аниқлигини ҳисобга олсак, таклиф этилаётган итихон тизимида ДТМнинг ҳудудий бўлимлари она тили бўйича имтиҳонларни ўтказиши мумкин бўлади. Шунингдек, CEFR миллий инглиз тили имтиҳонлари ҳам ҳудудларда турли таълим муассасаларининг биноларида ўтказилмоқда.

2. Таълим соҳасига оид норматив-хуқуқий хужжатларни умумлаштириш ва уларни тизимли равишда кодификациялаш.

Бугунги қунда соҳадаги норматив-хуқуқий хужжатлар сони кўплиги уларни қўллашда турли қийинчиликлар туғдирмоқда.

Жумладан, соҳада 330 дан ортиқ норматив-хуқуқий хужжатлар мавжуд бўлиб, уларнинг 3 таси Конун, 96 таси Президентнинг фармон ва қарорлари, 231 таси Вазирлар Маҳкамасининг қарорлари ҳисобланади.

¹ “Law of Georgia on higher education” December 21, 2004, and “Law of Ukraine on higher education” July 1, 2014.

² Ш.М.Мирзиёев, Ўзбекистон Республикаси Олий Мажлисига йўллаган мурожаатномаси, 2020 24 январь, Интернет манзили: <http://uza.uz>.

Кўриш мумкинки, норматив-хуқуқий хужжатларнинг 231 таси қонуности актлар бўлиб, бундан ташқари, кўплаб вазирлик буйруқлари, йўриқномалари, низомлари ва бошқа соҳавий хужжатлари мавжуд. Норматив-хуқуқий хужжатларни тартибсиз кўпайиб кетиши уларни бир-бирини тақорорлашига олиб келса, соҳада қонуности актлардан кенг фойдаланиш коррупциявий ҳолатларни келиб чиқишига сабаб бўлиши мумкин.

Шунга қўра, таълим соҳасидаги норматив-хуқуқий хужжатларни қайта экспертизадан ўтказиб, ягона Ўзбекистон Республикасининг “Таълим кодекси”ни ишлаб чиқиш мақсадга мувофиқ бўлади.

Хорижий давлатлар тажрибасига мурожаат қиласиган бўлсак, кўплаб давлатларда Таълим кодекси мавжудлигини гувоҳи бўламиз. Масалан, Франция Таълим кодекси 2000 йил 22 июнда қабул қилинган бўлиб, ушбу кодекс 9 том, 953 та моддадан иборат ва 7 ва 6 томлари олий таълим соҳасига бағишиланган¹. Беларусия Таълим кодекси 2011 йил 13 январда қабул қилинган бўлиб, 16 бўлим, 63 боб, 295 та моддадан иборат². Молдавия Таълим кодекси 2014 йил 17 июлда қабул қилинган бўлиб, 13 та бўлим, 157 та моддадан иборат³.

Жаҳон амалиётида Таълим кодексининг тузилиш шакли асосан икки хил кўринишда: таълим тизимиға мувофиқ равища мактабгача таълим, умумий ўрта таълим, олий таълим соҳалариға алоҳида бўлим ва боблар ажратиш (Франция); бутун таълим соҳасини бирлаштирган ҳолда таълим тизими, бошқаруви, субъектлари ва бошқа муҳим босқичларини бўлим ва бобларга ажратиш (Беларусия) кўринишлари.

Фикримизча, миллий Таълим кодексини таълим тизимиға мувофиқ равища бўлим ва бобларга ажратган ҳолда шакллантириш мақсадга мувофиқ бўлади. Зоро, Ўзбекистон Республикасида барча таълим тизими алоҳида бошқарув аппаратига, норматив-хужжатларга ва субъектларга эга

¹ <http://www.lexed.ru>.

² <http://kodeksy.by>.

³ <http://lex.justice.md/ru>.

бўлиб, норматив базани алоҳида мукаммалаштирган ҳолда ягона кодексга бирлаштириш қулай бўлади.

3. ОТМлари бошқарув тузилмаларини қайта кўриб чиқиш, вакиллик ва жамоавий бошқарув институтларини ташкил этиш.

Коррупцияга қарши курашишда бошқарув ваколатларини тўғри тақсимлаш, вазифаларни маҳсуслаштириш, бошқарувда барча манфаатдор иштирокчиларни қамараб олиш, ўзаро тийиб туриш механизмларини яратиш муҳим ўрин эгаллайди. Ўзбекистон Республикаси Президентининг 2019 йил 8 октябрдаги “Ўзбекистон Республикаси олий таълим тизимини 2030 йилгача ривожлантириш концепциясини тасдиқлаш тўғрисида”ги ПФ-5847-сонли Фармонида ҳам,¹ ОТМни тизимли ривожлантириш ва бошқарув фаолиятини такомиллаштириш алоҳида белгилаб қўйилган.

Олий ва ўрта маҳсус таълим вазирлиги, Меҳнат вазирлиги, Молия вазирлигининг “Олий таълим муассасалари бошқарув, техник, хизмат кўрсатувчи ва ўқув-ёрдамчи ходимларининг намунавий штатларини тасдиқлаш тўғрисида”ги қарори қабул қилиниб, 2017 йил 21 февралда Адлия вазирлигидан рўйхатдан ўтказилган². Мазкур қарорда ОТМнинг бошқарув тузилмалари ва ходимлар штат бирликлари намунаси келтириб ўтилган. Такидлаш лозимки, ОТМнинг бошқарув тизими замонавий демократик бошқарув талабларига жавоб бермайди.

Жумладан, бошқарув ваколатлари ректор, проректор, декан, декан ўринbosарлари, ҳисобчилар каби алоҳида шахслар қўлида тўпланган ва ўзаро тийиб турувчи механизмлар мавжуд эмас. Академик доира вакиллари ва талаблар биринчи даражали манфаатдор субъектлар бўлсада, бошқарув фаолиятига умуман жалб қиқлинмаган.

Шунга қўра, ОТМ ташкилий тузилмаларини, айниқса бошқарув ваколатларини тубдан ўзgartириш, вакиллик ва жамоавий боғинларни ташкил этиш керак бўлади. Мазкур бошқарув тузилмаларини

¹ Ўзбекистон Республикаси қонун ҳужжатлар маълумотлари миллий базаси, 2019 й., 06/19/5847/3887-сон.

² Қонун ҳужжатлари маълумотлари миллий базаси, 19.02.2020 й., 10/20/2859-2/0188-сон.

шакллантиришда Грузия амалиёти мукаммал хорижий андоза бўлиб хизмат қилиши мумкин¹.

ОТМда манфаатдор субъектлар орасидан ўқитувчи ва талабалар томонидан сайланадиган Сенат олий вакиллик органини, илмий фаолият амалга оширувчи Илмий Кенгаш вакиллик органи, молиявий масалаларга масъул Молия бўлими бошлиғи лавозимини, таълим сифатига жавобгар Таълим сифатини таъминлаш бошлиғи, талабалар ҳукуқларини ҳимоя қилувчи, бошқарув фаолиятида иштирок этувчи Талабаларнинг ўзини-ўзи бошқариш органи каби тузилмаларни ташкил этишни таклиф этамиз. Мазкур тузилмаларнинг шакллантирилиши, ваколатлари ва фаолият тартиби тадқиқот ишининг хорижий тажриба бобида алоҳида келтирилган.

4. Хорижий талабалар ва хорижда ўқимоқчи бўлган талабалар учун хизмат кўрсатувчи маҳсус нодавлат тузилма ташкил этишга кўмаклашиш.

ОТМга ўқиши учун бир қатор ҳужжатлар талаб этилади ва уларни шакллантириш маълум вакт ҳамда меҳнат талаб этади. Айниқса, хорижий давлатлар ОТМга кириш тартиб қоидалари, талаб этиладиган ҳужжатлар тубдан фарқ қиласи ва бу номзодларга ноқулайликлар келтириб чиқаради. Амалиётда хорижда ўқимоқчи бўлган номзодлар айrim шахсларнинг алдовига илиниб қолаётгани ёки арзимас хизматлар учун катта микдорда пул тўлаётгани учраб турибди.

Ўтган 2018 йил 1 ноябрь ҳолатига мамлакатимизда 2377 нафар хорижлик талабалар мавжуд бўлиб, уларнинг энг кўп 1322 нафари Хоразм вилояти, энг кам 2 нафари Наманган вилояти ҳисобига тўғри келади². Биргина АҚШнинг ўзида 570 нафар Ўзбекистонлик талаблар ўқийди ва бошқа давлатларда ҳам мингдан ортиқ талабалар мавжуд³. Ҳозирда

¹ Georgia “Law of Georgia on higher education” December 21, 2004, <http://www.mes.gov.ge>

² <https://kun.uz/news/2018/11/21/horizlik-talabalar-soni-bujica-horazm-etakcilik-kilmokda>.

³ <https://kun.uz/en/news/2018/11/25/number-of-uzbek-students-in-the-us-is-increasing>.

мамлакатимизда 21 та хорижий ОТМлари мавжуд, уларнинг 17 таси сўнгги 3 йилда ташкил этилган¹.

Украинада 2016 йилда хорижлик талабаларни қабул қилиш ва талабаларга чет элда ўқиш масалалари бўйича кўмаклашиш мақсадида Қабул Маркази ташкил этилди. Марказ хусусий ташкилот бўлиб, мамлакат миқёсида 16 филиаллари мавжуд. Марказ 2016 йил 14 майда ташкил этилган бўлса, бир ой ичидаги унга 1500 та аризалар келиб тушган. Украина тажрибасига асосида Россия, Грузия, Полша ва Қозоғистон давлатлари ҳам мазкур турдаги марказларни ташкил қилди².

Шунга қўра, Ўзбекистондаги хорижий талабалар ва хорижда ўқимоқчи бўлган Ўзбекистонлик ёшларга, хорижда ўқиб Ўзбекистонга қайтган кадрларга ҳуқуқий ва амалий ёрдам хизматларини кўрсатиш учун ҳукумат ташаббуси билан Халқаро талабларга кўмаклашиш маркази ва унинг жойлардаги филиалларини ташкил этиш керак. Марказ ва унинг филиалларини ташкил этишда ягона намунавий андозага таяниш лозим, чунки бу орқали юқори сифат ҳамда қулайликни таъминлашга эришилади. Мазкур лойиҳани тендер асосида очик ва ошкора танлов усулида муносиб номзодга топшириш орқали мамлакатнинг барча ҳудудларида коррупциядан ҳоли хизматни жорий этишга мумкин бўлади.

5. Таълим сифатини таъминлаш фаолиятини амалга оширувчи нодавлат тузилма ташкил этишга кўмаклашиш.

Олий таълим сифатини таъминлаш юқори малакали кадрларни тайёрлаш ва коррупциявий хавф-хатарларни бартараф этишга хизмат қилади. Таълим беришни қизиқарли, талабчан ва адолатли бўлиши талабаларни фақат илм олишга ундейди.

Таълим сифатини таъминлашда назорат функцияси катта аҳамиятга эга бўлиб, мамлакатимиз ва МДҲ давлатлари тажрибасида мазкур вазифа алоҳида ягона давлат органлари томонидан амалга оширилади. АҚШ ва

¹ Ўзбекистон Республикаси қонун ҳужжатлар маълумотлари миллий базаси, 2019 й., 06/19/5847/3887-сон.

² <https://en.wikipedia.org>.

Фарбий Европа давлатлари амалиётида эса, олий таълим сифатини таъминлашда нодавлат ташкилотлар хизматидан кенг фойдаланилади.

Жумладан, АҚШ ОТМда таълим сифатини баҳолаш ва уларни аккредитациядан ўтказиш нодавлат ташкилотлар томонидан амалга оширилади. Ушбу ташкилотлар фаолияти АҚШ Федерал таълим департаменти томонидан назорат қилинади. Аккредитация ташкилотлари худудий, миллий ва ихтисослаштирилган турларга бўлинib, худудий ташкилотлар давлат ва нодавлат, миллий ташкилотлар тижорат ва нотижорат таълим муассасаларини, ихтисослашган ташкилотлар муайян соҳалар (иқтисод, тиббиёт) бўйича таълим сифатини баҳолайди¹. Олий таълимни аккредитациялаш кенгаши (Council for Higher Education Accreditation) эса аккредитация усулларини ишлаб чиқиш ва аккредитация ташкилотларининг фаолиятини мувофиқлаштириш билан шуғулланади. Бугунги кунда Кенгаш 60 дан ортиқ аккредитация ташкилотларини тан олган ва улар мустақил фаолият юритади. Кенгаш коллеж ва университетларнинг президентлари, турли соҳада фаолият юритувчи эксперtlар ҳамда жамоатчилик вакилларини ўз ичига олган 20 нафар аъзодан иборат².

Буюк Британияда ОТМда ички таълим сифатини баҳолаш механизми мавжуд бўлиб, ушбу тизимнинг шаффоф ва адолатли олиб борилишини Таълим сифатини кафолатлаш агентлиги (Quality Assurance Agency) назорат қиласи ва агентлик нодавлат ташкилот ҳисобланади³.

Украинада ҳам олий таълим сифатини баҳолаш нодавлат ташкилотлар томонидан амалга оширилиб, бу ташкилотлар Олий таълим сифатини таъминлаш Миллий агентли томонидан аккредитациядан ўтказилади. Нодавлат ташкилотлар хизматидан фойдаланиш ОТМ учун ихтиёрий

¹ https://en.wikipedia.org/wiki/Educational_accreditation.

² https://en.wikipedia.org/wiki/Higher_education_accreditation_in_the_United_States.

³ https://en.wikipedia.org/wiki/Quality_Assurance_Agency_for_Higher_Education.

бўлиб, ташкилот ОТМда таълим сифати текширгани тўғрисида сертификат тақдим қиласди¹.

Ўзбекистон Республикаси Президентининг 2019 йил 8 октябрдаги “Ўзбекистон Республикаси Олий таълим тизимини 2030 йилгача ривожлантириш концепциясини тасдиқлаш тўғрисида”ги ПФ-5847-сонли Фармонида ҳам назорат қилиш ва ОТМ рейтингини юритишнинг нодавлат тизимини яратиш белгиланган².

Бугунги кунда Вазирлар Маҳкамаси хузуридаги таълим сифатини назорат қилиш давлат инспекциясининг олий таълим сифатини назорат қилиш борасида олиб бораётган ишлари етарли бўлмаяпти. Бунинг асосий сабаби инспекцияда 108 та штат бирлиги, ҳудудий бўлимларда атига 2 нафардан 6 нафаргача ходим мавжуд³, ҳудуддаги барча олий ва ўрта-махсус ўқув муассасалари, мактабларда таълим сифатини таъминлашга уларни жисмоний имконияти етмайди. Мисол учун, Намангандеги вилоятида 695 та умумтаълим мактаблари, 119 та ўрта-махсус таълим муассасалари, 3 та ОТМ мавжуд⁴.

Шунга кўра, муассасаларда сифатли таълимни таъминлашни ҳаражатсиз ва самарали йўли нодавлат ташкилотлар хизматидан фойдаланиш ҳисобланади. Таълим сифатини назорат қилиш давлат инспекцияси коррупциявий ҳолатлар келиб чиқишини олдини олиш мақсадида нодавлат ташкилотлар фаолиятини кучли назорат қилиши ва уларнинг фаолиятини мувофиқлаштириши лозим бўлади.

6. Талабларни баҳолашда “Blind assessment” тизимини жорий этиш.

Олий таълим соҳасида талабаларни баҳолаш коррупциявий хавф-хатарлар даражаси юқори бўлган босқич ҳисобланади.

¹ Sofiya Nikolaeva, “Ehe Bologna process in Ukraine: the decade anniversary” General and Professional Education, 2015 p – 66-74.

² Ўзбекистон Республикаси қонун хужжатлар маълумотлари миллий базаси, 2019 й., 06/19/5847/3887-сон.

³ Қонун хужжатлари маълумотлар миллий базаси, 17.01.2019 й., 07/19/4119/2492-сон.

⁴ <http://www.namstat.uz/images>.

Олий ва ўрта махсус таълим вазирининг 2018 йил 9 августдаги буйруғи билан “Олий таълим муассасаларида талабалар билимини назорат қилиш ва баҳолаш тизими тўғрисидаги”ги Низом тасдиқланган бўлиб, ушбу хужжат асосида ОТМда талабаларнинг билимлари текширилади. Низомга кўра, ОТМда талабалар билимини назорат қилиш оралиқ ва якуний назорат турларини ўтказиш орқали амалга оширилади ва уларни ўтказиш тартиби ОТМнинг ички тузилмалари томонидан белгиланади¹.

Талабаларнинг билим даражасининг пастлиги ОТМда таълим сифати пастлигини кўрсатувчи асосий омиллардан бири ҳисобланади. Талабаларни зарур билим ва кўникмаларни олиши уларнинг меҳнати, тиришқоқлигига боғлик, лекин уларни меҳнат қилишга ундовчи асосий омил адолатли ва холис баҳолаш тизими бўлади.

ОТМда талабаларни баҳолаш тартиби ОТМлари томонидан эркин танланиши, имтиҳон жараёнларини жиддий талабчанлик асосида ўтказилмаслиги мазкур босқичда майший коррупция, фаворотизм, непотизм, ҳолатларини олиб келмоқда. Энг ёмони академик доира вакиллари ва талабалар томонидан баҳолаш жараёнидаги коррпүзиявий ҳолатларни жиноий хуқуқбузарлик сифатида тасаввур қилинмаслиги бу салбий ҳолатларни одатий вазиятга айлантириб қўйган.

Шунинг учун, барча ОТМ учун намунавий баҳолаш қоидаларини ишлаб чиқиши, юқоридаги низомга киритиш керак. Inha, Westminster университетларида мавжуд “Blind assessment” баҳолаш тартибини жорий этиш ижобий натижалар бериши мумкин. Мазкур баҳолаш тизимини яратишида қуидаги қоидаларни белгилаш керак:

- оралиқ ва якуний назорат ишларини аниқ баҳолаш мезонларини яратиш;
- оралиқ ва якуний назорат ишларини махсус компьютер программаси ёрдамида “ID” кодлаш;

¹ Конун ҳужжатлари маълумотлар миллий базаси, 26.09.2018 й., 10/18/3069/1965-сон.

- оралиқ ва якуний назорат ишлари йиғиб олингач алоҳида камера назоратидаги хонада текширувчилар томонидан баҳоланиши;
- бир оралиқ ва яқуний назорат ишини икки нафар текширувчилар томонидан баҳоланиши, натижаларда жиддий фарқ бўлганда, ишларни учинчи текширувчи томонидан якуний баҳоланиши;
- текширувчи шахсларни махфий сақлаш, бу ҳақида улар текширишга жалб қилинган вақтда хабардор бўлишлари;
- ишларни текширишда ҳар бир мезон бўйича алоҳида ва умумий баҳо кўйиш, уларни ҳар бирини изоҳлаш;
- имтиҳон топшириш қоидаларини бузган (уяли алоқа, техник воситалар, шпаргалкалардан фойдаланиш), плагиат ва текшириш учун белги қўйган талабалар ишларини бекор қилиш;
- имтиҳон учун масъул жавобгар шахслар доирасини белгилаш лозим бўлади.

Баҳолаш тартибини барча давлат ва нодавлат ОТМ учун бир хил шаклга келтириш ва тизимни ижобий тажрибалар асосида такомиллаштириб бориш керак бўлади.

7. ОТМларига кириш имтиҳони топшириш қоидаларини бузган шахслар учун маъмурий жавобгарлик асосларини белгилаш.

Олий таълим соҳасида содир этиладиган порахўрлик жиноятлари Жиноят кодексининг тегишли моддаси (210-214-моддалар) билан малакаланади. Бироқ, имтиҳон жараёнидаги турли қонунбузилиши ҳолатлари бўйича миллий қонунчиликда жавобгарлик асослари мавжуд эмас. Айниқса, бундай қоидабузилишлар ОТМга кириш имтиҳони жараёнида кўп содир этилади. Мазкур қонунбузилишларнинг ижтимоий хавфлилиги коррупциявий хуқуқбузарликлардан кам бўлсада, лекин уларнинг салбий оқибатлари бир хил. Кириш имтиҳони билан боғлиқ қонунбузилишларига жавобгарлик асосларини белгиланмагани мазкур ҳаракатларни такroran содир этилишига олиб келмоқда.

Жумладан, 2019 йилда Вазирлар Маҳкамасининг 03.04.2018 йилдаги 261-сонли Қарори билан тасдиқланган тест ўтказиш тартибига доир Низом талабларини бузган 465 нафар шахслар синовдан четлаштирилган¹.

Шунингдек, замонавий алоқа воситалари ва технологиялар шиддат билан ривожланаётган бир вақтда жавобғалик асосларига эҳтиёж сезилмоқда.

Россия Федерацияси Маъмурий жавобгарлик тўғрисидаги кодексининг 19.30-моддаси ўқув фаолиятини олиб бориш ва ўқув жараёнини ташкил этиш талабларини бузиш деб номланиб, 5-бандида “Таълим тўғрисида”ги Қонун ҳужжатларида белгиланган таълим муассасасига қабул қилиш тартибини бузиш учун жавобгарлик белгиланган. Жарима тариқасида фуқароларга уч мингдан беш минг рублгача, мансабдор шахсларга - йигирма мингдан қирқ минг рублгача жарима белгиланган².

Шунга кўра, Маъмурий жавобгарлик тўғрисидаги кодексга “Таълим тўғрисидаги қонун талабларини бузганлик учун маъмурий жавобгарлик” деб номланган V¹ боб” киритиш ва ушбу бобга “Таълим муассасаларига кириш имтиҳони қоидаларини бузиш” деб номланган 59²-модда киритиш лозим бўлади. Мазкур ҳуқуқбузарлик учун маъмурий жарима миқдорини иложи борича юқори белгилаш лозим. (лойиха иловада тўлиқ келтирилади).

Маъмурий жавобгарлик тўғрисидаги кодексга алоҳида боб киритишдан мақсадида кейинчалик таълимга оид бошқа ҳуқуқбузарлик турларини ўрганиш ва уларни мазкур бобга киришдир.

Хусусан, Қозогистон Республикаси Маъмурий жавобгарлик тўғрисидаги кодексининг З та³, Россия Федерацияси Маъмурий жавобгарлик тўғрисидаги кодексининг З та⁴, Тукманистон Маъмурий

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш аҳволи ва қонунийликни таъминлашга доир масалалар” – 2019 йил 18 январь.

² <http://www.consultant.ru>.

³ <https://kodeksy-kz.com>.

⁴ <http://www.consultant.ru>.

жавобгарлик түғрисидаги кодексининг 1 та¹, Украина Маъмурий жавобгарлик түғрисидаги кодексининг 1 та² моддасида таълимга оид хуқуқбузарликлар белгиланган.

8. Ўқитувчи ва талабаларнинг Ахлоқ кодексига коррупцияга оид алоҳида боб қўшиш.

Коррупциявий хавф-хатарларни бартараф этишда ягона қоидалари муҳим ўрин эгаллайди ва жаҳон амалиётида ҳам бу ўз исботини топган.

Хусусан, БМТнинг 2003 йил 31 октябрдаги “Коррупцияга қарши курашиш конвенция”нинг 19-моддасида, давлат хизматчиси учун ўзини тутиш ахлоқ кодексини қабул қилиши тавсия этилган. БМТ Бош Ассамблеясининг 1996 йил 12 декабрдаги 51/59-сонли қарори билан давлат мансабдор шахсларини ўзини тутиш Халқаро кодекси қабул қилинган³.

Миллий қонунчиликда Вазирлар Маҳкамасининг 2016 йил 2 мартағи “Давлат бошқаруви органлари ва маҳаллий ижро этувчи ҳокимият органлари ходимларининг одоб-ахлоқ намунавий қоидаларини тасдиқлаш түғрисида”ги 62-сонли қарори қабул қилинган бўлиб⁴, қарордан кўзланган асосий мақсад давлат хизматчиларининг масъулиятини ошириш, коррупциявий ҳолатларни олдини олиш ҳисобланади.

Россия Федерацияси Сибир Университети томонидан ишлаб чиқилган ўқитувчиларнинг Ахлоқ кодексининг 3.7-банди “Коррупцияни олдини олдиш” деб номланиб, коррупциявий харакатлар рўйхати келтириб ўтилган⁵.

Олий таълим соҳасида фаолият кўрсатувчи академик ходимлар ва талабаларнинг ахлоқ қоидалари мавжуд бўлсада, лекин уларда қоидалар

¹ <http://www.turkmenistan.gov.tm>.

² <https://kodeksy.com.ua>.

³ БМТнинг 2003 йил 31 октябрдаги “Коррупцияга қарши курашиш түғрисидаги конвенция”, Нью-Йорк, 2004 йил.

⁴ Ўзбекистон Республикаси қонун хужжатлари тўплами, 2016 й., 9-сон, 94-модда.

⁵ Пеленкова А, Басалгинов В, Этический кодекс учителя, “Сибирский федеральный университет”, Лесосибирск-2015, ст-14-15.

умумий тарзда ёритилган ва коррпциявий ҳолатларга сабаб бўлаётган муҳим масалалар киритилмаган.

Жумладан, қандай ҳолатлар коррупциявий ҳолат сифатида баҳоланиши ва бундай харакатлар учун жавобгарлик асослари, жавобгарликни ҳал этиш тартиби ёритилмаган. Айниқса, коррупциянинг асосий омили бўлган манфаатлар тўқнашуви ва совға олиш масалаларига эътибор қаратилмаган.

Шунинг учун, академик ходимлар, талаблар учун алоҳида “Ахлоқ кодекслари”ни такомиллаштириш мақсадга мувофиқ бўлади. Ахлоқ кодексини тузишда қуидаги хусусиятларга алоҳида эътибор қаратиш лозим:

- ахлоқ кодексини ўқитувчилар ва талабалар учун алоҳида тузилиши керак, чунки уларнинг ҳуқуқ ва мажбуриятлари бир-биридан тубдан фарқ қиласди;
- ахлоқ кодекси нормаларини белгилашда миллий қадриятларни инобатга олиш керак, чунки жамиятдаги ахлоқ қоидалари ҳудудининг дини, анъаналари, урф-одатлари билан кучли боғланган бўлади;
- ахлоқ кодексида коррупциявий харакатлар, уларнинг рўйхати, жавобгарлик асослари, жавобгарлик масалаларини ҳал этиш тартибини алоҳида бобда аниқ белгилаш лозим бўлади;
- ахлоқ кодексларини ОТМ учун намунавий шаклини ишлаб чиқиш ва ОТМга кўшимча талабларни белгилаш ҳуқуқини бериш керак.

ОТМда академик ходимлар ва талабалар учун алоҳида ахлоқ кодексларни ишлаб чиқилиши, уларни амалиёт жараёнида фаол қўллаш коррупциявий хавф-хатарларни бартараф этишга хизмат қиласди.

9. ОТМга қабул қилинадиган талабалар сони (квота) белгилаш миқдорини ОТМ ваколатига ўтказиш.

Ўзбекистон Республикасининг 1997 йил 29 августдаги “Таълим тўғрисида”ги Қонуннинг 25-моддасига кўра, давлат грантлари миқдори ва таълим муассасаларига қабул қилиш тартибини белгилаш Вазирлар

Маҳкамаси ваколатига киради¹. Квота тартибини марказлашганлиги бир қатор салбий оқибатларни келтириб чиқармоқда.

Жумладан, квота сонини белгилашга йилда бир марта эътибор қаратилиши, қарор қабул қилувчи орган берилган маълумотлар асосида квота сонини белгилаши меҳнат бозорининг ҳақиқий талабларига етарлича эътибор қаратилмаслигига олиб келмоқда.

Жаҳон Банкининг таҳлилий маълумотига кўра, мамлакатимиз олий таълим тизими меҳнат ва иқтисодий соҳа билан умуман боғланмаган бўлиб, ОТМ бити्रувчилари сони талаб этилаётган соҳаларга мувофиқ келмайди.

Хусусан, мамлакат ялпи миллий маҳсулотида хизмат кўрсатиш 47,3 фоиз (ишчилар 40,4 фоиз), саноат 33,5 фоиз (ишчилар 37,7 фоиз), қишлоқ хўжалиги 20 фоизни (ишчилар 21,9 фоиз) бўлса, олий таълим бити्रувчилари хизмат кўрсатишда 21 фоиз, саноатда 20,5 фоиз, қишлоқ хўжалигига 6,7 фоиз, бошқа соҳаларда 52 фоизни ташкил қилмоқда².

Шунингдек, Ўзбекитсон Республикаси Президентининг 2019 йил 17 январдаги “2017-2021 йилларда Ўзбекистон Республикасини ривожлантиришнинг бешта устувор йўналиши бўйича ҳаракатлар стратегиясини “Фаол инвестициялар ва ижтимоий ривожланиш йили”да амалга оширишга оид давлат дастури тўғрисида”ги ПФ-5635-сонли Фармонида, Вазирлар Маҳкамаси ҳузуридаги Таълим сифатини назорат қилиш давлат инспекцияси 2019 йил 1 марта қадар, Олий ва ўрта маҳсус таълим вазирлиги, Бандлик ва меҳнат муносабатлари вазирлиги ҳамда Иқтисодиёт ва саноат вазирлиги билан биргаликда ОТМ томонидан талabalарни қабул қилиш квоталарини иқтисодиёт тармоқлари ва ижтимоий соҳанинг истиқболдаги эҳтиёжларини, шунингдек муассасаларнинг кадрларни сифатли тайёрлашни ташкил этиш имкониятларини ҳисобга олган ҳолда мустақил равища белгилаш

¹ Ўзбекистон Республикаси Олий Мажлиси Ахборотномаси, 2013 й., 41-сон, 543-модда.

² Final Report of World Bank Group, “Uzbekistan Education Sector Analysis” 2018, page-11

тартибини тасдиқлаши ва ушбу тартиб 2019/2020 йилдан татбиқ этилиши назарда тутилган¹.

Грузия ОТМлари Сенати ўқув йили бошида факультет кенгаши таклифи билан ОТМга қабул квоталари сонини мустақил белгилаб, Таълим ва фан вазирлигига тақдим этади².

Шунга кўра, квота сонини белгилашни ОТМга бериш ва унинг тўғрилиги Таълим сифатини назорат қилиш инспекцияси амалга оширилиши ва норматив асосларини белгилаш керак. Бу ҳолатда якуний квота сони Президент қарори билан тасдиқланади.

10. ОТМда фанлар доирасини қайта кўриб чиқиш, номутахассислик фанларни камайтириш.

Ўзбекистон Республикаси Президентининг 2020 йил 24 январь куни Олий Мажлисга йўллаган мурожаатномасида, олий таълим стандартлари хорижий тажриба асосида такомиллаштирилиши, таълим йўналишлари ва ўқитиладиган фанлар қайта кўриб чиқилиши, мутахассисликка алоқаси бўлмаган фанлар сони 2 баробар қисқартирилиши таъкидланди³.

Олий таълим олаётган талаба қизиқсан касбини эгаллаш мақсадида маълум йўналишни танлайди. ОТМда талабага биринчи навбатда бўлажак касбий фаолияти учун муҳим бўлган мутахассислик фанларни ўқитиш лозим. Айниқса, касб турлари шиддат билан маҳsusлашаётган даврда бу катта аҳамиятга эга.

Талаба ўқиётган соҳасига мувофиқ келмайдиган фанларни ўқишига қизиқмайди ва унда мазкур фанлардан баҳо олишда муаммолар пайдо бўлади. Талabalар кўп ҳолларда йўналишларига алоқаси бўлмаган фанлардан баҳо олишда коррупциявий йўллардан фойдаланиши кузатилмоқда.

¹ Қонун ҳужжатлари маълумотлари миллий базаси, 20.03.2020 й., 06/20/5971/0348-сон.

² “Law of Georgia on higher education” December 21, 2004, <http://www.mes.gov.ge>.

³ Ш.М.Мирзиёев, Ўзбекистон Республикаси Олий Мажлисига йўллаган мурожаатномаси, 2020 24 январь, Интернет манзили: <http://uza.uz>.

Фанлар доирасини белгилашда талабалар фикрини инобатга олиш, барча касблар учун зарур бўлган чет тили, информатика ва “Time management” каби фанларга эътибор қаратиш лозим.

11. Талабаларнинг ўқишини кўчириш тартиб қоидаларига ўзгартириш киритиши.

Вазирлар Маҳкамасининг 2019 йил 20 июнда қабул қилинган “Олий таълим муассасаларига ўқишига қабул қилиш, талабаларни кўчириш, қайта тиклаш ва ўқищдан четлаштириш тартиби тўғрисидаги низомларни тасдиқлаш ҳақида”ги 393-сонли қарори қабул қилиниб, мазкур Низомнинг 4-бандида, олий таълимнинг турдош таълим йўналишлари рўйхати Олий ва ўрта маҳсус таълим вазирлиги томонидан ишлаб чиқилиши ва таълим муассасаларига ўқишига қабул қилиш бўйича Давлат комиссияси томонидан тасдиқланиши белгиланган.

Низомда турдош таълим йўналишининг аниқ мезонлари кўрсатилмаган бўлиб, ҳаволаки нормага йўналтирилган. Фақатгина юқоридаги низомнинг 10-бандида, талабаларнинг ўқишини кўчириш ва қайта тиклашда умумкасбий ва ихтисослик фанлари бўйича фарқлар 4 тадан ошмаслиги белгиланган. Мазкур низомда турдош йўналиш бўйича талабалар ўқишини кўчириш тартиби аниқ кўрсатилмагани, назорат босқичи мавжуд эмаслиги коррупциявий ҳолатларга сабаб бўлмоқда.

Шунингдек, Низомнинг 8-бандида, бир ОТМ доирасида ёки бир вазирлик ёхуд идора ёхуд турли вазирликлар ва идоралар тизимидағи ОТМга олий таълимнинг турдош бўлмаган таълим йўналишларига ва истисно тариқасида мос бўлмаган мутахассисликлари бўйича талабанинг ўқишини кўчириш ёки қайта тиклаш Давлат комиссияси қарори билан амалга оширилиши белгиланган¹.

Талабаланинг ўқишини турдош ва мос бўлмаган йўналишга кўчиришдан коррупциявий ҳолатларга сабаб бўлиши мумкин.

¹ Конун ҳужжатлари маълумотлари миллий базаси, 29.12.2019 й., 09/19/1046/4242-сон.

Бундан ташқари, Низомнинг умумий қоидалар белгиланган 2-бобида талабаларни ўқишини кўчириш асослари белгиланмаган ва бу кўчириш доирасини кенгайтириб юборган. Мазкур ҳолат коррупцияга олиб келмаслиги ва назорат қилиш учун аниқ тартиб яратиш мақсадида талабаларни ўқишини кўчириш асосларини белгилаш лозим. Зеро, барча талабалар рақобат кучли бўлган соҳаларга ўқишга киришда очиқ рақобатни айланиб ўтишини ҳисобга олиш лозим.

Амалиёт жараёнида ҳам бу борада бир қатор қонун бузилишларни кўриш мумкин. Масалан, Ўзбекистон давлат жаҳон тиллари университетида 2019 йилнинг ўзида 3 нафар талабларнинг ихтисослик фанларида 7-8 та фарқ бўлсада, Низом талабларига зид равишда университетга талаба сифатида қабул қилинган¹.

Шунга кўра, дастлабки босқичда мазкур низомга ўзгартириш киритиш орқали талабаларнинг ўқиши кўчириш тартибини қайта белгилаш ва кейинги босқичда Таълим кодексида мазкур масалани батафсил қўрсатиш лозим бўлади. Низомга қўйидаги ўзгаришларни киритиш таклиф қиласиз:

- ўқишини кўчириш асосларини белгилаш;
- турдош бўлган йўналиш хусусиятларини аниқ ёритиш;
- турдош ва мос бўлмаган йўналишлар бўйича талабаларнинг ўқишини кўчириш бекор қилиш;
- бир олий таълим муассасаси доирасида талабаларнинг ўқиш йўналишини ўзгартиришни бекор қилиш;
- ўқиши кўчиришда Таълим сифатини назорат қилиш инспекцияси розилигини олиш.

12. Ўзбекистон Республикаси ОТМлари ўртасида коррупциявий рейтингни ташкил этиш.

Олий таълим соҳасида коррупциянинг олдини олишда очиқлик ва ошкоралик самарали ёндашув бўлиб, Республикадаги ОТМлари ўртасида

¹ Коррупцияга қарши курашиш бўйича Республика Идоралараро комиссиясининг иғилиш баёни, “Олий таълим соҳасида коррупцияга қарши курашиш ахволи ва қонунийликни таъминлашга доир масалалар” – 2019 йил 18 январь.

коррупциявий рейтинг жорий этиш очиқлик ва ошкораликни таъминлаш усулларидан бири ҳисобланади.

Жумладан, биргина Transparency International ташкилоти томонидан жаҳон мамлакатлари миқёсида юритиладиган коррупциявий рейтинг натижалари давлатларни коррупцияга қарши курашиш сиёсатига ижобий таъсир кўрсатмоқда¹.

Хусусан, ОТМлари ўртасида коррупциявий рейтинг натижалари абитурентлар, уларнинг ота-оналари томонидан ОТМни танлашда муҳим аҳамият касб этади.

Шунингдек, масъул давлат органлари учун ислоҳотлар ва чоралар кўриш лозим бўлган ОТМлари рўйхатини белгилайди.

ОТМлари ўртасида коррупциявий рейтинг жорий этишда куйидагиларга алоҳида эътибор қаратиш лозим:

- аноним ижтимоий сўровларни ўтказишдан кенг фойдаланиш;
- ижтимоий сўровларни ўтказишда рейтинг кўрсаткичидан манфаатдор бўлмаган иштирокчиларни жалб қилиш;
- ижтимоий сўровларни ўтказишда интернет тармоғи, ижтимоий тармоқлардан кенг фойдаланиш;
- хуқуқни муҳофаза қилиш органларининг статистик маълумотларидан фойдаланиш;
- рейтинг фаолиятини олиб боришни нодавлат ташкилоти ваколатига бериш;
- рейтинг фаолиятини олиб бориш тартиби ва мезонлари бўйича норматив-хуқуқий хужжат қабул қилиш;
- рейтинг муддатини ўқиш симестрига мувофиқ олти ой қилиб белгилаш;
- рейтинг кўрсаткичларини эълон қилиш, ижобий натижаларни мукофотлаш ва натижаларни кенг халқ оммасига етказишига алоҳида эътибор қаратиш.

¹ <https://www.transparency.org>.

Рейтинг натижалари ОТМлари мавқейига заар өткәзиши мүмкин ва муассасалар коррупция ҳолатларини олдини олишга, иштирокчилар фикрини ўзгартиришга ҳаракат қиласы.

Х У Л О С А

Коррупция ҳар қандай тараққиётни фалокатга етаклаши унинг жаҳон миқёсида кўрсатаётган салбий оқибатлари билан исботланади. Таъкидлаш керакки, ҳозирги замон тажрибасида коррупцияга қарши умумий тарзда курашиш керакли натижага эришиб бўлмаслигини кўрсатди. Шунинг учун ҳам бугунги кунда коррупцияга ҳар бир соҳада алоҳида, ўзига хос кураш олиб борилмоқда. Бу усул бир тарафдан ҳар бир соҳага маҳсус тарзда ёндашиш шароитини яратса, иккинчи тарафдан энг долзарб соҳаларни биринчи галда танлаб олиш имкониятини беради.

Ўзбекистон Республикаси ҳам мазкур тўғри ёндашувга таяниб, коррупцияга қарши курашни дастлаб муҳим соҳаларда бошлади. Ҳукумат томонидан олий таълим тизимини энг долзарб соҳа сифатида белгиланиши энг оқилона танлов бўлди. Олий таълим соҳасининг ҳозирги ва келгуси тараққиёти давлатнинг бугунги ва эртанги ривожи демакдир.

Олий таълим соҳасида коррупцияга оид хавф-хатарларни аниқлаш ва уларни бартараф этиш масалалари мавзусида магистрлик диссертациясини тадқиқ қилиш натижасида, назарий, амалий (ташкилий институонал) ва норматив таклифлар ишлаб чиқилди.

I. Тадқиқот натижасида келтирилган илмий-назарий таклифлар:

Биринчидан, “Коррупцияга қарши курашиш тўғрисида”ги Қонунда коррупция тушунчасига таъриф берилган бўлсада, миллий доирада олий таълим соҳасида коррупция тушунчasi мавжуд эмас. Илмий таъдқиқот давомида олий таълим соҳасида коррупция тушунчасига берилган миллий ва хорижий таърифлар ўрганилиб, унинг мукаммал таърифи таклиф қилинди. Тушунчага тариф беришда мансаб ваколатини сустеъмол қилиш, хусусий сектордаги коррупция каби янги жиҳатларига эътибор қаратилди.

Иккинчидан, коррупциявий хавф-хатар тушунчasi турли соҳаларда қўлланиб келинган бўлсада, ушбу тушунчага назарий таъриф берилмаган. Ўрганиш давомида, олий таълим соҳасидаги коррупциявий хавф-хатар

тушунчасига таъриф берилди. Тарифни шакллантиришда турли ёнашувлар мавжудлиги кўрсатилиб, тадқиқот учун мос ёндашув танлаб олинди ва тушунча амалий мисоллар ёрдамида ойдинлаштирилди.

Учинчидан, олий таълим соҳасидаги коррупциявий хукуқбузарликлар ўрганилди ва уларнинг шакллари келтирилди. Коррупциявий хукуқбузарлик шаклларини ёритишида, мамлакатимиз ва хорижий давлатларда долзарб бўлган шаклларга алоҳида тўхталиб ўтилди. Шунингдек, коррупциявий хукуқбузарлик шаклларининг долзарблиги миллий, худудий хусусиятларга ва бўлажак ислоҳотларга боғлиқ эканлиги амалий мисоллар ёрдамида кўрсатиб берилди.

Тўртинчидан, Олий таълим соҳасидаги коррупциявий хукуқбузарликларни бошқа соҳадаги хукуқбузарликлардан фарқловчи ўзига хос хусусиятлари келтирилди.

Бешинчидан, тадқиқотчилар томонидан олий таълим соҳасидаги коррупциявий хукуқбузарликлар таснифи ўрганилиб, уларнинг ҳар бирiga амалий мисоллар келтирилди ва мамлакатимиз олий таълим соҳаси учун муҳим бўлган давлат, хусусий ва хорижий ОТМда содир этиладиган коррупциявий хукуқбузарликларга таснифланди.

II. Тадқиқот натижасида келтирилган амалий (ташқиلىй институонал) таклифлар:

Биринчидан, ўрганиш давомида, коррупциявий хавф-хатарларни таҳлил этишдаги турли ёндашувлар кўриб чиқилди, уларнинг ижобий ва салбий жихатлари ўрганилди. Якунда, олий таълим соҳасида коррупциявий хавф-хатарларни таҳлил этиш ва уларни бартараф этишининг мақбул усули таклиф этилди.

Иккинчидан, олий таълим соҳасида долзарб бўлган кириш имтиҳонларини такомиллаштириш бўйича янги тартибини ташкил этиш бўйича таклиф берилди. Таклиф лойиҳасида жорий имтиҳон тизимидаги коррупциявий хавф-хатарлар, янги имтиҳон шаклининг ижобий натижалари кўрсатиб берилди.

Учинчидан, соҳада коррупциявий ҳолатларнинг асосий омили бўлган самарасиз бошқарув шакли таҳлил қилиниб, ОТМда замонавий ва демократик принципларга асосланган бошқарув тизимини жорий этиш таклиф қилинди. Таклиф лойиҳасини ишлаб чиқишида Грузия хорижий тажрибаси ва эришган ижобий натижалари асос қилиб олинди.

Тўртинчидан, хорижда ўқимоқчи бўлган талабалар ва мамлакатимизда ўқиётган хорижий талабаларга хизмат кўрсатишида институонал бўшлиқ мавжудлиги инобатга олинниб, ушбу хизмат турини кўрсатувчи маҳсус нодавлат тузилма ташкил этишга кўмаклашиш таклиф қилинди.

Бешинчидан, олий таълим соҳасида коррупциявий ҳолатларни келиб чиқишининг асосий омилларидан бири сифатсиз таълим эканлиги ва таълим сифатини назорат қилишида иш ҳажми кенглиги инобатга олинган ҳолда мазкур фаолиятни амалга оширувчи нодавлат тузилма ташкил этишга кўмаклашиш таклифи берилди.

Олтинчидан, коррупциядан ҳоли баҳолаш тизими яратиш соҳадаги коррупциянинг деярли ярмини олдини олишга хизмат қиласи. Шунинг учун, тадқиқот ишида талабаларни баҳолашда “Blind assessment” тизимини жорий этиш таклиф этилди.

Еттинчидан, ОТМда ўқитилаётган номутахассислик фанлар маҳсус кадрларни тайёрлашга салбий таъсир қилиши билан бирга коррупциявий ҳолатларга олиб келмоқда. Шунга кўра, ОТМда ўқитилаётган талабалар қизиқмайдиган номутахассислик фанларни камайтириш таклифи берилди.

Саккизинчидан, соҳадаги очиқлик ва ошкоралик, жамиятнинг соҳага берган холис баҳоси коррупцияга қарши курашишида самарали усул бўлиб, илмий ишда Ўзбекистон Республикаси ОТМлари ўртасида коррупциявий рейтингни ташкил этиш таклиф қилинди.

III. Тадқиқот натижасида келтирилган норматив-хуқуқий таклифлар:

Биринчидан, олий таълим ва бошқа таълим соҳаларида норматив-хуқуқий хужжатлар кўплиги, уларни амалиётда қўллашда қийинчилик

келиб чиқараётгани, нормалар ўртасида зиддият ва такрорланишлар мавжудлиги сабабли Таълим кодексини тузиш таклифи берилди.

Иккинчидан, ОТМга кириш имтиҳонлари жараёнида қоида бузилишлар узоқ йиллар давомида содир этиб келинмоқда, бундай “уддабуронлар” аниқлангани ҳолда имтиҳондан четлатилмоқда, лекин уларнинг жавобгарлик масаласи ҳал этилмаяпти. Шунга кўра, таълим муассасасига кириш имтиҳони топшириш қоидаларини бузган шахслар учун маъмурий жавобгарлик асосларини белгилаш ва Маъмурий жавобгарлик тўғрисидаги кодексга алоҳида модда киритиш таклиф этилди.

Учинчидан, коррупцияга қарши курашишда ички тартиб қоидаларни мукаммал шакллантириш ва унда коррупцияга оид қоидаларни белгилаш муҳим аҳамият касб этади. Шунинг учун, ўқитувчи ва талабалар учун алоҳида Ахлоқ кодекслари ишлаб чиқиш ва коррупциявий ҳолатларни белгилаш таклиф қилинди.

Тўртинчидан, ОТМ ўз имкониятларини тўғри баҳолаши ва меҳнат бозори талабларига мувофиқ кадрларни тайёрлашга эътибор қаратиш учун “Таълим тўғрисида”ги Қонуннинг 25-моддасига ўзгариш киритиб, квота сонини белгилаш ваколатини Вазирлар Маҳкамасидан ОТМлари ваколатига ўтказиш таклиф қилинди.

Бешинчидан, Вазирлар Маҳкамасининг 2019 йил 20 июнда қабул қилинган “Олий таълим муассасаларига ўқишига қабул қилиш, талабаларни кўчириш, қайта тиклаш ва ўқишдан четлаштириш тартиби тўғрисидаги низомларни тасдиқлаш ҳақида”ги 393-сонли қарорига ўзгартириш киритиш ва турдош йўналишлар бўйича ўқишини кўчиришнинг аниқ тартибини, ўқишини кўчириш асосларини белгилаш ва бир ОТМ ичida ўқишини кўчиришни бекор қилиш таклиф қилинди.

Юқоридаги таклифлар асосида олий таълим соҳасида мавжуд коррупциявий хавф-хатарларни бартараф этиш ва қўлга киритилган назарий ҳамда амалий тажрибаларни бошқа соҳаларда қўллаш мумкин бўлади.

Фойдаланилган адабиётлар рўйхати

I. Норматив-ҳуқуқий хужжатлар ва методологик аҳамиятга молик нашрлар

Норматив-ҳуқуқий хужжатлар

1. Ўзбекистон Республикаси қонун хужжатлар маълумотлари миллий базаси, 2019 й., 06/19/5847/3887-сон.
2. Ўзбекистон Республикаси Олий Мажлиси Ахборотномаси, 2013 й., 41-сон, 543-модда.
3. Ўзбекистон Республикаси қонун хужжатлар маълумотлари миллий базаси, 2019 й., 06/19/5892/4134-сон.
4. Ўзбекистон Республикаси қонун хужжатлар маълумотлари миллий базаси, 2018 й., 07/18/3775/1313-сон.
5. Ўзбекистон Республикаси қонун хужжатлар маълумотлари миллий базаси, 2019 й., 06/19/5763/3410-сон.
6. Ўзбекистон Республикаси қонун хужжатлар маълумотлари миллий базаси, 2019 й., 3/19/542/3177-сон.
7. Ўзбекистон Республикаси қонун хужжатлар маълумотлари миллий базаси, 2019 й., 06/19/5769/3450-сон.
8. Ўзбекистон Республикаси қонун хужжатлари тўплами, 2016 й., 9-сон, 94-модда.
9. Қонун хужжатлари маълумотлари миллий базаси, 21.01.2020 й., 09/20/36/0076-сон.
10. Қонун хужжатлари маълумотлари миллий базаси, 21.01.2020 й., 09/20/36/0076-сон.
11. Қонун хужжатлари маълумотлари миллий базаси, 04.12.2019 й., 09/19/967/4107-сон.
12. Қонун хужжатлари маълумотлари миллий базаси, 09/19/1046/4242-сон.
13. Қонун хужжатлари маълумотлари миллий базаси, 19.02.2020 й., 10/20/2859-2/0188-сон.
14. Қонун хужжатлари маълумотлар мллий базаси, 17.01.2019 й., 07/19/4119/2492-сон.

15. Қонун хужжатлари маълумотлар миллий базаси, 26.09.2018 й., 10/18/3069/1965-сон.
16. Қонун хужжатлари маълумотлари миллий базаси, 20.03.2020 й., 06/20/5971/0348-сон.
17. Бирлашган Миллатлар Ташкилотининг 2003 йил 31 октябрдаги “Коррупцияга қарши курашиб түғрисидаги конвенция”, Нью-Йорк, 2004 йил.
18. “Law of Ukraine on higher education” July 1, 2014.
19. Georgia “Law of Georgia on higher education” December 21, 2004.
20. Пеленкова А, Басалгинов В, Этический кодекс учителя, “Сибирский федеральный университет”, Лесосибирск-2015, ст-17.

Методология аҳамиятга молик наширлар

1. Ш.М.Мирзиёев, Ўзбекистон Республикаси Конституциясининг 26 йиллигига бағищланган тантанали маросимдаги маъзуза, 2018 йил 7 декабрь.
2. Ш.М.Мирзиёев, Ўзбекистон Республикаси Олий Мажлисига йўллаган мурожаатномаси, 2020 24 январь.
3. Коррупцияга қарши кураш бўйича Республика Идоралараро комиссиянинг йиғилиш баёни, “Олий таълим соҳасида коррупцияга қарши курашиб ва қонунийликни таъминлашга доир масалалар” – 2019 йил 18 январь.

II. Монография, илмий мақоллар, тўплами

1. Nataliya L. Source: Taxonomy of Corruption in Higher Education Peabody Journal of Education”, Newly Emerging Global Issues, 2005, p – 92.
2. Osipian A. “Glossary of Higher Education Corruption with Explanations”, 2009, p – 26.
3. Участие институтов гражданского общества в борьбе с коррупцией: научный и практический пособие / отв. ред. Ю.А.Тихомиров. М., 2013. С. 82.
4. Georgiev V. “Methods and techniques for assessment of corruption risk in Defenceand Security”, 2013, Journal of Defense Management, p – 21.
5. Ожегов С.И., Толковый словарь, 2008-2009.
6. Ушаков Д.Н., Толковый словарь 2008-2009.

7. Rumyantseva N, “Taxonomy of Corruption in Higher Education”, Peabody Journal of Education, Vol. 80, No. 1, Newly Emerging Global Issues, 2005 p – 92.
8. Williams B, “Ukraine chief assails corrupt admissions” The Chronicle of Higher Education, 8 July, 2005, p – 33.
9. Osipian A, “University autonomy in Ukraine: Higher education corruption and the state”, Communist and Post-Communist Studies journal homepage: 28 June 2017, p – 243.
10. Sofiya Nikolaeva, “The Bologna process in Ukraine: the decade anniversary” General and Professional Education, 2015 p – 74.
11. Orkodashvili M. “Corruption, Collusion, and Nepotism in Higher Education and the Labor Market in Georgia”, European Education, 2011, p – 53.
12. Orkodashvili M. “Corruption in Higher Education: causes, consequences, reforms. The case of Georgia”, 2009, p – 31.
13. Orkodashvili M. “From equity of access to international quality standards for curbing corruption in secondary and higher education and closing achievement gaps in post-soviet countries”, The Impact of International Achievement Studies on National Education Policymaking, Copyright © 2010 by Emerald Group Publishing Limited, p – 28.
14. Sofiya Nikolaeva, “The Bologna process in Ukraine: the decade anniversary” General and Professional Education 4/2015 p – 74.

III. Фойдаланилган бошқа адабиётлар

Тахлилий маълумотлар ва тавсиялар

1. Final Report of World Bank Group, “Uzbekistan Education Sector Analysis” 2018, p – 119
2. Osipian, A. “Higher Education Corruption in the World Media: Prevalence, Patterns, and Forms”. 32nd Annual Conference of the Association for the Study of Higher Education, Louisville, KY, November 2007.
3. Балыков П.Н и другие “Организация психологической работы антикоррупционной направленности в таможенных органах Российской Федерации” методические рекомендации. - СПБ, 2010.
4. Yun A., “Corruption in Uzbek higher education: detrimental impurity for the future, Norwegian institute International affairs”, 2016 year, p – 20.
5. Klitgard R, “International Cooperation against Corruption, Finance & Development”, March 1998, p – 110.

6. Johnson J, “The basics of corruption risk management a framework for decision making and integration into the project cycles”, U4 Issue 2015, p – 33.
7. Trivunovic M and others, “Developing an NGO corruption risk management system: Considerations for donors”, U4 Issue, 2019, p – 34.
8. OECD Reviews of Integrity in Education: Ukraine 2017, p – 190.
9. Monica K, “Education sector corruption: How to assess it and ways to address it” U4 Issue, 2019, p – 65.
10. British Council Higher Education in Ukraine: Briefing Paper, 2015, p – 9.
11. Poisson M and Hallak, “Corruption risk assessment of the Georgian higher education sector”, International institute for Educational Planning 7–9 rue Eugene Delacroix, 75116 Paris, France, UNESCO 2018, p – 63.

Диссертация ва автoreфератлар

1. Кнауст И.С. “Коррупция учреждениях в^ысшего профессионального образования: Магистерская диссертация”. Томск.: 2016. – 78 с.
2. Osipian A. “Corruption in higher education: for the degree of Doctor of philosophy”. 2013, p – 287.

Интернет манбалари

1. <http://газета.uz>
2. <http://uza.uz>
3. <http://ru.wikipedia.org>
4. <http://people.vanderbilt.edu/~ararat.osipian>
5. <http://pravoteka.ru>
6. <http://slovarozhegova.ru.>
7. <http://ushakovdictionary.ru.>
9. <https://read.oecd-ilibrary.org>
10. <http://ssrn.com/abstract.>
11. <http://www.mes.gov.ge>
12. <http://www.lexed.ru.>
13. <http://kodeksy.by.>
14. <http://lex.justice.md/ru.>

15. <https://kun.uz>
18. <http://www.namstat.uz/images>
19. <https://kodeksy-kz.com>.
20. <http://www.consultant.ru>.
21. <http://www.turkmenistan.gov.tm>.
22. <https://kodeksy.com.ua>
23. <https://www.transparency.org>

ИЛОВА

Лойиҳа

“ЎЗБЕКИСТОН РЕСПУБЛИКАСИНИНГ МАЪМУРИЙ ЖАВОБГАРЛИК КОДЕКСИГА ЎЗГАРТИШ ВА ҚУШИМЧАЛАР КИРИТИШ ТЎҒРИСИДА”ГИ ЎЗБЕКИСТОН РЕСПУБЛИКАСИНИНГ ҚОНУНИ

1-модда. Ўзбекистон Республикасининг 1994 йил 22 сентябрда қабул қилинган 478-1-сонли Қонуни билан тасдиқланган **Ўзбекистон Республикасининг Маъмурий жавобгарлик кодексига** қўйидаги ўзгартиш ва қўшимчалар киритилсин:

1) биринчи бўлим қўйидаги мазмундаги V¹ боб билан тўлдирилсин:
“V¹ боб Таълим тўғрисидаги қонун талабларини бузганлик учун маъмурий жавобгарлик

“59²-модда Таълим муассасасига кириш имтиҳони қоидаларини бузиш”

Олий ва ўрта-махсус таълим муассасаларига, умумий ўрта таълим мактабларига ва бошқа таълим муассасаларига ўқишга кириш имтиҳонларида ўрнатилган қоидалар, яъни имтиҳон жараёнида алоқа ва техник воситалар, ёзма ва электрон манбалар ҳамда бошқа таъкиқланган воситалар, манбалардан фойдаланиш ёки фойдаланиш учун шарит яратиб бериш ёхуд кўмаклашиш —

фуқароларга базавий ҳисоблаш миқдорининг ўттиз бараваридан эллик бараваригача, мансабдор шахсларга эса — қирқ бараваридан олтмиш бараваригача миқдорда жарима солишга сабаб бўлади.

2) учинчи бўлим, XVII боби 257¹-модда билан тўлдирилсин:

257¹-модда Вазирлар Махкамаси хузуридаги Таълим сифатини назорат қилиш инспекцияси

Вазирлар Махкамаси хузуридаги Таълим сифатини назорат қилиш инспекцияси ушбу кодекснинг 59²-моддасида назарда тутилган маъмурий ҳукуқбузарликлар тўғрисидаги ишлар тааллуқлидир.

Вазирлар Махкамаси хузуридаги Таълим сифатини назорат қилиш инспекцияси номидан маъмурий ҳукуқбузарликлар тўғрисидаги ишларни кўриб чиқиш ва жарима солиш тариқасида маъмурий жазо чораси қўллашга қўйидагилар ҳақлидирлар:

Таълим сифатини назорат қилиш инспекцияси бошлиғи ва ўринбосари;

Қорақалпоғистон Республикаси, вилоятлар ва Тошкент шаҳар худудий бўлимлари бошлиғлари.

Қонунчиликка таклифлар бўйича солиштирма жадвал

№	Мавжуд муаммо	Амалдаги таҳрир	Таклиф этиётган таҳрир
<i>Вазирлар Маҳкамасининг 2019 йил 20 июнда қабул қилинган “Олий таълим муассасаларига ўқишига қабул қилиши, талабаларни кўчириши, қайта тиклаши ва ўқишидан четлаштириши тартиби тўғрисидаги низомларни масдиқлаши ҳақида”ги 393-сонли қарори</i>			
1	2018 йилда НДУнинг жисмоний тарбия факултетига кириш имтихонлари топширишда 26 нафар талабанинг натижалари суний кўтарилигани аниқланган. Ҳолат бўйича жиноят иши кўзгатилиб, комиссия раиси масъул шахс сифатида ЖКнинг 207-моддаси 1-қисми билан айбланиб, жиноят иши ЖПК 84-моддаси билан тутатилган. Жиноят иши доирасида талабалар ва бошқа масъулларнинг айбордлиги исботланмаган. Шунингдек, ўткан давр мобайнида бирорта ҳам талаб кириш имтихонларида белгиланган тартиби бузганлиги аниқланниб, талабалар сафидан чиқарилмаган.	36. Талаба олий таълим муассасасидан қуидаги ҳолларда четлаштирилиши мумкин: 3) суд ва тергов органининг қарорига кўра кириш имтихонларида белгиланган тартиби бузганлиги, бошка шахсларни ноқонуний кўмак берганлиги, имтихон натижалари соҳта эканлиги аниқланганда (ушбу ҳолатда талабалар сафидан четлаштирилганлар талабалар сафига қайта тикланмайди);	36. Талаба олий таълим муассасасидан қуидаги ҳолларда четлаштирилади: 3) суд ва тергов органининг қарорига кўра кириш имтихонларида белгиланган тартиби бузганлиги, бошка шахсларни ноқонуний кўмак берганлиги, имтихон натижалари соҳта эканлиги аниқланганда (ушбу ҳолатда талабалар сафидан четлаштирилганлар талабалар сафига қайта тикланмайди);
2	Ўзбекистон Республикаси Бош прокуратураси томонидан 2020 йилда ўтказилган текширишда Ўзбекистон давлат жаҳон тиллари университетида 2019 йилнинг ўзида 3 нафар талабларнинг ихтисослик фанларида 7-8 та фарқ бўлсада, Низом талабларига зид равишида университетга талаба сифатида қабул қилинган. Ҳолат бўйича унверситетга тақдимнома киритилган, бироқ ноқонуний кўчириш бўйруги бекор қилинмаган.	10. Талабаларнинг ўқишини кўчириш ва қайта тиклашни расмийлаштиришда олий таълим муассасаси ректори (филиал директори) белгиланган тартибида ўкув режалари ва дастурлардаги мавжуд академик қарзларни ёки фарқларни (намунавий ўкув режаларидағи умумкасбий ва ихтисослик (мутахассислик) фанлари бўйича фарқлар 4 тадан ошмаслиги лозим) топшириш тартиби ва муддатларини (жорий семестр давомида), ўқитиши курси (семестри) ҳамда ўқишига қабул қилишнинг қонун хужжатларида белгиланган бошқа шартларини белгилайди.	10. иккинчи қисм билан тўлдириш - Талабанинг низом талабларига зид равишида кўчирилгани аниқланган тақдирда суднинг қарори ёки прокурор протестига асосан кўчириш тўғрисидаги буйруқ бекор қилинади. Бундай ноқонуний ҳолат аниқланган ҳолларда олий таълим муассасаси ва назорат органларининг масъул ходимлари прокуратура ёки суд органларига мурожаат қилишлари шарт.
3	Талабаларни ўқишини кўчириш уларнинг аризасига асосан амага оширилади. Исталган талаба ўқишини кўчириш тўғрисида мурожаат қилиши мумкин. Мазкур ҳолат номзодлар доирасини асосиз кенгайшига, рақобатни айланиб ўтишга ва охир окибат коррупцияга сабаб бўлиши мумкин.	Низомда талабаларни ўқишини кўчириш асослари мавжуд эмас.	4¹. Талабаларни ўқишини кўчириш асослари: 1) талабанинг яшаш жойи ўзгарганда; 2) талаба ўқишини кўчираётган йўналишда алоҳида қобилиятга эга бўлиб, соҳада салмоқли илмий изланишлар олиб борган бўлса; 3) талаба ўқишини кўчираётган йўналишда республика ва вилоят миқёсидаги танловларда юқори натижаларни кўлга киритган бўлса (1,2,3 ўринлар);

**Олий таълим соҳасида коррупцияга оид хавф-хатарларни аниқлаш ва
уларни бартараф этиш масалалари бўйича
СЎРОВНОМА**

Хурматли фуқаролар! Сўровномада иштирок этиб, олий таълим соҳасида коррупцияга қарши курашиш самарадорлигини оширишга ўз хиссангизни қўшинг.

Фикр-мулоҳазалар умумлаштирилиб, янги қонун лойиҳасини ишлаб чиқишида фойдаланилади.

1. Олий таълим муассасаларига кириш имтихонларини йил давомида ўтказилишига муносабатингиз:

а) қўшиламан 83,1%

б) қўшилмайман 16,9%

2. Таълим соҳасига тааллуқли норматив-хуқуқий ҳужжатларни ягона кодекс шаклига келтиришга муносабатингиз:

а) қўшиламан 94,2%

б) қўшилмайман 5,8%

3. Олий таълим муассасалари мансабдорларининг қайси ваколатлари коррупцияга сабаб бўлиши мумкин?

- бюджет маблағларини сарфлаш; 71%
- ишга олиш ва ишдан бўшатиш; 38,2%
- университетга моддий техник воситаларини сотиб олиш; 35%
- ойлик иш ҳақи ва устамалар белгилаш; 34;
- талабалик сафидан чиқариш; 18,3%
- таъмирлаш ва капитал-қурилиш бўйича шартномлар имзолаш. 22%

Сизни фикрингизча яна қайси ваколатлар коррупцияга сабаб бўлиши мумкин:

50 дан ортиқ таклифлар

4. Ўзбекистондаги хорижий талabalар ва хорижда ўқимоқчи бўлган Ўзбекистонлик талabalарга хизмат кўрсатувчи маҳсус нодавлат юрик шахсларни ташкил этишга муносабатингиз:

а) қўшиламан 89,9%

б) қўшилмайман 10,1%

5. Таълим сифатини назорат қилишга кўмаклашувчи нодавлат юридик шахслар ташкил этишга муносабатингиз:

- а) қўшиламан 89,9%
- б) қўшилмайман 10,1%

6. ОТМларига кириш имтиҳони топшириш қоидаларини бузган шахслар учун қандай жавобгарлик белгилаш лозим (*масалан, имтиҳонга телефон ва бошқа қуриналар олиб кириш*).

- катта миқдордаги маъмурий жарима; 64,4%
- З йил давомида олий таълим муассасасига кириш хукуқидан маҳрум қилиш шаклидаги жиноий жавобгарлик; 27,5%
- умурбод талаба бўлиш хукуқидан маҳрум этиш шаклидаги жиноий жавобгарлик; 5,8%
- жавобгарлик белгилаш шарт эмас, имтиҳондан четлаштириш етарли. 25,4%
- Сизни фикрингизча қандай жавобгарлик белгилаш мумкин:
- 60 дан ортиқ таклифлар

7. Олий таълим соҳасида талabalарга номутахассислик фанларини ўқитилишига коррупцияга сабаб бўлиши мумкинми (*масалан, юриспруденция йўналишиидаги талabalар учун иқтисодиёт назариясини ўқитиш*)?

- а) ҳа 87,3%
- б) йўқ 12,7%

8. Олий таълим муассасалари ўртасида коррупциявий кўрсаткич бўйича рейтинг жорий этиш таълим муассасаларида коррупцияни камайишига хизмат қиласидими?

- а) ҳа 89,9%
- б) йўқ 10,1%